



VOLUME III

3

TEOLOGIA  
DOMINICA

163

B

19.

BIB. NAZ. NAPOLI

BIBL. NAZ.  
VITT. EMANUELE III


163

B


19

NAPOLI





**THEOLOGIAE**  
**DOGMATICAE**  
**LECTIONES.**  
*TOM. V.*



**MICH. ARCHANGELI  
LVPVLI**

ACADEMICI HERCULANENS. NUNC S. METROPOLITANAE  
ECCLESIAE COMPANAE ARCHIEPISCOPI

**THEOLOGIAE  
DOGMATICAE**

**LECTIONES**

*TOM. V.*

**EDITIO ALTERA.**



*In antiq. gemma ap. Auctorem*



**NEAPOLI**

**EXCVDEBAT RAPHAEL MIRANDA**

**MDCCCXXX**





---

# THEOLOGIAE

## DOGMATICAE

### LECTIONES.

---

#### *LIBER QUARTUS*

#### DE PRIMO HOMINE

#### EJUSQUE PRAEVARICATIONE.

---

**D**ivino sex dierum opificio explicando liberatos, hominis historiam persequi iubet institutum. Duplicem hinc scrutabimur humanae naturae conditionem, *innocentis* nimirum, quam in ipso in vitam ingressu nactus est primus homo, et *corruptae*, in quam mox est per peccati fraudem delapsus; et in qua, vitiata sati ab stirpe parentis, miseri nascimur omnes, donec per baptismi gratiam in statum naturae, in **CHRISTO, IESU** Salvatore nostro reparatae, feliciter renascamur.

## C A P U T I.

## DE HOMINE INNOCENTE.

## S E C T I O I.

*Adam humani generis parens. Peyrerii deliramenta dispelluntur. Scripturae explicantur.*

I. **P**estiferae opinionis portentum in lucem elapso saeculo protulit Isaac Peyrerius, domo Burdigala, secta Calvinianus (1). Contendebat quippe, non esse Adamum primum hominem, sed Judaeorum tantum parentem, eique alios, atque alios homines praecessisse: Diversum esse hominem, qui *Genescos Cap.* 1. plasmatus narratur, ab eo cujus altero capite formatio exsequitur: Ab illo praecadamitas, seu gentiles propagatos; ab Adamo vero longa post annorum intervalla condito, Ju-

---

(1) Medicus iste, non Theologus, opus edidit anno MDCLV. cui inscriptum: *Praecadamitae; sive exercitatio super versibus duodecimo, decimotertio, et decimoquarto Capitis V. Epistolae Divi Pauli ad Romanos.*

daeos ortos : Illius vix meminisse sacrum historicum , deque filiis posterisque eius siluisse ( non enim id agebat ) , ad huius vero propaginem exponendam totum incubuisse , ut qui Judaeorum historiam contexendam suscepisset. Ex his et alia dabat fabulae consectoria , nimirum Noachicas aquarum inundationes non universo orbi incubuisse , sed tantum ubi Adami posteritas inhaeserat ; nec proinde populos omnes ex Semo , Chamo , et Japheto derivare. Postremo Adamum Divino refragatum mandato , crimen in orbem invexisse , non omnibus , sed suis tantum posteris nociturum. Haec nimirum fabulatoris Peyrerii commenta , qui tamen quantum quantum est erroris monstrum , Romae una cum Calvinismo ejuravit , Alexandro VII. Pontifice Maximo.

II. Profecto fabulam narrasse sat est , quod abunde refutata dicatur. Si enim Scripturas attendamus , proh Deus Immortalis , quanta adversus Peyrerium testimonia ! Mittam autem argumentum potentissimum ex *Gen. Cap. V.* Hic est liber generationis Adam. In die qua creavit Deus hominem , ad similitudinem Dei fecit illum : masculum , et feminam fecit eos , et benedixit illis , quibus eadem , atque ipsissimis verbis recoluntur ; quae Ca-

pite I. narraverat. Porro enim aperte *Gen. Cap. II.* habetur : *Et homo non erat , qui operaretur terram* , quibus sua constare veritas non potest, si praeadamitas homines tunc fuisse creatos fingatur. Habetur amplius, Adamum primum rebus omnibus houfina imposuisse : *et omne , quod vocavit Adam animae viventis ipsum esse nomen eius.* Quid quod Eva mater cunctorum viventium dicitur *Genes. Cap. III. 20.* Ut vero ex Genesi solvam , innumera in aliis Scripturarum libris testimonia supersunt , quae neque interpretatione , neque minimo indigent glossemate. Huiusmodi est illud Sapientiae *Cap. X. 1.* de Adamo : *Haec ( sapientia ) illum qui primus formatus est a Deo , pater orbis terrarum , quum solus esset creatus , custodivit.* Nec minus illustre est Apostoli effatum *Act. XVII. 26.* *Fecitque ( Deus ) ex uno omne genus hominum inhabitare super universam faciem terrae.* Re enim vera Gentium regna , et principes post diluvium ( *Gen. X.* ) ortum duxisse narrantur ex Semo , Chamo , et Japhe-to filiis Noe , qui ad Adamum originem suam referebant. Quid reliqua persequar , quae tanta sunt , ut non sinant , nos diutius fabulae immorari ?

III. Opponat quantumlibet Peyrerius verba.

*Genes. IV. 2. fuit Abel pastor ovium, et Cain agricola, quum nulli essent homines, qui oves rapere possent. Opponat verba Dei ad Cain v. 6. cur concidit facies tua? nonne si bene egeris, recipies: sin autem male, statim in foribus peccatum aderit.*, ut si per fores heic tribunalia indigentur. Opponat verba Caini: *omnis qui invenerit me, occidet me*, quum a nullo illi timendum esset, non dum enim Adami multiplicata posteritas. Quid hisce tamen efficiet, nisi ut post tantam fabulam sibilent cuncti? Quod ad primum pertinet: gregibus non ideo tantum praesunt pastores, ut a furibus, et lupis custodiantur oves, sed ut ad salubria ducantur pascua, ut in caulas reducantur, ut lac emungatur, ut opportuno tempore tondeantur. Ad alterum: fores heic non sunt tribunalia; sed propriae conscientiae agitationes, quemadmodum ille de impiis dixit: *77*

*Nocte dieque suum gestant in pectore testem.*

Quid quod *70* in foribus metaphorica locutio est, sacris, profanisque Scriptoribus frequentissima. Hinc Judicium supremum *Marci XIII. 29.* dicitur in ostiis esse. Et in *Epist. Jacobi v. 9. Ecce Iudex ante ianuam adsistit.* Plutarchi vero notum est adagium: *febris est*

*in foribus.* Ad tertium: Abel occisus fertur anno a mundo condito CXXX. nam Abele occiso, Adam cognovit uxorem suam, quae peperit Seth, quod nonnisi eo anno contigit, dicente Scriptura: *Vixit Adam CXXX. annis, et genuit filium, vocavitque nomen ejus Seth.* Habebat itaque quos timeret Cain; timebat enim fratres, filios, ac nepotes suos, quos per CXXX. annorum intervallum ad multa centena millia multiplicatos fas est credere.

IV. Neque proinde id moveat quemquam, quod Moses enarrat ( Genes. IV. 17. ) *Et aedificavit Cain civitatem, vocavitque nomen eius ex nomine filii sui Henoch*, quasi urbem vel aedificare, vel communire civibus haud potuerit, si nulli praeter paternam familiam, quam deseruit, toto terrarum orbe homines essent. Sed quid opus alios, quam ex Adamo propagatos, homines comminisci, qui istam aedificarent, incolerentque civitatem? Sane ex chronologiae calculis exactioribus constat, positam a Caino civitatem anno ab orbe condito quingentesimo. Porro quis miretur quingentorum annorum spatium ab uno Adamo propagatum adeo genus humanum, ut esset unde constituerentur non civitas una, sed innumerae? Rem Scripturis evincam. Per

annos non amplius quadringentos ex uno Abrahamo tanta ex foemore eius procreata est hebraicae gentis multitudo, ut in exitu populi de Aegypto sexcenta et amplius hominum millia numerati sint ( Exod. XII. ) qui, quod omnino stupendum, ex sola Iacobi linea propagati erant; sexcenta, inquam, millia hominum tractandis armis idonea, hoc est demptis mulieribus, pueris, senibus; demptis quoque Levitarum duobus supra viginti millibus ad Tabernaculi ministerium, ac custodiam excubantium. Si his omnibus adderes integram Idumaeorum gentem, quae ex ipso Abrahamo per Esau lineam ducebatur. Si, et superadderes Ismaelitas universos, qui ex Abrahami semine ex Agar ancilla sunt, procreati, quique regionem universam ab Euphrate ad mare rubrum occuparunt, profecto millies mille hominum millia, et eo amplius numeraremus ex uno Abrahamo per annos plus minus quadringentos. I nunc, et fabulatori Peyrerio, si potes, vel aures, vel stomachum accommodato.

V. Ne quid vero praeteriisse videamur, obijcit postremo Peyrerius Apostoli verba ad Rom. V. 13. *Usque ad legem peccatum erat in mundo; peccatum autem non imputabatur, quoniam lex non esset. Sed regnavit mors*

*ab Adam usque ad Mosem, etiam in eos, qui non peccaverunt in similitudinem praevaricationis Adae, qui est forma futuri. Quae sic interpretatur; usque ad legem (nimirum Adamo datam, peccatum erat in mundo erant ergo ante Adam homines peccatores). Resiste parumper! Parallelos Apostoli locos habemus plurimos; quibus quomodo de lege loquitur, nonnisi in Mosaicam omnino interdicit; quod ubi advertas, exsufflata est difficultas (2). Igitur hic Apostoli sensus: Ab Adamo usque ad Mosem peccatum erat in mundo, tametsi nonnulla actualia ante legem Mosaicam minus imputabantur, ex defectu perfectae cognitionis legis naturae, unde Apostolus idem VII. 7. *peccatum non cognovi*,*

---

(2) Ad Rom. X. 4. *Finis legis Christus, ad iustitiam omni credenti. Moyses enim scripsit; quoniam iustitiam, quae ex lege est, qui fecerit homo, vivet in ea.* Ad Galatas III. 17. *Quid igitur lex? Propter transgressionem posita est, donec veniret semen, cui promiserat, ordinata per Angelos in manu Mediatoris.* Et vers. 24. *Itaque lex Paedagogus noster fuit in Christo, ut ex fide iustificemur.* Cuiusmodi exempla patent *Matth. V. 17. XXII. 36. 40. Lucae XVI. 16. Ioan. I. 17. VII. 19.* Quae legem absolute dictam, non aliam a Mosaica intelligi abunde probant.



*nisi per legem, nam concupiscentiam nesciebam, nisi lex diceret: non concupisces.*

VI. Scio Peyrerium ex profana maxime historia praesidium fabulae adscivisse; siquidem Chaldaei, Aegyptii, Aethiopes, Scythae, Babylones, Sinenses, Americani, multa annorum millia ante Adami formationem numerant, ut ex Diodoro Siculo constat, et Herodoto. Verum satin quis sanus mentis, aut animi, qui istarum gentium epochas non puras putas chimaeras habeat (3), tum e fidelioribus ejusdem profanae historiae monumentis, tum ex artibus, nonnisi post Adamum excogitatis, quem ante ne nomina quidem animantibus erant; tum demum e Mose

---

(3) Audiatur Tullius adversus Chaldaeorum supputationes *lib. I. de Divinat. Cap. XIX. Condemnemus hos aut stultitiae, aut vanitatis, aut impudentiae, qui CCCCLXX. millia annorum, ut ipsi dicunt, monumentis comprehensa continent.* Idem dicas de Aegyptiis, Sinensibus, aliisque Populis. Confer hanc in rem Cyrillum Alexandrinum *Lib. I. contra Julian.* Ubi in profanae historiae monumentis summa eruditione versatur. Addas Calmetum *Chronolg. Aegyptior.* itemq. Stephanum Formontium in *Aninadvers. Critic. ad Hist. Chaldaeorum, Hebraeorum, Phoenicium, Graecorum cet. usque ad Cyrum Parisiis 1735.*

ipso , nec hominem , nec annorum periodum ante Adamum admitti sinente (4)? *Frustra* ( inquit Augustinus *Lib. XVIII. Cap. XL. de Civ. Dei* ) *garriunt quidam , ex quo rationem siderum comprehendit Aegyptus amplius quam centum annorum millia numerari. Quibus refutatis , ex eo quod Isis a qua litteras illi didicerunt , Patriarchis posterior fuerit , haec e vestigio addit : Quum ab ipso primo homine , qui est appellatus Adam , non dum sex millia annorum compleantur , quo modo non isti ridendi potius , quam refellendi sunt , qui de spatio temporum tam diversa , et huic exploratae veritati tam contraria persuadere conantur ? Cui enim melius narranti praeterita credimus , quam qui etiam futura praedixit , quae praesentia iam videmus.*

VII. Haud autem nova , ut hoc etiam postremo moneam , Praeadamitica est insania , quae et in libro Cazrai occurrit , ubi Judaeus

---

(4) Volterius ipse se tenere non potuit quin in *Philos. Hist. Cap. XVII.* testaretur , in Rituali veterum Brachmanorum , primum hominem dici *Adimum* , primamque feminam *Procritem* , quod Brachmanica lingua tantumdem est ac latinis *Vita* ; quemadmodum et Hebraice *Eva* nonnisi *Vitam* sonat. Supervacaneum duco huiusmodi monumentis morari.

auctor aedificia quaedam apud Indos ante centum annorum millia memorat, et ex vetustis monumentis, nescio quos Jambuzar, Zagrith, et Roanum homines videlicet Adamo antiquiores obtendit, Ex quibus Jambuzar (hunc vero Rabbi Maimonides in More Nevochim Tambuscam adpellat) qui Adami in litteris institutor praedicatur. Nimirum ex hac fabula non praeadamitae tantum obtruduntur; sed quod longe absurdius, ipse Adam ab aliis hominibus et genitus, et institutus. *cet.* Non diversa somniat Rabbi Abrar ex Japhar Turcici generis homine. Sed sit demum finis ineptissimis nugis, quas vel etiam deridere profecto pudet,

## SECTIO II.

*Homo quatenus κατ' εἰκόνα secundum imaginem Dei factus dicatur. Graecorum, Latinorumque Patrum sententiae expenduntur.*

I. **I**am vero illud accuratissime nunc perscrutandum mihi est, quaenam illa Dei imago sit, ad cuius rationem Deus hominem effecerit,

de qua clarissimos quosque Patres , ac Theologos certantes adhuc , variasque distractos in partes video. Neque tamen pugnam heic cum Audio , eiusque sectatoribus ineam , qui quippe corporeum statuerint Deum , aut saltem corpoream in effigendō homine assumpsisse figuram putarint , non alibi quam in humano corpore Divinam imaginem depictam adseverabant (5). Etenim adversus crassam intolerandamque istorum depravationem universa stetit antiquitas , nec in praesenti iuvat in refutandis fabulis tempus , operamque consumere.

II. Porro quamvis ex veracissima ratione , ex Scripturarum auctoritate , et Maiorum perpetua traditione compertissimum sit , et apud omnes confessum , non in exteriori homine

---

(5) Non parum abluisse Eugubinus videtur in *Cosmopoeia* : *Accessit filius* , inquit , *ac Verbum Dei ad creationem humanam , in forma , imagine , habituque humano , gerens speciosissimam , divinisissimamque formam*. Satis est quod Eugubinus veteres omnes Patres contrarios habeat , qui adversus Judaeos , et haereticos *to faciamus hominem ad imaginem , et similitudinem nostram* non Filio tantum , sed toti Trinitati vindicarunt. Quid quod non in carne , sed in interiori homine ista imago quaerenda , ut infra dicendum.

Divinam imaginem collocandam, sed in eo quod interius est, nec in sensus incurrit; qua tamen mentis in parte illa potissimum sit posita, hand ita facile statuas. Sane Clemens Alexandrinus *Lib. II. Strom.* imaginem, et similitudineru hanc nonnisi in ratione, intelligentiaque positam vult, quod eo convenientius puto, quod Verbum ipsum, quae Patris imago propria, et primigenia est, cognitione producitur; et ad mentem, atque intelligentiam praecipue spectat. Quid quod rebus omnibus, quas habet homo, excussis, non alio ceteris animantibus praestare illum videas, quam intellectu. Atque haec quidem Sanctissimi Hipponensis Pontificis Augustini expressissima sententia est (*Tract. III. in Ioan.*) *Non distas a pecore, nisi intellectu. Noli aliunde gloriari. Unde ergo melior es? Ex imagine Dei. Ubi imago Dei? in mente, in intellectu.*

III. In eandem porro imaginis rationem conveniunt Gregorius Nyssenus, Cyrillus, Damascenus, atque Ambrosius (6), nisi quod

---

(6) Nyssenus *Lib. de hom. opif. Cap. IV.*, et *Orat. Catech. XVI. Cap. V.* Cyrillus Alexandrinus *Lib. IX. in Joannem*; Damascenus *Eib. II. de fide Orthodoxa*; Ambrosius *Lib. VI. in Hexaëmer. cap. VIII.*

non in una intelligentia, sed et in libere quidvis eligendi facultate positam illam existimant. Tertullianus vero in libero tantum arbitrio hominem ad imaginem Dei ratus est, signatum: *Liberum* ( inquit *Lib. II. contra Marcion.* ) *et sui arbitrii, et suae potestatis invenio hominem a Deo institutum, nullam magis imaginem, et similitudinem Dei in illo animadvertens, quam eiusmodi stultae formam. Neque enim facie, et corporalibus lineis, tam variis in genere humano, ad uniformem Deum expressus est: sed in ea substantia, quam ab ipso Deo traxit, id est animae, ad formam Dei spondentis, et arbitrii sui, libertate, et potestate signatus est.*

IV. Sunt tamen qui hanc in homine Divinam imaginem, similitudinemque in virtute malint sitam. Ita Chrysostomus in Homilia de hoc argumento; a quo non dissentit Severianus Gabalorum Episcopus *Hom. V. in Hexaemer.* qui sanctitatem, et iustitiam, huiusmodi censuit imaginem: *Quid est secundam imaginem? Deus est sanctus. Si nos sancti sumus, ad imaginem Dei sumus. Deus est iustus. Si iustitiam persequimur, imago sumus Dei.* In eandem sententiam scripsit etiam Ambrosius in *Psalm. CVIII.* Quin et ante Severianum Beati Patres Irenaeus, et

Cyprianus (7) id ipsum statuisse videntur. Quo et illud Apostoli ad Ephesios *IV.* adducunt: *Renovamini spiritu mentis vestrae, et induite vos novum hominem, qui secundum Deum creatus est in iustitia, et sanctitate veritatis; et ad Colos. III. Renovatur in agnitionem Dei secundum imaginem eius, qui creavit illum.* Quo et spectare mihi videtur Cyrillus Alexandrinus *Thes. lib. XXXIV.* qui imaginem Dei nonnisi Spiritus Sancti communicationem interpretatur. Ideoque amissam per protoparentis peccatum imaginem, ab Christo restitutam, infuso Spiritu sancto, plerique ex antiquis inculcant.

V. Sed quod Plato in Phaedone scripsit, animam nostram similem Deo esse, quod immortalis sit, nonnulli ex Patribus sunt adprimum sequuti. Primus, nisi magnopere fallor, Maximus Martyr id docuit *Cent. III. cap. XXV. ad imaginem quidem tamquam existentis existens, et semper existentis semper existens; ut quamvis non absque initio talis sit, tamen sine fine sit.* Fortasse et huc Au-

---

(7) Irenaeus *Lib. V.* Cyprianus *Tract. de hab. Virg.* Quibus addas Theodoretum *Dial. II.* Gelasium Cyzicenum in *Actis Nicaen. Synod.* et Rupertum *Lib. VI. de Glor. Trinit.*

gustinus respexit ( *Quaest. XXXIII. in lib. Num.* ) nullibi nostrae animae immortalitatem splendidius in veteri Testamento haberi adfirmans , quam in lege Mosis.

VI. Alios autem videas , qui in eo hanc imaginem statuunt , quod omnibus animantibus homo dominetur , et principatum inter sensiles creaturas teneat. Quod item et Plato in Phaedone tradidit , et pluribus suavit Chrysostomus tum alibi , tum disertissime *Homil. X. in Genes.* Quocum consentientes multam Patrum cohortem habemus , in primis vero Clementem Romanum , Gregorium Nyssenum , Diodorum Tarsensem , Theodoretum , Isidorum Pelusiotam , Marium Victorem , et qui hos edocuit Origenes (8).

VII. Adductas autem usque adhuc Patrum sententias Prudentius una coegit in *Apotheosi*:

*Est similis seclis quod non consumitur ullis  
Quod sapiens , justique capax , reginaque  
rerum*

*Imperat , ante videt , perpendit , praecavet ,  
instat ,*

---

(8) Clemens Rom. apud Damascen. *Eclog. cap. I.* Nyssenus *Lib. de opif. Hom.* Diodorus Tharsensis apud Theodoretum *Quaest. XX. in Genes.* Isidorus *Lib. III. Ep. 95.* Marius Victor *Carm. lib. I.*



*Verborum , morumque opifex , instructaque  
mille*

*Artibus , et caelum sensu percurrere docta*

*His animam similem sibi Conditor effigavit.*

Sed vero illud non praetereundum , universas has sententias de Dei imagine in homine , tametsi diversas , *ex τῷ ἀρχαῖῳ in principatu* hominis simul includi. Quemadmodum enim ( inquit Gregorius Nyssenus *Lib. de homin. Opif. Cap. IV.* ) *in vita hac artifices instrumentum ea forma moliuntur , quae usui sit apta : ita veluti vas quoddam ad regni administrationem idoneum , naturam nostram praestantissimus fabricavit artifex : ac tum animae dotibus , tum figura ipsa corporis , talem designavit hominem , ut ad Regnum esset aptissimus.* Proinde igitur animam nostram libero arbitrio decoravit , quod erat regiae dignitati congruens ; tum sanctitate , iustitia , immortalitate , ac virtutum omnium splendore vestivit , tamquam purpura.

VIII. Ego vero , ut quid sentiam postremo facili ingenuitate dicam , secus rem componendam duco. Utique non dicitur faciam hominem ad imaginem meam , sed *faciamus hominem ad imaginem nostram* , vel ideo ut intelligamus , non ad unius Personae , sed ad totius Trinitatis imaginem factum hominem

esse (9). Inspiciamus igitur parumper mentem humanam, et videamus, an in eius natura, quae una est, ternio aliquis insit, quo Divinam referat Triadem. Quem ubi tandem comperiemus, peractum negotium erit, idque detegisse dicemus, quod in homine est *xar' εικονα secundum imaginem Dei*. Nihil quidquam autem nobis erit in eo laborandum, quod multa oratione prosequuti sumus in primo capite superioris libri de Sanctissimae Trinitatis Mysterio, ex quo haud multa huc transferam. Deus unus est, et semper, ubique totus est, omniaque vivificat, movet, et gubernat. Vis et imaginem Dei in anima? Anima unius est naturae (verbis utor Ambrosii *Lib. de dignit. Condition. human. Cap. XI.*), et ubique tota in suo corpore viget, illudque vivificat, movet, et gubernat. Item: Deus unus est, et tamen tres sunt Personae: Deus Pater; Deus Filius, Deus Spiritus Sanctus, ita anima unius est naturae, et tres habet dignitates *intellectum, voluntatem, et memoriam*. Et sicut ex Patre generatur Filius, et ex Patre Filioque procedit Spiritus Sanctus;

---

(9) Ita Patres quotquot. Conferas et quae supra in hunc locum diximus *Lib. II. de SS. Trinitatis Myster. Cap. II. pag. 25. et seq.*

ita ex intellectu generatur voluntas , et ex his item ambobus procedit memoria. Et sicut Deus Pater , Deus Filius , Deus Spiritus Sanctus est , non tamen tres Dii sunt : sed unus Deus tres habens personas : ita et anima intellectus , anima voluntas , anima memoria , non tamen tres animae in uno corpore , sed una anima tres habens dignitates. Hem qui praeclarissimus ternio in anima nostra ! ut quid amplius quaeramus , unde Dei imaginem gerat noster interior homo ? exquisitissimam habes inaginem , habes et in ipsa sua natura !

IX. Vide quantum ex Ambrosio profecimus! Sed nisi in longum iret oratio , Augustinus hęc etiam esset audiendus , cujus de Trinitate *libri IX. XI. et XIV.* toti ferme sunt ejus argumenti. Nihil autem expressius , luculentiusque , quam quod idem Augustinus *Lib. XIII. Conf. Cap. XII.* in eam adfert sententiam , ubi tria haec ESSE , NOSSE , VELLE verissimam in homine putat Trinitatis imaginem , quem locum integrum supra produxi (10).

X. Atque hanc quidem Dei imaginem in homine vel ideo constantissime teneo , quod

---

(10) Videsis nostras *Theologiae Dogmaticae Lectiones Lib. II. cap. I. pag. 20.*

in se facile amplectitur universas Patrum sententias, quas supra exposui. I. ut enim omni ex parte interior homo Archetypo similem gerat imaginem, oportet sane, ut et suae potestatis sit, liberique arbitrii; nam Regnantis, ac Dominantis naturae qui tandem imago dici posset illa, quae necessitatis legibus adstricta serviret? Quid quod qui intellectum, et voluntatem habet, habet certe liberum arbitrium. II. huc referas et hominis dominatum in cetera animantia, nam ut Thomas inquit per *intellectum*, et *voluntatem*, cujus utriusque facultas *liberum arbitrium* dicitur, dominium habetur. Et suffragatur Augustinus ( *Lib. I. de Gen. contra Manich.* ) *Omnia animalia cetera subiecta sunt homini, non propter corpus, sed propter intellectum, quem nos habemus, et illa non habent.* Ad nativam hanc imaginis proprietatem in homine, sive ad *intellectum*, et *voluntatem* pertinent Sanctitas, Iustitia, Immortalitas, veluti ornamenta quaedam, et complementa similitudinis cum Archetypo. Nam *humana natura* ( ut diserte inquit Nyssenus *L. b. de hom. Opif.* ) *loco purpurae virtute est amicta: quae est omnium maxime regia vestis: pro sceptro vero immortalitatis beatitudine fulcitur: ac pro diademate corona iustitiae eum exornat.*

## S E C T I O III.

*Hominis beatitas in primaevo innocentis naturae statu explicatur. Plura de illius immortalitate indagantur, atque expenduntur.*

I. **Q**uibus donis, dotibusque humani generis auctores auxerit Deus, atque beatissima quantum primaeva ipsorum conditio fuerit, ecquis unquam pro dignitate satis dicere poterit? Equidem non longiori utar disputatione in huiusmodi tractando argumento, quod antiqui Patres praeclare diffuseque explicarunt. Tantum, quae nactus fuerit privilegia primus hominum et parens, et caput, sive in corpore, sive in anima, numerando, et, ut verius dicam, epitomando percurram.

II. Primum autem protoparentis donum *Rectitudo, integritasque naturae* erat, qua caro Spiritui, Spiritus Deo subdebatur (11); pro-

---

(11) Atque haec illa est originalis iustitia, quam ab origine homo habuit, atque in posteros transfudisset, nisi ejus iacturam peccando passus esset. Hanc vero naturae non debitam multis evincit Au-

indeque *Sanctitas* ; quemadmodum enim pluribus Hipponensis Pontifex docet , citra sanctificantem gr̃atiam nulla poterat esse integritas. Quod et Tridentini Concilii Patres statuerunt *Sess. V. Can. I. Si quis non constitetur , primum hominem Adam , quum mandatum Dei in Paradiso fuisset transgressus , statim sanctitatem , et iustitiam , in qua constitutus (12) fuerat , amisisse , anathema sit.*

---

gustinus *Lib. XIII de Civit. Dei* ; tum et Thomas *Quaest. 93.* Merito hinc S. Pius V. et Gregorius XIII. propositionem illam inter Baianas proscripserunt : *Integritas primae conditionis non fuit indebita humanae naturae exaltatio , sed naturalis ejus conditio.*

(12) Fuerit ne Adam in hac gratia conditus , an demum post creationem fuerit haec illi infusa , quaestio est , quam teste Eminentissimo Cardinali Pallavicino *Hist. Conc. Trident. Lib. VII. cap. VIII.* Sancta Synodus definire noluit. Certe enim Scotistae tum demum gratiam infusam docent , quum homo in Paradisum est translatus : quae causa fuit , ut Tridentini Patres pro *conditus* substituerint *constitutus*. Primam tamen sententiam strenuo propugnarunt Augustinus , et Thomas , videturque magis consentanea verbis *Ecclesiast. VII. 30.* quod fecerit Deus hominem rectum. In eo enim rectitudo maxime sita erat , ut anima subiaceret

III. Porro ad hanc primaevam hominis rectitudinem spectat immunitas a concupiscentia, quam praefracte adversus Pelagianos vindicavit Augustinus *Lib. II. de pec. mer. et remis.* » Quamvis enim ( verba sunt Augustini ) corpus animale gestarent, nihil inobediens in illo adversum se moveri sentiebant. Faciebat quippe hoc ordo iustitiae, » ut quia eorum anima famulum corpus a Deo » acceperat, sicut ipsa eidem Domino suo, » ita et illi corpus eius obediret, atque exhiberet vitae illi congruum sine ulla resistencia famulatum ». Quo fit, primis parentibus non fuisse innatum propriae excellentiae amorem, ac nonnisi exterius fuisse tentatos. At ubi semel per inobedientiam humana mens Dei iugum excussit, caro adversus spiritum rebellavit, unde et erubescencia in eis exorta : *Iniustum enim erat ( cum eodem Augustino dicam ) Lib. I. de nupt. et concup. ) ut ei, qui non obtemperaverat Domino suo, obtemperaretur a servo suo, idest a corpore suo.*

IV. Succedit alterum primi hominis donum cumulatissima rerum scientia, quas temporis

---

Deo, non secundum naturam tantum, sed praecipue secundum supernaturale donum gratiae.

processu discere sua debuisset sollertia (13) ; quo ceu fonte immunitas ab errore manabat. Quamvis enim non omnia nosset , assensum tamen in iis quae ignoraret , facile cohibebat. Diserte hinc Augustinus *Lib. III. de Lib. arb. XVIII. adprobare falsa pro veris , ut erret invitus , non est natura instituti hominis , sed poena damnati*. Ex quo pronum est intelligere , Adamum transgredientem non fuisse deceptum , sed coniugi ultro obsequutum ; Evam vero deceptam quidem ( namque ait :

---

(13) Hinc Pythagoras illum omnium sapientissimum dixit , qui nomina rebus indidit primis. Cumulatam vero sapientiam homini perfecto nemo negabit , modo per uasum habeat , ignorance , maiorum omnium pessimum esse malum. Sunt vero qui ultra fines omnes Adami extendunt sapientiam , sic ut vix aliquid ignoraverit. Eximium logicum illum praedicant Sfruvius *Rudim. logic. Hebraeor.* et Kochlus *Increm. Polhist. logic.* Egregium geometram , astronomum , chymicum , medicum Kircherus *Ar dip. Aegypt. vol. II. clas. II. cap. 1.* Rerum omnium scientissimum Mersennus in *Genes. cap. II vers. 20. Quaest. XXIX.* et Lambecius *Prodrom. Hist. litt. lib. I. cap. I.* Qui plura aveat , conferat Bergium *Philos. antediluv.* Goedingum *de gem. philos. natalib.* Toerrerus *de philosoph. Adami.* Feverlinum *lib. de Adam. philos.* et Maderum *de Adam. logic.*



*serpens decepit me* ) sed eius deceptioni peccatum internae elationis praecessisse, Augustinus auctor est *Lib. XI. de Gen. ad litter.*

V. Longe praeclarum et innocentis naturae donum *Immortalitas* erat. Numquam enim visurum mortem primum hominem, nisi peccasset, Catholica Ecclesia constantissime fatetur. Cuius dogmatis auctoritas Scripturis innititur. Scriptum est enim *Sap. 11. Deus fecit hominem inexterminabilem* ( Graece ad incorruptibilitatem ) *invidia autem diaboli mors introivit in orbem terrarum.* Et Apostolus ad *Rom. V. 12. Per unum hominem peccatum in hunc mundum intravit, et per peccatum mors; et ita in omnes homines mors pertransiit, in quo omnes peccaverunt.* Quod demum ipsa Dei interminatio aperte insinuat *Gen. 11, in quocumque die comederis ex eo, morte morieris.* Egregie Marius Victor *Lib. II. in Gen.*

*Tali lege data ratio docet optima, quod non Mortalem Deus in primaevo tempore fecit Primum hominem: quin ille sibi mortem attulit ultro.*

Id quod Augustinus adversus Pelagianos contentione(14) quanta maxima propugnabat, quip-

---

(14) Conferas praeter *loc. cit.* et *Lib. VI.*

pe qui Adamum, vel si non peccasset, futurum fuisse mortalem docebant, atque hac de re in Africana Synodo damnati, mox et in Tridentina Ses. VI. Can. 1. de Peccato Orig. (15).

---

*de Genes. ad litter. et lib. XIII. de Civit. Dei cap. XV. ex quo non piget pauca huc transferre: Unde constat inter Christianos veraciter Catholicam tenentes fidem, etiam ipsam nobis corporis mortem, non naturae lege, qua nullam mortem homini Deus fecit: sed merito inflictam esse peccati: quoniam peccatum vindicans Deus dixit homini, in quo tunc omnes eramus, Terra es, et in terram ibis.*

(15) Conceptis verbis primum Canonem habes ex iis, qui sub Mylevitanae Synodi nomine editi sunt: *Placuit, ut quicumque dicit, Adam primum hominem mortalem factum, ita ut sive peccaret, sive non peccaret, moreretur in corpore, hoc est de corpore exiret, non peccati merito, sed necessitate naturae, anathema sit.* In eundem sensum scripsere Africani Patres in Sardinia exules apud Fulgentium Lib. de Incarnat. Cap. XIV. Tum et sequiora Concilia, ac demum Tridentinum Oecumenicum loc. sup. cit. *Si quis non confitetur, Adam, cum mandatum Dei fuisset transgressus, incurrisse per offensam praevaricationis huiusmodi iram, et indignationem Dei, atque adeo mortem, quam antea illi comminatus fuerat Deus, anathema sit.*

VI. Non minus detestanda illorum pravit-  
tas videtur ex adverso statuentium, Adamum  
plena immortalitate donatum, qualem et Chri-  
stus in corpore post resurrectionem habuit, et  
beati omnes in fine rerum sunt adepturi. Fir-  
mus, et adversus tale hoc opinamentum stetit  
Augustinus (16), cuius celebris illa sententia  
est *Lib. de Corrept. et Grat. Cap. XII. Pri-  
ma immortalitas (Adami) erat posse non  
mori, novissima (beatorum) erit non posse  
mori*. Quod diserte explicat *Lib. de Gen. ad  
Litter. Cap. XXI. Illud (Adami corpus)  
ante peccatum et mortale secundum aliam,  
et immortale secundum aliam causam dici  
poterat: idest mortale, quia poterat mori,  
immortale quia poterat non mori. Mortalis  
ergo erat primus homo conditione corporis  
animalis, immortalis autem beneficio condito-  
ris. Si enim corpus animale, utique morta-  
le: quia et mori poterat: quamvis et immor-  
tale ideo quia et non mori poterat* (17). Un-

---

(16) Legesis quae hanc in rem Augustinus  
confert *Lib. VI. de Gen. ad lit. cap. XX. et  
Lib. 1. de pec. merit. et rem. cap. III.*

(17) Hinc sane patet, quo sensu quibusdam  
placuit, Adami corpus, et immortale, et morta-  
le fuisse. Mortalis enim non is tantum dicitur,

de ex Augustini sententia Adami corpus animale, non spirituale erat, quin et cibo potuque indigebat duplici (18), vulgari quidem

qui reipsa moriturus est, sed qui etsi mortem numquam experiretur, tamen mori posset, nisi Dei cura peculiaris a morte eum vindicaret. Uno verbo. Immortalis Adam fuit actu, potestate vero mortalis.

(18) *Habebat* ( inquit Augustinus *Lib. I. de pec. mer. et rem. Cap. III.* ) quantum existimo et de lignorum fructibus refectionem contra defectionem, et de ligno vitae stabilitatem contra vetustatem. Qui locus nos probe monet, ut Genesis illud ex ligno Paradisi comede, de vero cibo et pastu homini, in beato illa innocentis vitae statu, necessario intelligamus, non vero de allegorico, quemadmodum multis placuit. Quam in rem, nequeo me continere quominus Augustini verba expressissima conferam *Lib. XIII. de Civit. Dei cap. XX.* *Licet morituri non essent primi parentes, nisi peccassent, alimentis tamen utebantur, nondum spiritualia, sed adhuc animalia corpora terrena gestantes, quae licet senio non veterascerent, ut adducerentur ad mortem, ( qui status eis de ligno vitae, quod in medio paradisi cum arbore vetita simul erat, mirabili Dei gratia praestabatur ) tamen alios sumebant cibos. Alebantur ergo aliis, quae sumebant, ne animalia corpora molestiae aliquid esuriendo, ac sitiendo sentirent. De ligno autem vitae propterea gustabatur, ne morte*

uno ad reficiendas vires ; altero ex ligno vitæ ad arcendam mortem.

VII. At vero ut paucis omnia conficiam ; gaudebat et primus homo immunitatem ab quavis animæ , corporisque miseria (19).

*eis undecumque subreperet , vel senectute confecti decursis temporum spatiis interirent ; tamquam cetera essent alimento , illud sacramento.*

(19) Gentilium Theologi sive ex traditione transmissum , sive ex Iudæorum memoriis edocti , primi hominis indolentiam , beatitatemque adpræme norunt. Unum producam Hesiodum *Æpyois* 116.

*Ac Deorum instar debebant securum animum habentes*

*Longe ab laboribus , et ærumna : neque molesta*

*Senectus aderat : semper vero pedibus , manibusque similes*

*Oblectabantur in conviviiis , extra mala omnia.*

*Moriebantur autem , velut comno domiti : ac bona omnia*

*Illis erant : et fructum ferebat fertilis tellus Sponte sua multum , et copiosum.*

Ubi ad Christiani dogmatis sensum exacta omnia vides ; nisi quod aurea ætate illa , quasi somno quodam suavissimo , sic morte ait extinctos. Huc et fortasse spectat quæ Homerus de insulæ Syriæ incolis canit *Od. O* 406.

*Illinc diræfames procul , et vis tabida morbi*

» Non enim ( inquit Maximus Martyr ad Tha-  
 » lassium scribens )moestitia, voluptas, appe-  
 » titio , et eiusmodi affectiones , quae hodie  
 » insunt humanae naturae, prius erant in ho-  
 » mine , sed propter amissionem perfectionis,  
 » postquam homo condemnatus est , furtim  
 » velut ingressae sunt ; parti naturae nostrae,  
 » magis aliquanto brutae adhaerescens » (20).

Hiis consonantissima scripsit Gregorius Nazi-  
 anzenus, itemque Chrysostomus , cuius locum  
 non heic praeteream. *Nec enim corpus ipsi-  
 us interitui obnoxium erat : sed instar aure-  
 ae statuae recens eductae de fornace , miri-  
 ficeque splendentis , ab omni corpus illud in-  
 teritu erat immune. Non illi molestus erat la-  
 bor ullus , non a sudore laedebatur , non in-  
 sidiabantur ei curae , non moerores ipsum op-  
 pugnabant , non sordes , non lacrimae , non  
 aliud quidquam eiusmodi affectionum vexabat.*

VIII. » Vivebat itaque homo ( Augustini

*Omnis abest , quae damna trahat mortalibus  
 aegris.*

(20) Unde Marius Victor *Lib. 1. in Gen.*

*Nec prorsum obnoxia morbis  
 Corpora gestabant. Non hos cogebat ad esum  
 Pausae ignara fames: qui si mandata supremi  
 Servassent integra Dei, crudelia mortis  
 Imperia , et diros nescissent usque dolores*

« verbis concludam *Lib. XIV. de Civit. Dei*  
 » *Cap. XXVI.* ) in paradiso sicut volebat ,  
 » quamdiu hoc volebat , quod Deus iusserat :  
 » vivebat fruens Deo , ex quo bono erat bo-  
 » nus : vivebat sine ulla egestate ; ita semper  
 » vivere habens in potestate. Cibus ade-  
 » rat , ne esuriret : lignum vitae , ne il-  
 » lum senecta dissolveret : nihil corruptionis  
 » in corpore , vel ex corpore ullas molestias  
 » ullis eius sensibus ingerebat. Nullus intrin-  
 » secus morbus : nullus ictus metuebatur ex-  
 » trinsecus. Summa in carne sanitas ; in anima  
 » tota tranquillitas. Sicut in Paradiso nullus  
 » aestus , aut frigus : ita in eius habitatore  
 » nulla ex cupiditate , vel timore accedebat  
 » bonae voluntatis offensio. Nihil omnino  
 » triste , nihil inaniter laetum , gaudium ve-  
 » rum perpetuabatur ex Deo , in quem fla-  
 » grabat caritas ex corde puro. Non lassitu-  
 » do fatigabat otiosum , non somnus preme-  
 » bat invitum » .

## S E C T I O IV.

*De Paradiso voluptatis nonnulla attin-  
guntur. Quid sit Eden. Septuagin-  
tavalis versio interpretatur.*

I. **H**is itaque donis dotibusque cumulatus Paradisum voluptatis, quem plantaverat a principio Deus, ingressus est homo. Sed aliquantisper consistamus hic, et quis iste locus fuerit disquiramus. Primum autem nihil Philonem morabor, a quo, ceu fonte, ut Photius scribit, allegorica interpretandae Scripturae ratio in Ecclesiam manavit, nec qui Philonem sequutus est, Origenem, qui allegorias per omnia somnians Divini Verbi maiestatem ad humani ingenii commenta deduxit. Unde quoad propositum nostrum pertinet, merito illum redarguit Hieronymus in *Epist. ad Pamachium*, quod sic Paradisum allegorizet ut historiae auferat veritatem, pro arboribus Angelos, pro fluminibus virtutes coelestes intelligens (21).

---

(21) Videsis et S. Epiphanium in *Ancorato*, nec non Methodium apud Epiphanium *Haeres. LXIV.*



II. Proprio igitur sensu, Paradisi nomine locus amoenissimus venit (22), quod sane Persicae originis vocabulum esse Pollux testatur, pluribusque suadent Xenophon, alique Graeci scriptores, quibus docemur apud Persas maximo in usu Paradisos fuisse. Porro Xenophontis παραδεισον Tullius interpretatur *agrum conseptum, ac diligenter constum*, quemque Gellius *Vivarium* dixit. Nec abludit vox Hebraica פֶּרֶדֶס *pardes* eadem notione pluries in veteri Testamento usurpata. (23) Nisi quod heic non *Pardes*, sed גַּן *Gan*, idest hortus, legitur.

---

(22) Hinc sane confictum ab Homero Alcinoi hortum nemo unus ignorat, quod et Sanctus Iustinus Martyr animadverterat in *Cohortatione ad Graecos*. Quid? si et Iovis hortum ex huius horti allegoria expresserit Plato? Rem sane haud inexploratam habuit Eusebius *Praep. Evang. Lib. XII. Cap. XI.* quem vide.

(23) Paradisi vocem ex Orientali *pardes* factam contendit Mazochius *Spic. Bibl.* in hunc Genesis locum, ubi et contra Vossium non eam esse vocem compositam adstruit, sed simplicem, et quidem ex Hebraico *parad* derivatam quod est *sejungere*, assumpto sibilo in fine ex Syri sermonis Chaldaei que ingenio. Quo fit eandem significationem constare voci *Pardes*, quam Mosaeicae loci huius *Gan*, tum et *Horto* latinorum.

III. Dicitur autem hortus iste **עדן** *Eden*, qua in voce longe plures video ambages. Quamvis enim *Eden voluptatem* significet, utrum tamen heic adpellative *voluptatem* (quod Aquila, Symmachus, Theodotio, et Hieronymus insinuant) an potius regionem aliquam designet, quae a voluptate adpellationem inveni-rit (ut ex LXX interpretibus constat) dubitatum fuit. Nisi quod Septuagintaviralis interpretatio potior cuivis videri debeat, quam et Graeci Patres sequuti sunt. Id quod et praeposito suadet regioni praefixa; satis enim inepta esset huiusmodi loquutio plantaverat hortum in voluptate? Ergo *Eden* regio est.

IV. Sed porro quid est, quod Paradisus plantatus dicatur *a principio*? Sane in Originali textu scriptum **קדם** *Kedem* quae cum *principium*. denotat, tum et *Orientem*. Unde factum, ut Septuaginta senes *Kedem* interpretati sint Orientem (23) **ἐκ τελευσεως κα-**

---

(23) Ea ex persuasione, quod Paradisus ad Orientem situs existimaretur, mos ille manavit, ut Christiani ad Orientem conversi Deum adorarent. Id adprime testantur Sanctus Cyrillus Hierosolymitanus *Catechesi Mystagogica I.* Sanctus Basilus *Lib. de Spiritu Sancto cap. XXVII.* Sanctus Gregorius Nyssenus *Oration. V. de Dominic. O-*

παρδισον εν εδεν κατ' ανατολης *plantaverat Paradisum in Eden in Oriente*. Latinus vero interpres *principium*, quemadmodum et Graeci interpretes Symmachus *εκπρωτης*; Theodotio *εν πρωτοις*; Aquila *απ' αρχης*, Hieronymo teste in *Traditionibus Hebraicis*; quibus demum et Targum Onkelos adsentitur. Atque ista latina versio Augustino, Bedae, Ruperto, aliisque favet statuentibus, Paradisum die tertio positum; sic ut *to a principio* tantumdem valeat, ac *sub ipsum rerum exordium*, sive quando primum Deus, resecta terra, et aquis in sua receptacula compulsis, locum Paradiso constituit.

V. Porro huiusmodi in horto, praeter ceteras stirpes plantasque, duae potissimum nobiles consitae arbores erant, quarum una *scientiae boni, et mali dicta*, altera *vitae*. Atque illam quidem ab eventu ita nuncupatam arbitrantur Chrysostomus, Theodoretus, Basilius Seleuciensis, Severianus, Augustinus, quippe ab esu primi homines didicerunt, quid interesset inter obedientiae bonum, et inobedientiae malum, inter bonum, quo ante pec-

---

*ration. Gregentius in Disputat. cum Herbario Iudaeo, S. Ioannes Damascenus Lib. IV. de fide Orthodoxa cap. XIII.*

catum fruebantur, et malum in quod peccando incurrerant (24). At contra Josephus *Lib. I. Antiq. Judaic.* tum et Nemesius; ac Dama-

(24) Familiare id in Scripturis, nomina rebus imponere non ob insitam naturae vim facultatemque, sed ab eventu consecuto. In hunc modum (Genes. XXVI. 20.) *Puteus Calumniæ* adpellatur puteus ille, quem fodit Isaac, non quod iurgia ac inimicitias foveret puteus, sed quod *ibi iurgium fuit pastorum Geraræ, adversus pastores Isaac, dicentium: nostræ est aqua.* Eodem sensu *Puteus Iuramenti* est adpellatus (Genes. XXI. 32.), quem Abraham foderat, non eo certe quod iurasset puteus, sed quod circa puteum, cuius occasione paratæ Abrahamo erant ab Abimalecho insidiae, praestitum ab utroque esset iuramentum. Item *Castra* nuncupatur (Genes. XXXII. 2.) locus ex eo quod illic occurrentes sibi Angelos, et *Castra Dei* vidisset Iacob. Ex quibus satis intelleges, pari ratione *arborem scientiæ boni et mali* non ideo adpellatam, quod boni malique scientiam congenita sibi virtute largiri posset, sed quod eius esu, scientiæ boni, ac mali facta sit demonstratio, et fatale veritatis experimentum. Conferas, si commodum est, hanc in rem Chrysostomum *Hom.} VII. in Genes.* Theodoretum *Quaest. VII. in eundem librum.* Basilium Seleuciensem *Orat. II. de Adamo.* Severianum Gabalitanum *Orat. VI. de mundi opificio.* Augusti-

scenus hanc arbori naturalem vim a Creatore insitam crediderunt. Cuius autem generis arbor fuerit, nihil ad me pertinere arbitror. Scio equidem Theodoretum, Isidorum Pelusiotam, Procopium, et antiquorum plerosque *ficum* intellexisse, quod ex ea consuerint perizomata, unde et ficum stultitiae filiam Rabbini adpellant; Verumtamen Tostatus contrarium ex perizomatis elicit, incredibile ratus,

---

num *Lib. IV. de Civ. Dei Cap. XVII.* Rupertum *Lib. II. de Trinit.* Unum est atlamen quod repugnare fortasse videtur; nimirum *scientiae* arborem ita ea ipsa die nuncupatam, qua plantata est a Deo, antequam quidquam Adamo eiusque uxori ten'ator diabolus adpromitteret. Scriptum est enim (*Genes. II. 9.*) produxitque Dominus Deus de humo omne lignum pulchrum visu, et ad vescendum suave: lignum etiam vitae in medio paradisi, lignumque scientiae boni, et mali. Sed nulla hic ambages! Habes enim in Mosaico loco prolepsim sive *anticipationem*, eamque necessariam. Quum enim vetita arbor, per id tempus quo Genesis describeret Moses, illa dumtaxat dignosceretur nomenclatione, necesse ideo habuit, eandem eo quoque nomine designare dum illam a Deo creatam enarrat, tametsi id nominis post Adae peccatum obtinuisset. Atque id notius, quam ut multis demonstrare opus habeam.

infecta sibi arbore amiciri protoparentes voluisse.

VI. Altera est arbor vitae, ab effectu nuncupata, quod ad vitam in perpetuum, sive ad longissimum tempus producendam valeret, vi quadam divinitus accepta. Quae sane corporea adspectabilisque erat, simul et Sacramentalis. Sacramentum vero in eo intelligas, vel quod vi minime nativa, sed inspiratione salubritatis occulta efficeret vivacitatem; vel quod Christum, qui vita subsistens est, adumbrabat, quemalnodum in Apocalypsi: *Vincenti dabo edere de ligno vitae, quod est in Paradiso Dei mei.*

## CAPUT II.

## DE HOMINE IN PECCATUM LAPSO.

## SECTIO I.

*Divinum mandatum Adamo factum.*

*Illius per liberum arbitrium praevaricatio. Praevaricationis causa inquiritur. Plura de serpente seductore.*

I. **U**bi in paradisum inductus est homo , hoc illi praeceptum Dominus dedit : *Ex omni ligno paradisi comedes , de ligno autem scientiae boni , et mali ne comedas : in quacunque enim die comederis ex eo , morte morieris.* In quo Divinae Bonitatis specimen habes , qui hominem ab se de limo terrae creatum , non arduis neque pluribus oneraverat praeceptis , sed levissimum unum ad obedientiae salubritatem , ut se Dominum ostenderet , tantum adminiculaverat (25). At heu

---

(25) Haec una , atque omnium solidissima , Divini mandati causa ab antiquis Patribus ostentatur , ut primo homini meriti , atque virtutis suppeteret materia , obedientiae potissimum , et ut in

infelicissimus homo ! per liberum arbitrium Domini Creatoris sui mandatum abrumpens , de interdicto comedit fructu , plagamque in caput suum , atque in posteros omnes intulit acerbissimam,

---

ipso principio se Deo ac Domino subiectum homo sentiret. Quamobrem Tertullianus *Lib. contr. Iudaeos Cap. II.* primordiale hanc legem , quasi matricem omnium praeceptorum Dei adpellat. Longum autem hic loci esset Patrum omnium conglobare testimonia , quorum instar satis habeo alterum et alterum adponere. Ex Graecis ita disertissime Chrysostomus *Homilia XVI. in Genes.*

» Itaque parvo illo praecepto suum in ipsum do-  
 » minatum ei voluit ostendere. Quemadmodum e-  
 » nim munificus aliquis dominus aedes amplas , et  
 » magnificas cuipiam fruendas concedens , non  
 » iustum illarum pretium , sed eius exiguum par-  
 » ticulam vult accipere , ut et sibi dominii ius  
 » integrum servet , et usuarius iste certo sciat ,  
 » non se aedis esse dominum , sed illius benefi-  
 » cio , ac liberalitate utendam se eam accepisse.  
 » Sic Dominus noster , quum quidquid aspecta-  
 » bile est , homini commisisset , eique tum in pa-  
 » radiso domicilium , tum eius delicias ad fru-  
 » ctum animi tribuisset , ne paullatim animo in  
 » transversum abreptus , ista ipsa quae oculis cer-  
 » nuntur , per se , ac temere esse crederet , et  
 » supra dignitatis suae modulum de ipso sentiret,



II. Sed cui bono Deus legem illam tulerit Adamo, quam minime servaturum sciebat? sive, ut Manichaei aiebant. cur hominem fecerit, quem nosset peccaturum? Praeter autem inscrutabile Dei iudicium, quo opportune confugit Augustinus, hanc equidem adhiberem aptissimam responsionem. Sicut Deus sciebat, quod homo per tentationem in peccatum esset deiiciendus, ita sciebat etiam, quod per liberum arbitrium tentatori resistere poterat. Hoc enim humanae naturae conditio requirebat, ut propriae relinqueretur voluntati (26). Id quod Augustinus ipse incul-

---

» unius illi usum arboris interdixit ». Ex Latinis vero Augustinus Lib. I. contra adversarios legis » Cap. XIV. *A cuius cibo est homo prohibitus, ut obedientia commendaretur, quae maxima est virtus, et ut sic dixerim, omnium origo materque virtutum in ea natura, cui sic datum est arbitrium liberae voluntatis, ut eam tamen necesse sit vivere sub potestate melioris.* Vide et Tract. in Psalm. LXX. Et Lib. XII. de Civit. Dei Cap. XXI. Et Lib. VIII. de Genes. ad litter. Cap. XIII.

(26) In hunc modum Sanctus Thomas *Quaest.* 162. *art. I.* Sed conferendi in primis qui adversus Manichaeorum, Marcionitarum, ceterorumque eiusdem furfuris haereses commentaria ediderunt

cat *Lib. XI. de Gen. ad litt. Cap. IV. Non mihi videtur magnae laudis futurum fuisse hominem, si propterea posset bene vivere, quia nemo male vivere suaderet, cum et in natura, posse et in potestate haberet velle non consentire suadenti. Et iterum alibi: Sic enim factus est, ut si noluisset, non peccaret.*

III. Caussam igitur nefandissimi criminis investigantibus, non alia occurrit quam voluntas; aberant enim ab innocente homine concupiscentia, ignorantia, et si quae alia huiusmodi offendicula. Unde Augustinus *de Civ. Dei Lib. XIV. Cap. 13. in occulto primos homines malos esse coepisse, inquit, ut in apertam inobedientiam laberentur; non enim ad malum opus perveniretur, nisi praecessisset mala voluntas. Nec porro malae voluntatis originem aliam, quam superbiam fuisse in comperto est apud Patres (27), scri-*

---

Irenaeus, Tertullianus, Epiphanius, Augustinus. Omnino vero videsis Ambrosium *Lib. de Parad. cap. V. et seq.*, tum et Cyrillum *Lib. I. contr. Julian.*

(27) Fusius de eo Augustinus *Lib. XIV. de Civ. Dei Cap. 14.* Hinc et S. Thomas *Quaest. 163. art. I.* postquam de homine in statu innocentiae instituto egregie disputasset, atque nullam

ptum est enim *Ecclesiast. X. 15. Initium omnis peccati superbia est.* Et *Tobiae IV. 14. Superbiam nunquam in tuo sensu, aut in tuo verbo dominari permittas: IN IPSA ENIM INITIUM SUMPSIT OMNIS PERDITIO.* Quod plane ex iis quae cum externam praecesserunt inobedientiam, tum subsequuta sunt, proum est intelligere. Non enim ea naturae sublimitate contenti, qua ad imaginem Dei facti erant, adhuc in id amplius movebantur, ut supra naturae conditionem attolli possent, sicut Dii scientes bonum, et malum, in quo intollerabilem habes superbiam. Patratum vero crimen peior damnabiliorque sequuta est superbia. Non enim veniam, non medicinam implorarunt, sed frivola excusatione poenam declinaturos sperabant. Et Adam quidem in comparem suam refudit culpam: *Mulier quam dedisti mihi sociam, dedit mihi de ligno, et comedi.* Eva ex aduerso serpentem accusavit: *Serpens decepit me.*

---

tunc rebellionem carnis ad spiritum fuisse invictis argumentis evicisset, tandem concludit: *Unde restat, quod primum peccatum hominis fuit in hoc, quod appetit quoddam spirituale bonum supra suam mensuram quod pertinet ad superbiam. Unde manifestum est, quod primum peccatum primi hominis fuit superbia.*

IV. Quod vero ad externas delicti pertinet causas, nolim iis arborem adcenseri vetitam, ut quae mera occasio fuit, sed diabolum dumtaxat, cuius invidia mors introivit in orbem terrarum, quique homicida erat ab initio. Hunc autem merum serpentis simulacrum Evae oculis obiecissee Cyrillus arbitratur *Lib. III. contr. Iul.* Sed potior videtur Chrysostomi, Theodoreti, Augustini, et Damasceni (28) sententia, veri serpentis organo u-

---

(28) Facessat ergo Caietani opinatio, diabolum per internam tantum suggestionem mulieri imposuisse, atque serpentem metaphorice hic adpellari, ut Apoc. XII. 9. et XX. 2. *serpens antiquus*; nam tentationem ratione visibili institutam, peractamque omnino ac constanter teneo, neque in eo serpente simulatum quid vel praestigiosum extitisse, vel fallax quoddam phantasma, sed revera genuinum fuisse serpentem. Neque velim ego, ut quis vel parumper ex eo moveatur quod doctissimus quidam homo regerit; nimirum quod si de germano serpente ageretur, illius genus profecto Moses indicasset. Inscitiam sapit id; bona enim istius pace dicam, familiare hoc in adfini argumento latinis etiam scriptoribus esse. Ita Tullius *Lib. I. de divinat.* *Quum Sylla in agro Nolanq immolaret ante Praetorium, ab infima ara subito anguis emersit.* Et Val Max. *Lib. I. Cap.*

sum tunc fuisse diabolum adfirmantium. Nisi quod Augustinus , et qui eum sequi consueverunt Gregorius , Beda , Rupertus maledictionem in serpentem prolatam , ad solum

---

*VI Subito ab ima parte arae prolapsam anguem prospexit* Et quid ceteros moror. Porro autem nihil ad tentationem convenientius , quam ut diabolus serpentis adscisceret organum , quod genio suo exprimendo magis erat idoneum. I. Equidem ex eo quod humi serpat , perspicue nobis repraesentatur , Satanam e coelo eiectum , terrena tantum cogitare. II. Quod facile oculis se subducatur , clamque mordeat , id nobis antiqui serpentis insidias significat , quibus ex improvviso homines illaqueantur , ac lethali vulnere prius transfiguntur , quam eius senserint accessum. III. Serpentis lingua veneno est suffusa , ut sciamus metuendi quantum sint sermones pravi , quibus Satan corda hominum inficit. IV. Quemadmodum et eadem lingua est in extremitate bifurcata , et in aculeos discissa , ita fere est diaboli lingua flexiloqua semper , atque ex ea ambiguitate fallacissima. V. Serpentis corpus flexile est admodum , et variabile , ac modo repit , modo erigitur , contrahitur aliquando , distenditur alias , in arcus mox sinuatur , mox in seipsum complicatur ; eodem prorsus diabolo familiare est , et quasi ingenitum , ut omnia formarum genera induat ad varias tentationum suarum species variis hominum ingeniis adaptandas , im-

diabolum pertinere censuerunt, non vero ad serpentem, quem incredibile prope videtur suis antea pedibus gressum; postea vero repere toto pectore compulsus (29). Secus ac

---

mo et in Angelum quoque lucis sese aliquoties transformet, ut electos etiam in defectionem, si fieri possit, adducat. VI. Serpens est natura sua insidiosus et fallax, crudelis, homini inimicissimus, quae omnia Satanae apte conveniunt, cuius continuo perfidiam, crudelitatem, odiumque experimur inplacabile. VII. Est serpens prae omnibus terrae bestiis prudens; sed quae ista prudentia, si cum diaboli conferatur prudentia, quam Scriptura Sacra vafritiem, iniquitatis mysterium, et Satanae profunditates appellat? Sed nolo plura.

(29) Id eo explicat Theodoretus *Interrog. XXXIV. in Gen.* ut non tunc primum serpentes super terram poena reptare incoeperint, sed ut homines id videntes culpae primorum parentum recordarentur. Exemplum habes in Iride, quae quamvis naturale phaenomenon sit, post diluvium tamen constituta fuit in signum pacti Deum inter, et homines initi. Dicam ego amplius: tametsi repere serpenti aequae sit nativum, ac sit belluis incedere, natare piscibus, coelorumque avibus volare; versa tamen ob Dei maledictionem in supplicium natura, res facta est laboriosa, non secus ac o-

existimarunt Basilius, et Iosephus, quorum alter *Lib. I. antiq. Iudaic. Cap. I.* Deum, serpentis linguae voce adempta\*, venenum indidisse, pedibusque illum privasse tradit. Quidquid sit, non negaverim ego, nonnihil etiam maledictionis illius in anguem redundasse. Cuius rei documento est inimicitia, quam cum serpentibus continuo homines habent. Sed quid commeruit bellua, cur puniretur? Plane id non novum in Mosaica lege, quod bestiis rationis expertibus poena irrogetur (30).

---

peratio homini, partusque mulieri. Terrae enim cultura erat homini ab initio naturalis in ipsa sane Paradisi terrestri habitatione; sed quod absque labore ullo ante peccatum exequabatur, nunc cum labore multo operatur, panemque suum cum sudore vultus manducat. Ita et partus a natura feminae fuerat datus, sed ex peccato dolor additus a Deo. Id ipsum et in serpentem quadrat, cui serpere mox gravius, quam ab initio fuerat, quae ubi divina maledictione terra fuit percussa, pabuli alterius defectu eo adigitur aliquando, ut pulverem manducet.

(30) Facit huc Levitici illud XX. 15. *Qui cum iumento et pecore coierit, morte moriatur, pecus quoque occidite.* Nimirum tametsi inuocens sit bru-

V. Diabolum igitur per veri colubri fauces verba expressisse, non minus credibile est, quam quod per asinam Angelus sermones cum Balaamo miscuerit (31). At bellua loquente, nonne femina obstupescere debuisset (32)? Sane id cum Thoma potius arbitror

tum; Lex tamen et ipsum condemnat ut instrumentum. Ita et penna uri solet aliquando, quae ad falsum quid scribendum subserviit; non secus ac culter ad parricidium adhibitus. Corpus quoque cum anima patitur, quandoquidem membra illius instrumenta fuerunt iniquitatis. Nec absimile quod Iudas Apostolus precipit, ut odiosa sit vestis, quae carne est infecta. Eandem ob causam Deus mundum ultima die est pessumdaturus; licet enim inanimata peccati sint expertia, est tamen destructurus, eo quod et diaboli, et hominum iniquitate sunt contaminata.

(31) Notaverat id Augustinus *Lib. de Gen. ad litt. XI. Cap. XXVII.*

(32) Nonnisi ex hac historia id manavit quod Plato in *Politico*, et antiquorum plerique dixerunt, saeculo aureo homines cum bestiis colloquutos. An id verum arbitrabimur, quod femina nihil hac in re doli suspicata fuerit? Minus equidem adsentior Iosepho, Philoni, Basilio, et Ephremo, qui talia putarunt.



ego , animadvertisse quidem feminam , spiritum aliquem serpentis ore loquutum ; bonumne vero , an malum , susque , deque habuisse. Quam in sententiam eo libentius adducor , quod Evam quibusdam gradibus adiutum ante diabolo fecisse constat. Praecesserunt enim , ut paullo ante diximus , in illius mente nonnulla elatio , curiositas inde , tum caritatis frigusculum , animoque affusa nubecula , unde tam male affectam facile demum diabolus adgreditur (33).

---

(33) Hinc vero Gentiles multas detorsere fabulas. In primis vero sat decantata de pomis Hesperidum , ac dracone eorumdem custode fabella. Et ut Aegyptios , Indas , Graecos , Romanosque praeteream , quibus serpentes culti , adprime Chalcidius in *Timaeum* arboris vetitae , et insidiatoris colubri meminit. Quid quod in Graecorum mysteriis adclamatum *Eva* simulque monstratum serpentem , Plutarchus prodidit in *Alexandr.* Unde Demosthenes in *Orat. de Corona* Aeschinem eo accusat , quod serpentes , quos *parias* vocant , alidens , et supra caput efferens , et clamans *Evoc saboe* , mercedem pro istis muneribus capiebat. Quo et respexit Catullus.

*Evoc bacchantes , evoc capita inflectentes*

*Pars sese tortis serpentibus incingebant.*

Illustre et id quidem est , quod Clemens Alexan-

VI. Quod autem Apostolus inquit I. *ad Timoth.* II. 14. *Adam non est seductus, mulier autem seducta, in praevaricatione fuit*: plerique Patrum ita interpretantur, ut non primus ille a serpente seductus fuerit. Quem in sensum scripsisse mihi videtur Augustinus, non credidisse Adamum serpentis pollicitationibus ab uxore propositis, sed noluisse non obsequi compari suae, quacum sine querela vivere par ducebat. Quod et iterum *Lib. XI. de Gen. ad litt. Cap. XLII.* scite inculcat: » Adam, posteaquam de li-  
 » gno prohibito seducta mulier manducavit,  
 » eique dedit, ut simul ederent, noluit eam  
 » contristare; non quidem carnis victus con-  
 » cupiscentia, quam nondum senserat in re-  
 » sistente lege membrorum legi mentis suae;  
 » sed amicali quadam benevolentia, qua ple-  
 » rumque fit, ut offendatur Deus, ne homo  
 » ex amico fiat inimicus ».

---

drinus hanc in rem adfert in *Protreptico*: *Dionysium Maenolem Orgiis Bacchi celebrant coronati serpentibus, ululantes Evam, Evam, per quam omnigena in mundo mala sint consequuta.*

## S E C T I O II.

*Quanta uno in Adami crimine conglobata facinora. Ecquae poenae peccatum subsequutae fuerint. Justitiae originalis donum, quod sibi posterisque suis acceperat, an sibi posteriusque suis per peccatum amiserit. Originalis peccati ab Adamo in posteros transfusio Christianae Religionis fundamentum.*

I. **Q**ua qua parte patratum a primis parentibus facinus attendatur, omnino grave, et ultra quam vel cogitari, vel credi potest atrocissimum videtur. Nam et superbia est illic (verbis utor Augustini *Ench. Cap. XLV.*) quia homo in sua maluit esse, quam in Dei potestate; et sacrilegium, quia Deo non credidit; et homicidium, quia se posterosque suos praecipitavit in mortem, et fornicatio spiritalis, quia integritatem mentis humanae corrumpit, et furtum, quia cibum vetitum usurpavit, et avaritia, quia plus quam sufficere illi debuit, adpetivit. Adde curiositatem ex-

★

periundae virtutis occultae , dubitationem de praecepti sensu , gulam , inobedientiam , inanem admissi sceleris excusationem , et quid huiusmodi pestis ceteras moror deformitates ?

II. Tantum scelus debitae subsequutae sunt poenae. Mulieri dixit Deus *Gen. III. multiplicabo aerumnas tuas , et conceptus tuos ( Hebraice aerumnas conceptuum tuorum ) in dolore paries , et sub viri potestate eris , et ipse dominabitur tui. Adae vero dixit. Quia audisti vocem uxoris tuae , et comedisti de ligno , ex quo praeceperam tibi , ne comederes , maledicta terra in opere tuo , in laboribus comedes ex ea cunctis diebus vitae tuae : spinas et tribulos germinabit tibi , et comedes herbas terrae : in sudore vultus tui vesceris pane , donec revertaris in terram , de qua sumptus es , quia pulvis es , et in pulverem reverteris. Ita in corpore adflictum eiecit eum Dominus Deus de paradiso voluptatis.*

III. Longe tamen graviores plagas , aerumnasque in anima perpessus est infelix homo , sic ut Tridentina Synodo docente *Ses. V. Can. I.* totus per illam praevaricationis offensam secundum corpus , et animam in deterius commutatus fuerit. Nimirum iustitiam originalem , sive praecipuum illud eximiumque donum , quod gratiam , virtutesque com-

plectebatur omnes , et in quo rectus ab initio dicebatur , amisit. Cuius iacturae veluti consecraria fuerunt : concupiscentia carnis adversus spiritum , ut quemadmodum homo adversus Deum rebellaverit , ita pars animae inferior superioris imperio renueret obedire : nullae ad recte agendum vires : ignorantia , et tenebrae in intellectu ad cognoscendum verum : mors (34) demum prima , et secun-

---

(34) Quod vero ad mortem pertinet , illud heic probe investigandum , quo potius sensu Divinae legis sanctio , sive poenae comminatio accipienda : *in quocumque enim die comederis ex eo morte morieris*, non enim eodem die mortem primi parentes obierunt. Sane ex Augustini mente Homo per peccatum gratia sanctificante spoliatus , atque a Deo relictus , statim ab vetiti cibi esu mortuus est , non in corpore , sed in anima. Cui subscripserunt par Gregoriorum Nyssenus , et Magnus , Isidorus Pelusiota , alique Patrum. Nisi quod Apostolus ad Romanos V. 12. ubi *per peccatum mortem intrasse in mundum* inquit , nonnisi de morte corporis illam intellexisse comminationem videtur , cui omnes Adae posterii obnoxii facti sunt. Quid quod mortem corporis Deus ipse luculenter significat *Gen. III. 19. Pulvis es , et in pulverem reverteris*. Dicerem potius utramque mortem illa comminatione comprehendi ; id quod viderat Augustinus , *Lib. XIII. de Civ. Dei*

da ; *prima* mors , Augustinus inquit , animam volentem pellit a corpore , *secunda* mors animam nolentem tenet in corpore.

---

*Cap. XII. Quando ergo dixit Deus primo illi homini , quem in Paradiso constituerat , de cibo vetito : quacumque die ederitis ex eo , morte moriemini , non tantum primae mortis partem priorem , ubi anima privatur Deo , nec tantum posteriorem , ubi corpus privatur anima , nec solum ipsam totam primam , ubi anima , et a Deo , et a corpore separata punitur ; sed quidquid mortis est usque ad novissimam , quae secunda dicitur , qua est nulla posterior , comminatio illa complexa est. Sed iterum redit difficultas quoad corpus , quomodo nimirum ex Divina lege statim post peccatum mortuum fuerit. Sane ego illud existimo , eo quidem die quo facinus patrarunt , quo et mortis legem , qua in senium vergerent , acceperunt , mori coepisse. Ita quidem Chrysostomus Hom. XVII. in Genes. » Quamvis multorum annorum spatio vixerint , tamen ex quo audierunt illud : Terra es , et in terram redibis ; et sententiam mortis acceperunt , mortales facti sunt ; atque ex eo tempore illos esse mortuos , aliquis merito dixerit. Hoc vero Scriptura significans ita dixit : quacumque die comederitis , morte moriemini ; quasi diceret , sententiam hanc accipietis , ut mortales deinceps sitis » . In quem sensum expresse scripsit et Sanctus Hipponensis Episcopus Lib. I. de peccat.*

IV. Porro autem originalis iustitiae donum non sibi uni, sed universo hominum generi

merit. et remis. Cap. XVI. Id quod in humanis iudiciis passim videmus, ut qui capite damnantur, eo die mori dicantur, quo mortis pronunciata est sententia, tametsi damnationis exequutio differatur, diuque in carcere ferro constringantur. Unde Symmachi interpretatio, qui verba, *morte morieris*, interpretatur *mortalis eris*, quam S. Hieronymus *Lib. de tradit. Hebr.* adprime probavit, aptissima omnium mihi videtur, quamque tenuerunt Chrysostomus, Theodoretus, Augustinus, Prosper, et Fulgentius. Quod vero ad alteram pertinet quaestionem, utrum omnino mortis necessitate omnes urgeantur, an vero sub mundi finem sint aliqui sine morte ad immortalitatem transituri; prorsus intactam relinquo. Video Latinos in priorem sententiam propensiores, Graecorum vero plerosque in alteram. Nolo immisceri. Ut autem ad interpretationem *τοι morte morieris* revertar, addam et hoc: si Basilio ac Prospero eadem sic interpretantibus: *ad mortem quotidiana virium, et corporis defectione progredieris*, adsentiaris, haud contra ego stabo. Vitae enim huius principium (verba Prosperi sunt *Lib. II. de Vocat. Gent. Cap. VIII.*) mortis exordium est; nec prius incipit augeri aetas nostra, quam minui. Cui si quid adiicitur spatii temporalis, non ad hoc accedit, ut maneat, sed in hoc transit ut pereat. At modo subit in mentem insignis Gre-

acceperat Adam. In eo enim veluti humani generis capite posterorum omnium voluntates

gorii Nysseni locus in Oratione, quam habuit in funere Pulcheriae Augustae, quo sermonem hunc de divino praecepto mortem interminante opportune claudam. Nimirum mors poena peccati est; sed poena ipsa mortis, Deo indulgente, in magnum peccantis Adae posteritatisque eius versa est commodum; sic ut misericors Deus humanum genus ex labe illa sanaturus, et quae primorum parentum vitio erant amissa reparaturus, communis legis illius *morte morieris* gratiam facere noluerit. Hoc autem quidquid est commodi, quantivisque pretii ex Nysseno habeas, ex cuius verbis non parum solaminis accipio, dum haec inter lacrymas scribo ob carissimae matris iacturam, quae Deo vocante vitam hanc mortalem aerumnosissimam cum immortali commutavit VII. Kalendas Decembres huius anni MDCCCIII. Sed ad Gregorium Nyssenum redeo: » Nihil aliud, inquit, mors  
« est in hominibus, quam vitiositatis expiatio. Ele-  
» nim quum initio natura nostra tamquam vas  
» quoddam bonorum capax a Deo omnium con-  
» ditore procreata fuisset, ac hostis animarum no-  
» strarum malum in nos fraudolenter infudisset,  
» nec ideo locus amplius bono relictus esset; ob  
» hanc causam, ne insitum nobis vitium peren-  
» naret, meliori providentia, vas ad tempus mor-  
» te dissolvitur, ut, elapsa vitiositate, humana na-  
» tura reformetur, et ab omni labe sincera in vi-  
» tam pristinam instauretur. Hoc enim resurrectio



constituit Deus; ut si in accepta perseverasset iustitia, eandem, et posteri omnes cum anima ipsa in prima sui origine accepissent. Quocirca praeclaro illo dono a latronibus, Angelis scilicet noctis, et tenebrarum expoliatus, iustitiam quam sibi posterisque omnibus acceperat, sibi posterisque omnibus amisit. In illo enim omnes peccaverunt *quia omnes ille unus fuerunt*, ut loquitur Augustinus.

V. Atque peccatum istud originis per communem originem, seu propagationem in omnes homines ab illo, qui totius humani generis caput erat, derivari, atque transfundi, dogma fidei est (35). Quod mox ad-

---

» sibi vult, ut sit naturae nostrae priorem in statu restitutio. Quamobrem, si impossibile est, « naturam in melius instaurari sine resurrectione, » haec autem, nisi mors antecesserit, fieri non » possit; bona utique mors est, quae mutationis » in melius initium nobis sit et via. » Vide et Gregorium Nazianzenum *Hom. XLII*. Titum Bostrensem *Lib. II. contr. Man.* Macarium *Homil. XV*. Chrysostomum *Hom. XC*. Et Augustinum *Lib. II. de peccat. merit. et remis. Cap. XXXI*.

(35) Quidquid de Theodoro Mopsuesteno sit, qui primus, si Mario Mercatori fides, capitale hoc Christianae Religionis dogma oppugnavit; quidquid

versus Pelagianos accuratius ; ex utriusque Foederis tabulis , Patrumque perpetua traditione vindicabimus , siquidem in eo *Christianae Religionis summa , ejusque fundamenta* , ut Augustinus inquit , *consistunt*. Enimvero an medicum admittet , qui se sanum existimat ? aut redemptorem agnoscet , qui nescit se fuisse captivum ? Ut ergo sciamus quae , et quanta nobis Christus attulerit , prius noscāmus oportet quid in Adam amiserimus.

---

et de veteribus Gnosticis , et Manichaeis , de quibus conferatur Cl. Garnerius in *Dissert. de Pelag. Haeresi* , profecto Pelagius in eo labefactando dogmate adeo laboravit , ut ab eius nomine Pelagiana Haeresis passim audierit. Huius ( *Augustino teste Lib. de nat. et grat. Cap. VI.* ) duo erant veluti suprema capita , nimirum naturam hominum , neque in parvulis medico , quia sana est , neque in maioribus gratiae adiutorio egere , quia sibi sufficiens est ad iustitiam. Pelagio Coelestius accessit , mox et Iulianus Episcopus Eculanensis. Tametsi Catholicorum validissimis pressi argumentis Pelagiani eo posthac devenerint , ut mortem in mundum per Adami peccatum intrasse fassi sint , non vero peccatum ipsum. Ex quo absurdissimum illud consequebatur , poenam transisse sine culpa , et innocentes parvulos injusto supplicio puniri , trahendo mortem sine meritis mortis. Quod de u-

## S E C T I O III.

*Peccati Originalis in omnes homines  
transfusio ex Veteri Testamento e-  
vincitur.*

I. **E**rgo ut ex Veteris Testamenti tabulis ordiar, insignis est Psalmi quinquagesimi locus: *Ecce enim in iniquitatibus conceptus sum, et in peccatis concepit me mater mea.* Scilicet, inquit Ambrosius, *antequam nascimur, maculamur contagio, et ante usuram lucis, originis ipsius excipimus iniuriam, in iniquitate concipimur.* Quo invictissimo testimonio Pelagianos abunde exagitarunt Hiero-

---

no tantum Dei hominumque mediatore Christo Catholica fides novit, qui pro nobis mortem, peccati poenam, sine peccato subire dignatus est. Mitto dicere invictissime quantum tantae haereseis depravationi universa restiterit Ecclesia (qua de re vide quae infra adnotabimus) donec ubique tandem prostrata. Sed post Saeculum XVI. pugnam integrare Vlricus Zuvinglius in *Declar. de pec. orig.* tum et Socinus in *Prælect. Theolog.* commisi sunt. Quamobrem Tridentina Synodus antiquas Pelagianae haeresis damnationes confirmandas censuit.

nymus, et Augustinus, et qui hos subsequuti sunt Patres. Neque enim ullum omnino patet effugium abs eo, quem ante Pelagianam pestem nonnisi de originali iniquitate antiqui Patres acceperunt (36). Origenes quidem *Homil. VIII. in Leviticum* Psalmi verba expendens, *quaecumque*, inquit, *anima in carne nascitur, iniquitatis et peccati sorde polluitur* (37). Nec minus expresse S. Hilarius in *Ps. XCVIII. Scit homo sub peccati origine, et sub peccati lege se natum.*

II. Testimonium alterum ineluctabile ex libro Iobi habemus *Cap. XIV.* in quo ex septuagintavirali versione legitur: *Nemo mundus a sorde, nec infans, cujus est unius*

(36) In textu Hebraico expressius numero singulari legitur: *in iniquitate conceptus sum, et in peccato peperit me mater mea*; quemadmodum et S. Hieronymus vertit, consonatque versio Chaldaica, Siriaca, et Arabica. Ceterum pluralis pro singulari saepissime in Scripturis usurpatur, ut a libi adnotasse memini.

(37) Origenem hoc in dogmate orthodoxe sensisse, ponderosis argumentis ostendit Cl. Bossuetus in *Defense de la Tradition, et des saints Peres Lib. VIII. Cap. XXVIII.* Confersis et Daniele Huetium in *Origenianis Lib. II. cap. II.*

*diei vita super terram* (38). Quae enim ista immundities est, quae sordes ista, qua nascimur, nisi originalis labes? *Scriptura* (dixit inquit Origenes *Tom. VII. in Levit.*) *de illo qui nascitur pronunciat, quod non sit mundus a sorde, etiamsi unius diei sit vita ejus.* Urget et argumentum Augustinus *De Civ. Dei Lib. XX. cap. XXVI. Ex quo commissa praevaricationis causa, inde primi parentes dimissi sunt, atque humana in eis natura damnata est, excepto uno Mediatore, et post lavacrum regenerationis quibusque adhuc parvulis, nemo mundus a sorde, sicut scriptum est, nec infans, cujus est vita unius diei super terram.*

III. Quod ipsum lex ad Abraham data *Gen. Cap. XVII.* luculentissime adstruit: *Masculus cuius caro praeputii circumcisa non fuerit, peribit anima eius de populo suo, quia pactum meum irritum fecit;* qua veluti armatus Augustinus *Lib. de pec. orig. Cap. XXX.* iterum iterumque in Pelagianos irruit. *Quid enim peccati, quaeso, parvulus pro-*

---

(38) Hebraicus textus: *Quis detur mundus de immundo? non unus.* Vulgata vero: *quis potest facere mundum de immundo conceptum semine? nonne tu qui solus es?*

*pria voluntatae commisit, ut alio negligente, et eum non circumcidente, ipse damnetur damnatione tam severa, ut pereat anima illa de populo suo? Quid sibi ergo vult, pro nullo propriae voluntatis admissio tanta damnatio? nisi quia infans pertinet ad massam damnationis, et iuste, ex Adam natus, nisi inde fuerit, non secundum debitum, sed secundum gratiam liberatus. Id quod Iuliano Aeculanensi opponit Lib. II. de nupt. et concup. Cap. XI. Dicat iste, si potest, quomodo puer ille testamentum Dei dissipavit octo dierum (39): quantum ad ipsum attinet, innocens infans. Tunc ergo dissipavit testamentum Dei (40),*

---

(39) Genesis locum Septuaginta Interpretes ita vertunt: *masculus, cuius praeputii caro octava die circumcisa non fuerit*, quam versionem sequutus Augustinus *Lib. XVI. de Civ. Dei Cap. XXVII.* nec non Origenes *Lib. II. in Ep. ad Rom.* Nec velim quis obiiciat clausulam eam, *octava die*, in textu Hebraico non legi, nam *versu 12. scriptum: infans octo dierum circumcidetur in vobis*, quibus *vers. 14. subditur: Masculus cuius praeputii caro circumcisa non fuerit* cet.

(40) Probe Augustinus docet, Genesis verba: *pactum meum irritum fecit*, de pacto Adamitico intelligenda non comedenti de ligno scientiae bo-

*quando per unum hominem peccatum intravit in mundum, et per peccatum mors, et ita in omnes homines pertransiit, in quo omnes peccaverunt.*

IV. Neque tamen quievit hinc Iulianus, quin acrius Augustinum (41) celebri illa Ezechielis XVIII. 20. sententia lacessebat: *Anima, quae peccavit, ipsa morietur: Filius non portabit iniquitatem patris, et pater non portabit iniquitatem filii, iustitia super eum erit, et impietas impii erit super eum* (42).

ni, et mali, in Adamo ab omnibus violato; non vero de pacto Abrahamitico. Verum quid si de Abrahamitico circumcisionis pacto illa accipias? semper id constabit, animam pueri incircumcisi non alio damnari, quam ob originalem maculam, quae in veteri lege nonnisi per circumcisionem delebatur. Illud tamen per transennam adnotare non piget, circumcisionem veteris legis in eo differre a baptismo novae legis, quod in baptismo confertur gratia ex virtute ipsius baptismi, qui perfectae Christi passionis instrumentum est, in circumcisione autem conferebatur gratia ex virtute fidei passionis Christi, non vero ex circumcisionis vi.

(41) Vide Augustinum *Lib. III. Oper. Imperf. cap. XII.*

(42) Id saepius in Scripturis occurrit, veluti

Sed Iulianus vel non viderat, vel non vidisse simulaverat, minime haec Ezechielis verba peccato originali refragari (43). Peccatum enim primi hominis, est quodammodo peccatum totius naturae, et ideo quum quis propter primi parentis peccatum damnatur, non

---

*Deuteron. XXIV. 16. Regum Lib. IV. cap. XIV. 6. et Paralipom. Lib. II. cap. XXV. 4.*

(43) Huiusmodi legem ad homines pertinere, non vero ad Deum, invictissimis argumentis adversus Iulianum Augustinus evincit *Lib. III. Oper. imperf.* Nam ex Scripturis centies habemus, Deum in filios animadvertisse ob parentum reatus. Cuiusmodi est locus Exodi Cap. XX. 5. *Ego sum Dominus Deus tuus fortis, zelotes, visitans iniquitates patrum in filios, in tertiam, et quartam generationem eorum, qui oderunt me.* Quid quod habes infantes in diluvio universali absorptos, alios in Sodomae conflagratione exustos, alios ab Israelitis una cum parentibus Dei iussu occisos. Quid igitur? dicamus Scripturas Scripturis adversari? Apage! *Parvuli*, inquit Augustinus, *per suorum parentum peccata, quorum nec conscii, nec imitatores esse adhuc poterant Divino iudicio poenam subiere communem.* Ex quo id concludit, Ezechielis locum cum innumeris Scripturarum exemplis concilians: *aliter ergo iudicat Deus, aliter homini praecipit, ut iudicet.*



damnatur ob peccatum alterius, sed ob peccatum suum. Unde Anselmus *Lib. de pec. orig. cap. XXVI. Non portant infantes peccatum Adæ, sed suum. Illud enim fuit causa, istud effectus.*

## S E C T I O IV.

*Peccati Originalis in omnes homines transfusio ex novi Foederis tabulis evincitur.*

I. **Q**uae in veteri Testamento aperte traditur peccati propagatio ab Ada in posteros omnes, expressissime porro in novo revelatur. Egregius est Paulli locus in *Ep. ad Rom. V. 12.* quo priorem hominem secundo opponit, Adamum scilicet, qui peccato suo nos omnes in mortem, et condemnationem praecipitavit, Christo qui sua iustitia nos in iustificationem vitae revocavit. *Sicut, inquit, per unum hominem peccatum in hunc mundum intravit, et per peccatum mors: et ita in omnes homines mors pertransiit, in quo omnes peccaverunt. Quid boni adferant Pelagiani adversus tantum testimonium? Vix*

habent unde obmurmurare, de actuali peccato Adami id duntaxat intelligendum. Vae, si hoc unum habent effugium, quo ipsi se perstringunt! Si enim de actuali peccato ea verba accipias, falsum est per unum hominem peccatum intrasse in mundum, nam ante Adamum peccarunt Angeli, peccavit et Eva. Cur ergo non dicitur per Angelos invectum peccatum, et morient in homines? Cur non per Evam? De uno igitur originali peccato Adami ibi sermo est, in quo homines omnes peccaverunt (44).

---

(44) Ad Graecum textum confugit Iulianus apud Augustinum *Lib. I. Oper. Imperf.* scriptum enim est: ἐφ' ᾧ πᾶντες ἠμαρτόν; contenditque particulam ἐφ' cum tertio casu reddendam eo quod, non vero in quo; sic ut Apostolus peccatum non propagatione, sed imitatione transfusum doceat. In eandem insaniam convenerunt Ioannes Clericus (is enim est, qui sub simulato Ioannis Phe-reponi nomine latitat) in *Animadvers. ad Epist. CLVII. Augustini*, nec non Erasmus, Richardus Simonius, Harduinus, Beruyerius; id amplius obtendentes, nullum prorsus exemplum in Novo Testamento extare, in quo vocula ἐφ' reddatur in. Scilicet et iam non Theologos, sed et Grammaticos nos esse volunt; utique nihil recu-

II. Quam doctrinam fusius idem explicat  
Apostolus in *I. ad Corint. XV. 21. Per ho-*

---

samus. Vereor tamen ne ipsi se sicuti falsos Theologos, ita et falsos grammaticos prodant, non enim audeo vel imperitos, vel eo usque stolidos dicere. Do autem libens, praeterfugisse omnino hos Graecae linguae peritissimos exempla quae in Matthaei, et Marci Evangelio planè abundant; sed qui credam ego non vidisse illos Paullum eadem epistola, eodem capite, versu secundo *ἐπὶ* pro *εὐ* usurpasse? Scriptum ibi *ἐπ' ἐλπίδι τῆς δόξης* in *spe gloriæ*. Ergo falsi sunt, caeci sunt, haeretici sunt! Quid si ibidem alterum occurrat exemplum? habent versu decimo quarto: *ἐπὶ τῷ ὁμοιωµατι τῆς παραβάσεως Ἀδάμ* in *similitudine praevaricationis Adæ*. Ergo impudentissimi sunt. Vin quocum hominum genere contendendum nobis est! Mitto praeterea quod lectionem nostram, in quo, omnes antiquae versiones, et Latinae Ecclesiae Patres, nec non Concilia Milevitanum, Carthaginense, Arausicanum II. et Tridentinum sacram tectam servarunt; *quis ab omni humano sensu* ( *Iulianum sic perstringebat Augustinus Lib. VI. contr. Iulian. cap. XXIV.* ) *tam sit absurdus*, ut dicat: *propter hoc fecit homo iste homicidium, quia in paradiso Adam de ligno prohibito cibum sumpsit*? Ceterum Graeci textus particulam *verli* omnino debere in quo, adprime do-

*minem mors , et per hominem resurrectio mortuorum : et sicut in Adam omnes moriuntur , ita et in Christo omnes vivificabuntur .* In primo igitur homine omnes mortui sumus , quia in eo peccavimus omnes , in secundo homine ( Christo ) de morte in vitam revocamur omnes , per gratiam eius , quae vivificat nos . Taceant autem Pelagiani , contententes , non propagine , sed imitatione Adamum ad posteros suos transmisisse peccatum . Taceant inquam , quandoquidem si Apostolus in peccatum , quod per imitationem intraverit , intendisset , eius principem non Adam , sed diabolum nominasset , de quo scriptum : *ab initio diabolus peccat .* Quum porro in parvulos mors desaeviat , quid potius dices ? quomodo morti obnoxios dices eos , qui numquam peccando imitati sunt Adam ? Quid quod Apostolus idem in *Epist. ad Rom. V.* ait sicut per unius delictum in omnes homines invectum peccatum , ita per unius obeditionem iustos constitutos multos .

---

ctissimeque evincunt Zegerus , Iacobus Cappellus , tum et Waltonus in Polyglottis ; quas inter observatu potissimum dignas habes versionem Arabicam , et Aethiopicam . Quid quod Theodorus Beza , et Smidius , multis Graecorum unde unde

Iustitiam autem a Christo imitatione sola acceptam non esse, manifestum est. Nam iustitiam Christo acceptam referunt veteres Sancti, qui Christum praecesserunt, adeoque eum imitari nequiverunt; et per Christum iustificantur parvuli, qui neque cognoscere, neque imitari illum possunt. Igitur sicut Christus occulta gratiae suae inspiratione iustos nos efficit, ita et Adam occulta naturae depravatione nos constituit peccatores.

III. Sed et aliud superest Apostoli testimonium. Ad Ephesios enim scribens II. 3, *Nos omnes, inquit, eramus natura (45) filii irae: sicut et ceteri.* Quomodo enim natura, nisi quia peccante primo homine vitium pro natura inolevit? Id non vice simplici Pelagianis opposuit Augustinus, vimque in eo quantamcumque Sancta Tridentina Synodus agnovit *Ses. VI. Cap. I.*

IV. Praeterea longe aptiora ad originalis labis constabiliendum traducem sunt, quae

concrasis exemplis, Pindari in primis, ac Hesiodi, eandem firmant lectionem. Habes igitur et ipsorum protestantium calculos, quibus genuina vulgatae versionis lectio firmatur. Sed haec satis.

(45) Graece est: καὶ ἡμεῖς τέκνα φυσεὶ ὀργῆς  
nos enim omnino eramus filii irae.

necessitatem regenerationis inculcant, ut generationis vitium tollatur. Huiusmodi est Ioannis illud *III. 3. Nisi quis renatus fuerit ex aqua, et Spiritu Sancto, non potest introire in regnum Dei.* Nimirum Baptismus in remissionem peccatorum datur, quemadmodum in Symbolo profiteamur. An vero in remissionem peccati actualis? sed parvuli nullius profecto actualis reatus rei sunt. Ergo nulla alia eos baptizandi necessitas patet, nisi in originalis peccati remissionem (46).

---

(46)

M A N T I S S A

*Nonnulla ex ratione excavantur momenta,  
quibus amplius originale peccatum  
evincitur.*

**P**ostremo haud pluribus id mihi nunc est expediendum, an singulare quid ex ratione ad originariam noxam firmandam extricari possit. Sane praeludii loco Pelagianos primum compellam: cui bono in baptizandis parvulis tot ab Ecclesia ab aeo usque Apostolico, iamdiu nimirum ante Pelagianam pestem exortam adhibiti ritus, si nullo illi essent obstricti peccato? Cui bono *ἐξορκισμός*

## V. Profecto enim tanti argumenti vim non

---

ille *Exorcizo te omnis spiritus immunde, ut discedas ab hoc plasmate Dei?* Cui bono illud cum flatu mistum imperium: *Exi ab eo immunde spiritus, et da locum Spiritui Sancto Paraclito?* Cui tandem bono et interpellatio illa? *Abrenuncias Satanae?* si a potestate demonis plane liber sit infans, et cuiusvis expers peccati. Dicam amplius; ut quid tanta parentum sollicitudo, ut quam praeproperè filii recens nati regenerationis lavacro abluantur? Profecto et haec adminicula ad saturitatem Pelagianis offerebat Augustinus tum in *Libro de Peccat. Originali Cap. XXX.* et sequenti, tum vero in *Libro IV. contra Iulianum Cap. XII.* Quin arcte quantum in duriusculis istis frustulis deglutiendis Pelagianorum fauces stringerentur, vel ex eo intelligere abunde est, quod ad pura puta stultiloquia confugerent. Ergo dempto peccato, quae necessitas vel circumcisionis in veteri, vel baptismi in novo Testamento? Demp'to peccato, quae Redemptionis necessitas; vel quomodo omnes rei nascerentur? Demp'to peccato, quae necessitas adfligendi carnem cum vitiis et concupiscentiis suis? Vel unde in ipsis infantibus vitiorum omnium semina deduces, et propensionem illam in mendacium, in voluptatem, in iram, in vanitatem, in luxum? Profecto hinc patet istam haud naturam instituti hominis esse, sed poenam damnati.

effugient Pelagiani , quo ut omnino disiectos

---

Praeterea et altera accedit argumentatio , ac fortasse vehementior , quam Pelagianis ex vitae miseriis , aerumnisque , quibus undique circumdamur , propinabat Augustinus. *Iugum grave ( scriptum est Ecclesiast. Cap. XL. ) super filios Adam a die exitus de ventre matris eorum usque in diem sepulturae in matrem omnium cogitationes eorum , et timores cordis , adinventio expectationis , et dies finitionis . . . furor , zelus , tumultus , fluctuatio , et timor mortis , iracundia perseverans , et contentio . . . Adhaec mors , sanguis , contentio , et romphaea , oppressiones , fames , et contritio , et flagella ; ut videlicet non disputare , sed insanire prorsus videatur , qui corporis animaeque infinitas aegritudines , molestiasque , et mortem denique ipsam animadvertens , haec mala tamen esse perneget. Quum autem miseriae istae sint poenae , poenae autem ab iusto Deo infligi non possint , nisi ob peccatum ; sequitur nec ipsos infantes , quibus huiusmodi sunt inflictæ poenae , sine peccato esse. At verò nullum hi admiserunt peccatum voluntate propria , qua nondum uti potuere ; ergo habent peccatum quod per originem ab Adamo contraxerunt. Egregie Augustinus Lib. VI. Oper. Imperf. *Sub Deo iusto miser esse quisquam , nisi mereatur , non potest . . . Iustus est Deus , et ideo nascentes nec facere , nec fieri sineret miseros , nisi nosset reos . . . Ipsi nullum sicut pu-**



*tatis, trahentes peccatum, immeritas, si hoc ita esset, procul dubio sustinent poenas, ubi est iustitia Dei? quam si cogitares, numquam crederes, sine ullo merito peccati originalis tam miseros esse nascentes.*

Hisce humanae vitae miseriis etiam insontes homines premi, ipsi adprime viderunt Gentiles; qui tamen tantis ambagibus, tantoque mysterio perterriti, et unde potius ista malorum illuvies in totum genus hominum corrivaret prorsus nescientes, in adversa scissi sunt studia. Alii in naturam potius novercam, quam matrem, mali originem refuderunt, quasi de via deflexerit, teste Tullio ( apud Augustinum Libro IV. contra Iulianum Cap. XII. ) » Aequius cum ceteris animalibus, quam nobiscum egisse naturam exaggerant; hominem enim edidit nudo, fragili, et infirmo corpore, animo vero anxio ad molestias, humili ad timores, molli ad labores, prono ad concupiscentiam, in quo tamen inesset divinus ignis ingenii, et mentis, quo calamitates suas sentiens magis magisque torqueretur; cum bruta vestita nascantur, armisque ornata, miseriis hisce minime, ut nos detineantur, stupidumque habere soleant animum, quo hebetati, quidquid calamitatum sustinent, haud intelligant ». Haec Tullius; sed naturam qui accusat, nonne Deum naturae auctorem accusat? Alii in materiam inob-

sponsio commonstrat. Necessario enim parvu-

---

sequentem, ex qua nec aliter fieri, nec aliter constare poteit mundus, ne plurima mala consequerentur praeter artificis voluntatem; at materiam banc qui redarguunt, nonne Deum redarguunt, velut impotentem, cui nec melior, nec obsequentior praesto erat materia? Alii in superiori quadam vita peccasse mentes fabulati sunt, eoque peccato praecipitatas, et in corporum carceribus inclusas; sed haec aegri somnia sunt, minimeque indigent ut refellantur. Alii demum ex duplici principio bono, ac malo mundum aequa boni malique mensura conflatum dixerunt; verum hi bonum, et malum veluti duas efficientes causas ex aequo obtendunt, neque animadvertunt stulti, malum esse defectum boni, esseque causam potius deficientem.

Ergo videbant, ergo sentiebant miserias Gentiles, sed cui culpa incubabant, nesciebant. Quam ob rem Tullii verba perpendens Augustinus, sic inquit ibidem: *Rem vidit, causam nescivit, latebat enim eum, cur esset grave iugum super filios Adam, quia sacris litteris non eruditus ignorabat originale peccatum.*

At quid si non rem tantum, sed et causam etiam in comperto plerisque gentilium fuisse dicam? Quid si paria plane cum Mose, si paria nobiscum senserint, mortalitatemque ipsam non naturae, sed poenae imputaverint? Scite id ex

lis, inquit, Baptismum, ut regnum Dei,

vetulo Campano marmore edocemur tametsi tru-

VNA. DIES. ADMIT. CRUDELI. CLADE. PEREMPTAS

QUIS. ARA. HAEC. POSITA. ST. POENA. HOMINIS. MISERI

FILIA. NAMQUE. PERIT. PERIT. ET. MATER. EUNDEM

DESERIT. ILLA. PATREM. DESERIT. ILLA. VIRUM

cato, quod Capuae in porticu S. Angeli in Fornis antehac visebatur, nunc vero in pago Sancti Clementis prope Casertam extat, in domo Clarissimi Francisci Danielis, Viri optimi ac priscis moribus, mihi quae iamdiu ab ipsa adolescentia familiaritate devincti. Marmor autem hoc est, quod ipse meis oculis, quum apud amicissimum virum, relaxandi animi ergo, divertissem anno MDCCXC. vidi excrispi- que. Mendose enim, atque in multis deforme id antehac produxit Reinesius in Syntagmate Inscriptionum antiquarum.

In quo vides conceptis verbis *Mortem* ab ipsis profanis habitam pro **POENA HOMINIS MISERI**; ubi et illud **HOMO MISER** Mosaicum plane sapit. Corrogarem huc et huiusmodi sapidissimas alias ex Gentili antiquitate cupedias. Sed fuse alibi me de hoc argumento egisse memini. Tantum vero hic non praeteream pulcherrimum Catanense marmor Christianum ap. Cl. Gabr. Castellium Sicil. Inscript. Clas. XVII. n. 73.

non item ut vitam aeternam consequan-

ΑΠΑΞΑ ΓΕΑ ΚΑΙ ΠΛΑΤΟΙΣ ΑΗΡ ΓΕΝΑ  
ΞΟΙ ΘΑΝΑΤΕ

ΕΞΑΠΙΝΗΣ ΜΟΥ ΤΟ ΒΡΕΦΟΣ

ΗΡΠΑΣΕ . . .

ΤΙΣ ΑΝΑΝΚΗΣ ΠΑΡΕΓΗΡΑ ΟΥΧ

ΕΙΣΟΜ . . .

ΕΓΕΝΗΘΗ Ο ΚΤΡΙ ΑΓΑΘΩΝ

ΙΕ

ΚΑΛΑΝΔΩΝ ΝΟΕΝΒΡΙΩΝ

ΗΜΕΡΑ ΚΡΟ

Ε

ΕΖΗ. Μ. Ι, ΑΠΕΘΑΝΗ. Ι.

ΚΑΛΑΝΔΩ ΞΕΠΤ . . .

ΗΜΕΡΑ ΗΛΙΟΥ ΚΙΡΙΑ ΑΓΑΘΗ

ΕΙΡΗΝΕ ΠΑΣΙ

quod sic latine vertas ;

*Univerſa terra , et ſpatioſus aer  
generat pro te o mors.*

*Repente meus puer raptus eſt . . .*

*necellitate conſenuit non . . .*

*natus ipſe ſorte bonorum ante XV.*

*Kalendas Novembris die Domini.*

*Fixit menſes X. ante Kalendas Septembr.*

*Die ſolis Dominica. Bona pax cunctis.*

tur (47). Proh Deum quae ista est insipientia ! Undenam Regni Dei a vita aeterna distinctionem istam ineptissimam , ne quid peius dicam , didicerunt , vel cui fundamento subnixam dicent eam , quam expressissime Christus exclusit ? qui ubi electis dixerit : *possidete paratum vobis regnum* , e vestigio subdit : *ibunt hi in vitam aeternam* ; quo loco prorsus iugulantur.

VI. Sed pessimam quantum tuerentur causam , ipsos profecto vidisse Pelagianos , ex eo patebit , quod Augustini solidissimis pressi argumentis eo tandem confugerint , ut non peccatum , sed peccati poenam in Adae posteris dimanasse dixerint. Sed heu miserum effugium ! Iniustum aiunt , filios Adam nondum existentes culpam parentis contraxisse ;

---

(47) Iulianus vero baptismum eo necessarium dicitat , ut Christus sua dona in infantibus augeat , non vero ut a peccatis hi liberentur. Unde Augustinus stultitiam hominis irridens potius , inquit *Lib. III. contr. Iulian. Cap. III. Pueri ergo , in Sacramento Salvatoris baptizantur , sed non salvantur , redimuntur , sed non liberantur , lavantur , sed non abluuntur , exorcizantur , et exufflantur , sed a potestate diaboli non eruuntur. Haec sunt sententiarum portentastrarum : haec inopinata mysteria dogmatum novorum.*

et non vident, magis iniustum esse quod ipsi contendunt, innocentes homines supplicio puniri, et trahere mortem sine merito mortis (48), contra quam Apostolus edixerat, per unum hominem peccatum intrasse in mundum, et per peccatum mortem, in quo omnes peccaverunt. Sed eccur Christus in mundum venerit, nisi ut peccatores salvos faceret? Si venit de Caelo magnus medicus, magnus in orbe terrarum iacebat aegrotus, diserte inquit Augustinus. Dicant nunc, nonne et pro parvulis venerit? utique pro omnibus venit, et Apostolo testante *mortuus pro omnibus*. Eequo autem alio morbo obstrictos dicant parvulos, nisi originali?

---

(48) Adeas Augustinum *Lib. IV. contr. duas Epist. Pelagian. cap. IV.* ipsissimis ferme verbis Pelagianis resistentem. Accedit quod Synodus Arausicana II. an. DXXIX. id opinionis monstrum damnaverit Canone secundo: *quia iniustitia Deo datur dicendo poenam infligi sine culpa.*

## S E C T I O V.

*Peccati Originalis in omnes homines transfusio , ex Traditione evincitur.*

I. **Q**uae Maiorum nostrorum de peccati originalis transfusione, antiqua, et Apostolica fides fuerit, vel ex eo cumulatissime quivis intelliget, quod ubi malo pessimo erupit Pelagius, universa in eum Catholica Ecclesia non uno habito certamine convenerit, nec a pugna destiterit, nisi haereseos praevaricatione ubique prostrata, victoriam de hoste triumphato retulerit insignem (49).

II. Quibus autem armis hostem subegerunt Patres nisi perpetua maiorum traditione, nisi Apostolica fide? Sane Augustinus aperte Iuliano istam fidei antiquitatem opponit *Lib. II. contr. Iul. Cap. X. Quod invenerunt in Ecclesia, tenuerunt, quod didicerunt, docuerunt, quod a Patribus acceperunt, hoc filiis tradiderunt.* Hinc multam Patrum cohortem

---

(49) Vide quae mox dabimus in Praefat ad Librum VI.

tem Sanctus Pontifex in medium adducit, et quasi iudices hac in caussa sedere voluit.

III. Et quidem S. Cyprianus rogatus, an baptismus infantum usque ad octavum diem, circumcisionis instar, differri poterat, haec respondit in Epistola ad Fidum: *Porro autem si etiam gravissimis delictoribus, et in Deum multum ante peccantibus, cum postea crediderint, remissa peccatorum datur, et a baptismo atque a gratia nemo prohibetur; quanto magis prohiberi non debet infans, qui recens natus nihil peccavit, nisi quod secundum Adam carnaliter natus, contagium mortis antiquae prima nativitate contraxit. Qui ad remissam peccatorum accipiendum, hoc ipso facilius accedit, quod illi remittuntur non propria, sed aliena peccata; nimirum non actualia, sed originale. Sane luculentissimum hoc Cypriani testimonium non Augustinus tantum in Concilio Carthaginensi, ubi Coelestii fauces suffocatae, sed Hieronymus etiam adversus Pelagianos produxit (50).*

---

(50) *Confersis Augustinum Lib. I. contra Iulian. tum et Lib. IV. ad Bonifacium contr. II. Epist. Pelag. Cap. VIII. et Hieronymum Lib. III. advers. Pelagianos.*



IV. Post Cyprianum, Augustinus Reticium Episcopum Augustodunensem, nec non Olym-  
pium Hispanum commemorat, quorum lucu-  
brationes iam modo desiderantur. Hinc Hila-  
rium Pictavensem urget, qui in Apostoli ver-  
ba, *in quo omnes peccaverunt*, haec oppor-  
tune commentatur. *Manifestum est, in A-*  
*dam omnes peccasse, quasi in massa: ipse*  
*enim per peccatum corruptus, omnes quos*  
*genuit, nati sunt in peccato.* Innumera prae-  
terea et ex Ambrosii scriptis contrasit testi-  
monia *Lib. I. contr. Julian. Cap. II. ex*  
*quibus unum, et fortasse alterum seligemus*  
*Omnes in Adam* (inquit Ambrosius *Lib. IV.*  
*in Lucam*) *morimur, quia per unum homi-*  
*nem peccatum intravit in mundum, et per*  
*peccatum mors; et ita in omnes homines per-*  
*transiit, in quo omnes peccaverunt. Illius*  
*ergo culpa mors omnium est.* Et rursus *Lib.*  
*VII. fuit Adam, et in illo fuimus omnes;*  
*periit Adam, et in illo omnes perierunt.* Sed  
adhuc Optatus Milevitanus audiendus *Lib. IV.*  
contra Parmenianum: *Neminem fugit, quod*  
*omnis homo qui nascitur, quamvis de Chri-*  
*stianis parentibus nascatur, sine spiritu im-*  
*mundo esse non possit, quem necesse sit an-*  
*te salutare lavacrum ab homine excludi ac*  
*separari.* Hieronymus denique in *Cap. IV.*

*Ionae. Nullus absque peccato, nec si unius quidem diei fuerit vita eius, et innumerabiles anni vitae illius. Si enim stellae mundae non sunt in conspectu Dei, quanto magis vermis et putredo, et ii qui peccato offenditis Adam tenentur obnoxii? Qui Hieronymi locus aptissimus Augustino visus Lib. III. de Peccat. meritis, et remiss. Cap. VI.*

V. A Latinis ad Graecos veniam, quorum agmen Sanctus Iustinus Martyr ducit, quippe in *Dial. cum Tryph.* solum Iesum Christum sine peccato natum diserte fatetur, et ad Iordanem venisse *humani generis causa, quod per Adam in mortem, et fraudem, seductionemque serpentis conciderat.* Quin et hanc inter primum et alterum Adam conceptis verbis constituit antithesim: *ut sicut unius inobedientia causa est damnationis omnibus, qui corporaliter ab eo descendunt; ita Christi obedientia confert vitam iis, qui per ipsum spiritualiter regenerantur.* Accedit Tatianus, cuius hoc est testimonium in Oratione contra Gentes: *Nos propter priscorum hominum inobedientiam Spiritum Dei, perfectam iustitiam, sanctitatemque amississe.* Non minus expressa, atque illustria sunt quae Sanctus Irenaeus Lugdunensis Episcopus habet (*Lib. V. advers. haeres. Cap. XVI.*) De-

*um in primo Adam offendimus non facientes eius praeceptum ; in secundo autem Adam reconciliati sumus , obediētes usque ad mortem facti.* Cuius auctoritatem tanti fecerat Augustinus , ut saepe illam Iuliano obiiceret , cum alibi pluries , tum vero *Lib. I. contr. Iulian. Cap. III. Iste ait ( Irenaeus ) non aliter salvari homines ab antiqua serpentis plaga , nisi credant in eum , qui secundum similitudinem carnis peccati in ligno martyrii exaltatur a terra , et omnia trahit ad se et vivificat mortuos.* Quid vero de Athanasio dicam , cuius et ponderosissima testimonia Augustinus adversus Pelagianos coegit ? Huiusmodi est illud in *Ps. L. Omnes qui ex Adam oriuntur , in iniquitatibus concipiuntur , proavi sui damnatione collapsi.* Et in *Lib. de Incarnat. Lasso Adamo in omnes homines peccatum dimanavit.*

VI. In eamdem fidem S. Basilium habemus convenientem *Serm. I. de Ieiunio : Si ieiunasset a ligno Eva , non isto indigeremus ieiunio , non enim opus habent valentes medico , sed male habentes.* Basilio Gregorium Nazianzenum succensem *Orat. XXXVIII. 4. Deposito veteri homine novum induamus , et sicut in veteri Adamo mortui sumus , ita in Christo vivamus . . . . Ubi enim abun-*

*davit peccatum, superabundavit et gratia: et si gustus condemnavit, quanto magis Christi passio iustificavit?* Cuius testimonio quam quo maxime Iulianum exagitabat Augustinus: *tibi parva, inquit, in uno Gregorio Episcoporum Orientalium videtur auctoritas? est quidem tanta persona, ut neque ille hoc nisi ex fide Christiana omnibus notissima diceret, nec illi eum tam clarum haberent, atque venerandum, nisi haec ab illo dicta ex regula notissimae veritatis agnoscerent.*

*Mox eundem sic fatur: Non est ergo, cur provoces ad Orientis antistites, quia et ipsi utique Christiani sunt, et utriusque partis terrarum fides ista una est, quia et fides ista Christiana est.*

VII. Venio nunc ad Sanctum Ioannem Chrysostomum, quem in suas trahere partes impudentissime conantur adversarii. Sane ego haud umquam inficiabor, Pelagianis nondum litigantibus securius Patres esse loquutos, quemadmodum ab Augustino accepimus; verumtamen quae ista insania est? sed insaniam ne, an perversitatem dicam, quum insignissima in hanc fidem sint Chrysostomi testimonia, quibus acri contentione Pelagianos Hippouensis Pontifex divexabat? Audias eum in Epistola ad Olympiam; *Quando Adam peccavit*

*illud grande peccatum , et omne genus hominum in commune damnavit , de moerore poenas luebat. Adhuc vero expressius in Homilia ad Neophytos ex Augustini versione : Venit semel Christus , invenit nostrum chirographum paternum , quod scripsit Adam: ille initium induxit debiti , nos foenus auximus posterioribus peccatis. Quid de Chrysostomi mente adhuc dubitatur ? qui amplius garriendi locus ? Habes debitum paterni chirographi , quod hereditario iure nobis inhaesit ; habes et debita nostra , quibus foenus crevit.*

VIII. Nisi igitur Chrysostomum Chrysostomo adversari dicas , secus de illius mente sentiendum , quam inani conatu Pelagiani sollicitant. Quod enim Beatissimus Pater scripsit, *Adamo lapso , ii etiam qui de ligno non comederant , effecti sunt ex illo omnes mortales* ; non eo sensu accipiendum , ut si mors tantum , non autem culpa ex Adami peccato dimanaverit. Ipse dixit , *poenas neminem debere , nisi ex se peccator fuerit*. Haec qui attendat, Chrysostomi mentem probe tenet. Mors est poena peccati , quomodo ergo poena siue culpa in Adae posteros transit ? Illud igitur *effecti sunt omnes mortales* tantumdem est , ac *effecti sunt omnes peccatores , ac propte-*

*rea mortales.* Nec est porro cur sibi plaudat Iulianus, quod in *Hom. ad Neophytos* parvulos peccata non habere Chrysostomus dixerit. Cum Augustino dicam: *intellige propria, et nulla erit contentio.* Parvuli enim non propria habent, sed aliena peccata, ut Beatus Cyprianus loco supra recitato inquit. Quo sensu loquebatur Apostolus de Jacob, et Esau, *quum nihil boni egissent, aut mali.* Adhuc tamen quaerenti Iuliano: quod si ea fuerit Chrysostomi mens, cur non addiderit *propria*, opportune illum suffocat Augustinus *Lib. I. contr. Iulianum Cap. VI.* » Quia disputans in Catholica Ecclesia non se aliter intelligi arbitrabatur: tali enim quaestione nullus pulsabatur; et vobis nondum litigantibus, securius loquebatur ». Reliqua non moror, quae neque conciliatore indigent, neque interprete.

IX. Vides ergo iure quantum miram hanc Patrum omnium consensionem auctoritatemque (51) universali Synodo comparaverit Au-

---

(51) Mirum fortasse cuicumque videri poterit, quod Augustinus nec Tertullianum, nec Origenem Pelagianis opposuerit, quum ambo praeclare de Originali peccato senserint. Quod ad Tertullianum enim spectat, utique in *Lib. de testim. animae* Cap. III. haec habet: *per quem* (diabo-

gustinus *Lib. II. contr. Iulian. Cap. ult. Si Episcopalis Synodus ex toto orbe convocaretur, mirum si tales possent illic facile tot sedere, quia nec ipsi uno tempore fuerunt.*

lum ) homo a primordio circumventus, ut praeceptum Dei excederet, et propterea in mortem datus, exinde totum genus de suo semine infectum suae etiam damnationis traducem fecit. Et adhuc expressius uno et altero verbo rem expedit *Lib. de Resur. Carnis Cap. VIII.* » Caro abluitur, ut anima emaculetur » ; Cuiusmodi innumera fere huc adducere posse in testimonia, potissimum *Lib. cit. Cap. XL.* nec non *Lib. I. contr. Marcion. Cap. XXII.* et alibi. Origenes vero *Hom. VIII. in Levitic.* expresse docet, uno excepto Iesu Christo, quemlibet hominem in peccato nasci : additque baptisma parvulis dari in remissionem peccatorum, quum utique ( eius verba sunt ) si nihil esset in parvulis, quod ad remissionem deberet et indulgentiam pertinere, gratia baptismi superflua videretur. Videtur igitur nisi me iudicium magnopere fallat, Augustinus vel ideo insalutatos illos reliquisse quod utriusque auctoritas magni non erat in Ecclesia momenti. Quid quod Origenes Pelagianis in eo maxime fuisse videtur, quod *Lib. II. περὶ ἀρχ. Cap. IX.* huius vitae calamitates non in peccatum originale refundit, sed ad superiorem vitam actam in peccatis, quorum poenas animae postea in corporibus darent.

Sed nec praeterea est cur Concilia desideres. Antiquam enim Catholicae Ecclesiae fidem (52), ubique, et ab omnibus, ac semper credi-

(52) Innumera ad traditionem firmandam ex antiquis Christianis monumentis adferre huc possem cimelia nisi ad alia properaret oratio. Piaculum attamen prope duco Sixti Tertii Pont. M. Epigramma praeterire, Romae in Baptisterio Lateranensi, quod primus omnium Cl. Panvinius exscripsit in *Comment. de VII. Urb. Eccles.* atque exinde Baronius ad an. CCCXXL.

*Gens. sacrandæ. polis. hic. semine. nascitur. almo.*

*Quem. fecundatis. spiritus. edit. aquis  
Virgineo. foetu. genitrix. Ecclesia. natos*

*Quos. spirante. Deo. concipit. amne. parit  
Coelorum. regnum. sperate. hoc. fonte. renati*

*Non. recipit. felix. vitæ. semel. genitos  
Fons. hic. est. vita. et. qui. totum. diluit. orbem*

*Sumens. de. Christi. vulnere. principium  
Mergere. peccator. sacro. purgande. fluente*

*Quem. veterem. accipiet. proferet. unda. novum  
Insons. esse. volens. isto. mundare. lavacro*

*Seu. patrio. premcris. crimine. seu. proprio  
Nulla. renascentum. est. distantia quos facit unum*

*Unus. fons. unus. spiritus. una. fides.  
Nec. numerus. quemquam. scelerum. nec. forma. suorum*

*Terræ. hoc. natus. flumine. sanctus. erit.*

Ex quo vide opportune quantum adversus tum temporis recentem Pelagianam haeresim, catholi-



tam, avitamque traditionem toto orbe diffusam, testatissimam facit Conciliorum (53) quatuor supra viginti inconcussa auctoritas, quibus Pelagiani per universam Christianorum terram proscripti. Quibus et postremum pondus ex Tridentino Concilio accessit *Sess. V. Cap. II.* » Si quis Adae praevaricationem » sibi soli, et non eius propagini adserit non » fuisse, et acceptam a Deo sanctitatem,

cam de peccato originis adsertionem Sixtus Pontifex litterato marmori consignaverit. Porro Adami lapsum, eoque universum hominum genus infectum probe habes et in altero marmore, Moguntiae in ruderibus Aedis D. Albani, quod Broverius in suis Trevirensibus annalibus producit, atque Megingozio Comiti adscribit ad an. DCCCXCVI.

*Postquam. primus. homo. paradisi. gaudia. liquit  
Illius. omne. genus. mors. inimica. tulit  
Nullus. enim. regum. nullus. mediocris. in. orbe  
Aspera. ab. hac. liber. conditione. fuit  
Hanc. legem. sequitur. tumulo. qui. clauditur. isto  
Nomine. Megingoz. fonte. sacrate. pio.*

(53) Conferas, si lubet, Ioannis Garnerii *Dissert. II. in Marium Mercatorem*; Concilia enim quotquot in Pelagianorum causa, vivo adhuc Augustino, sunt habita, summa diligentia collegit auctor.

» et iustitiam quam perdidit , sibi soli , et  
 » non nobis etiam eam perdidisse , aut in-  
 » quinatum illum per inobedientiae pecca-  
 » tum , mortem , et poenas corporis tantum  
 » in omne genus humanum transfudisse , non  
 » autem et peccatum , quod est mors animae,  
 » anathema sit , cum contradicat Apostolo  
 » dicenti : *per unum hominem peccatum in-*  
 » *travit in mundum , et per peccatum mors,*  
 » *et ita in omnes homines mors pertransiit ;*  
 » *in quo omnes peccaverunt.*

## SECTIO VI.

### *Pelagianorum sophismata diluuntur.*

I. **S**cripturarum auctoritate , perpetuisque  
 Maiorum traditionibus pressi Pelagiani , ad  
 cavillationes tandem confugiunt. Quemadmo-  
 dum vero Augustinum adhuc usque sequuti  
 sumus , modo Scripturas Pelagianis opponen-  
 tem , atque interpretantem , modo antiquio-  
 rum Patrum testimonia congerentem , ita hac  
 potissimum parte ducem illum sectamur , quip-  
 pe Iuliani Eculanensis , hominis in dialectica  
 exercitatissimi sophismata omnia invicte re-  
 futavit , explositque.

II. Non peccat iste qui nascitur, delirat iam Iulianus, quum electionis capax non sit; non peccat iste qui genuit, alioquin illicitus esset coniugii usus; non peccat ille qui condidit, per quas igitur rimas, inter tot praesidia, peccatum fingis ingressum? Cui scite Augustinus *Lib. II. de nuptiis, et concupisc. Cap. XVIII. Quid quaeris latentem rimam, quum habeat apertissimam ianuam? Per unum hominem, ait Apostolus, per unius delictum, ait Apostolus, per unius hominis inobedientiam, ait Apostolus. Quid quaeris amplius? quid quaeris apertius? quid quaeris inculcatius?* Itaque per voluntatem, qua peccavit Adam totius humani generis caput, peccatum in eius posteros transiit.

III. Nec hinc animo vel tantisper cecidit Iulianus; animosior quin alterum urget argumentum. Scripserat enim Augustinus, peccatum nullo modo dari posse, nisi sit voluntarium. Ergo, instabat Iulianus: si Adami peccatum sine nostrae voluntatis electione fuit, quomodo culpa illius obnoxii sumus? Heus tu Iuliane! Non heic agitur de personali peccato, sed de originali, quae est humanae naturae infectio, ad quam contrahendam sufficit naturam habere humanam. Fuit Adam, et in illo fuimus omnes, peccavit Adam, peccavi-

mus omnes, eiusque peccatum nobis voluntarium et liberum fuit voluntate et libertate eius, in quo omnes eramus, et a quo originem trahimus (54).

---

(54) Adprime audiendus S. Thomas 1. 2. *Quaest. 81. art. 1.* » Omnes homines qui na-  
 » scuntur ex Adam, possunt considerari, ut u-  
 » nus homo, in quantum conveniunt in natura,  
 » quam a primo parente accipiunt. Sic igitur multi  
 » homines ex Adam derivati, sunt tamquam mul-  
 » ta membra unius corporis; actus autem unius  
 » membri corporalis, puta manus, non est vo-  
 » luntarius voluptate ipsius manus, sed voluntate  
 » animae, quae primo movet membrum. Unde  
 » homicidium, quod manus committit, non im-  
 » putaretur manui ad peccatum, si considerare-  
 » tur manus secundum se, ut divisa a corpore,  
 » sed imputatur ei, in quantum est aliquid ho-  
 » minis, quod movetur a primo principio hominis.  
 » Sic igitur inordinatio, quae est in isto homine ex  
 » Adam generato, non est voluntaria voluntate ip-  
 » sius, sed voluntate primi parentis, qui movet mó-  
 » tione generationis omnes, qui ex eius origipe  
 » derivantur, sicut voluntas animae movet omnia  
 » membra ad actum. Unde peccatum, quod sic a  
 » primo parente in posteros derivatur, dicitur o-  
 » riginale: sicut peccatum, quod ab anima de-  
 » rivatur ad membra corporis, dicitur actuale.  
 » Et sicut peccatum actuale, quod per membrum

IV. Neque hinc sequitur , damnandas esse nuptias , aut peccare parentes dum generant , siquidem nec actus coniugalis , nec ipsi parentes sunt vera caussa peccati originalis , sed tantum conditio , sine qua non traduceretur peccatum originale. Egregie Augustinus Lib. III. contr. Julian. *Sicut creanti Deo non imputatur , quod rationales naturae a bono deficiunt , sed quod bonum sunt ; sic parentibus gignentibus , et malo concupiscentiae bene utentibus , non imputandum est , quod cum eo malo filii nascuntur , sed quod bonum sunt.*

V. Sed etiam Christus Dominus in Adam fuit ; et si fuit , etiam peccavit. Desine ( irrui in Iulianum Sanctus Episcopus Lib. IV. Op: imperf. Cap. CCIV. ) vana garrire : omnes qui nondum nati nihil per proprias voluntates agere poterant boni , vel mali , in uno potuerunt peccare , in quo per rationem seminis erant , quando ille propria voluntate

---

» aliquod committitur , non est peccatum illius  
 » membri , nisi in quantum illud membrum est  
 » aliquid ipsius hominis , propter quod vocatur  
 » peccatum humanum ; ita peccatum originale non  
 » est peccatum huius personae , nisi in quantum  
 » haec persona recipit naturam a primo parente :  
 » unde et vocatur peccatum naturae , secundum  
 » illud Ephes. II. 3. *eramus natura filii irae.*

*peccatum illud grande peccavit, naturamque in se vitiavit, mutavit, obnoxiauit humanam; unus homo excipiendus, qui ex ipso quidem semine, non tamen seminali ratione procreatus est; si potes, intellige, si non potes, crede.* Quam in rem Sanctum Thomam conspirantem habes *Lib. IV. contra Gentes cap. 52.* Christus ab Adamo descendit, quia materiam humani corporis ab eo suscepit, non quia virtutem formativam primo parenti debuisset; Christi enim corpus virtute Spiritus Sancti formatum est.

VI. Adae igitur peccatum generatione in posteros manavit, sed Deus *eduxit illum a delicto suo* (*Sap. X.*) cur et generatione in posteros non manavit poenitentia, et iustitia, quam Dei misericordia recuperavit? *Quamvis peccatum* (ita Sanctus Thomas *Lect. III. in Cap. V. Epist. ad Rom.*) *Adae deletum fuerit per suam poenitentiam . . . non tamen eius poenitentia delere potuit peccatum posterorum; quia eius poenitentia fuit per actum personalem, qui ultra eius personam non se extendebat.*

VII. Sed parentes ab originalis peccati labe per baptismum purgati, quo potius modo id in filios transfundunt, quod iam non habent? Si palea, opportune occurrit Augustinus, quae

tanta diligentia separatur a tritico , manet in fructu , qui de purgato tritico nascitur ; si de olea nascitur oleaster ; quid mirum , si peccatum quod mundatur per baptismum , in eos transfundatur , quos gignunt baptitati , vi quadam tabifica concupiscentiae ? *Renovati namque parentes , non ex primitiis novitatis , sed ex reliquiis vetustatis carnaliter gignunt : et filii ex parentum reliqua vetustate toti vetusti , et in peccati carne propagati , damnationem veteri homini debitam sacramento spiritualis Regenerationis et renovationis evadunt.*

## S E C T I O VII.

*Quae peccati Originalis natura. Matthias Illyricus , tum Calvini , et Lutheri sectatores prosternuntur. Augustinus , et Thomas explicatur.*

I. **N**unc vero rem arduam tentamus. Ita enim Divinae Sapientiae abscondito iudicio placuit , ut originalis culpa in omnes homines transfusionem edocti adprime probeque ex Scripturis essemus , cuiusmodi autem naturae ea sit omnino ignoraremus. Unde Augustini

decantatissimum illud effatum (*Lib. I. de Morib. Eccl. Cath.*) *Nihil peccato originali ad praedicandum notius, nihil ad intelligendum secretius.*

II. Nec profecto nos in hanc syrtim coniecisset oratio, nisi turbas Lutherani, Calvinianique civissent, omnino prosternendas. Primus omnium, quoad sciam, Matthias Flacius Illyricus, e Lutheranorum schola (55) aquam turbavit, id petulanter, ut parcius dicam, contendens, peccatum non esse pravam accidens, quo anima deturpatur, ut communis est omnium persuasio, sed ipsam animae substantiam in malum prorsus atque ita conversam, ut quae in Adamo erat substantialis Dei imago, in nobis substantialis facta sit imago diaboli. Sed quae ista substantiae immutatio est, quam perversus lutheranus obtrudit? An non Paullum Apostolum numquam non praedicantem audiit *ad Romanos VII. 11. mihi malum adjacet*, et ibidem: *quod habitat in me peccatum*. Et ad Hebraeos XII. 2. *deponentes omne pondus, et circumstans nos peccatum*.

---

(55) Ipsis Lutheranis exosus, exul, et extorris post varisos caus Francofurti ad Moenum miserrimo fato functus est an. MDLXXVIII.



III. Porro mens hominis, quae Adamo nondum lapso propter intelligentem facultatem substantialis erat Dei imago, imagine illa haud per peccatum est spoliata; eadem enim, qua prius, gaudet iam nunc intelligendi volendique facultate. Quae autem per peccatum sublata imago est, quamque necesse est per gratiam renovari, nonnisi in Divinae Gratiae, virtutumque supernaturalium ornamentis sita est, proindeque substantialis imago nullatenus est dicenda. Quod enim imago diaboli per peccatum quisque evadat, id nonnisi per accidens est intelligendum, nimirum quod non secus ac diabolus ad commutabile bonum inordinata voluntate convertitur, atque ab incommutabili bono avertitur.

IV. Communior autem inter Lutheranos Calvinianosque is versatur error, originale peccatum in rebeli carnis concupiscentia positum. Quum autem in patefacto sit, concupiscentiam et in renatis remanere, consecrarii loco hinc effutiebant, originale peccatum haudquaquam in regeneratione deleri, tantumque baptizatis id ex misericordia Dei non imputari. At haereticam adduxisse pravitatem tantumdem est ac illam abunde refutasse. Quid enim? Clamat Paullus Apostolus *Ep. ad Rom. VI. 3. An ignoratis quia quicumque bapti-*  
*Tom. V.*

*zati sumus in Christo Iesu, in morte ipsius baptizati sumus? Consepulti enim sumus cum illo per baptismum in mortem; et mox Cap. VIII. 1. Nihil ergo nunc damnationis est iis, qui sunt in Christo Iesu, qui non secundum carnem ambulant. Et ad Gal. III, 27. Quicumque baptizati estis, Christum induistis. Quid autem est induere Christum, nisi veteri homini exuto renovari, et sanctificari per gratiam Iesu Christi. Et ad Corinth. VI, 11. Abluti estis, sanctificati estis in nomine Domini nostri Iesu Christi, et in Spiritu Dei nostri. An post huiusmodi tam luculenta Scripturarum Oracula, hiscere contra audeant perversi? Ecquo autem sensu potius lavacrum regenerationis, et renovationis Spiritus Sancti in Scripturis dici putamus baptismum, nisi eo Sacramento ad novam vitam regeneremur, et nisi (ut Ambrosii, et Augustini verbis utar Lib. II. contra Iul.) deteresa peccatorum colluvione renovemur?*

V. Hinc Tridentini Patres peremptorium, cumque Scripturis, et constanti Patrum traditione superaedificatum adversus haereticos emisserunt Canonem. *Ses. V.* » Si quis per  
» Iesu Christi Domini nostri gratiam, quae  
» in baptismo confertur, reatum originalis  
» peccati remitti negat, aut etiam adserit,

» non tolli totum id, quod veram et pro-  
 » priam peccati rationem habet: sed illud di-  
 » cit tantum radi, aut non imputari, ana-  
 » thema sit. In renatis enim nihil odit Deus,  
 » quia (ad Rom. VIII: 1.) nihil est damna-  
 » tionis iis qui vere consepulti sunt cum Chri-  
 » sto per baptismum in mortem.

VI. Ne autem ex concupiscentia, quae in baptizatis manet, adhuc Calvino obgannien-  
 di vel susurrandi ansa detur, iugulum illius  
 apertissimo Iacobi Apostoli loco petere prae-  
 stat (Epist. Can. Cap. I. 14.) *Unusquisque*  
*tentatur a concupiscentia sua abstractus, et*  
*illectus: deinde concupiscentia cum concepe-*  
*rit, parit peccatum; peccatum vero cum con-*  
*summatum fuerit, generat mortem.* Ergo  
 concupiscentia in renatis non est vere, et pro-  
 prie peccatum. Ergo primi concupiscentiae  
 motus, quos inviti patimur, et quibus unus-  
 quisque tentatur, distinguuntur a peccato, quod  
 generat mortem. Ad redundantiam audi Au-  
 gustinum egregie Iacobi locum Juliano op-  
 ponentem *Lib. VI. contra eum.* « Profe-  
 » cto in his verbis partus a pariente discer-  
 » nitur; pariens enim est concupiscentia,  
 » partus peccatum. Sed concupiscentia non  
 » parit, nisi conceperit, nec concipit, nisi  
 » illexerit, hoc est, ad malum perpetrans

» dam obtinuerit voluntatis assensum ».  
Vin plura? habe locupletissimam Tridentino-  
rum Patrum sententiam. « Manere autem in  
» baptizatis concupiscentiam, vel fomitem  
» sancta Synodus fatetur, et sentit; quae  
» quum ad agonem relictæ sit, nocere non  
» consentientibus, sed viriliter per Christi  
» Jesu gratiam repugnantibus non valet; quin  
» imo qui legitime certaverit, coronabitur.  
» Hanc concupiscentiam, quam aliquando  
» Apostolus peccatum adpellat, sancta Sy-  
» nodus declarat Ecclesiam Catholicam num-  
» quam intellexisse peccatum adpellari, quod  
« vere, et proprie peccatum sit, sed quia  
« ex peccato est, et ad peccatum inclinât.  
» Si quis autem contrarium senserit, ana-  
» thema sit ».

VII. His opportune animadversis, iam ha-  
bes, quo nostra tendat oratio. At quandoqui-  
dem Augustinum nobis sequi ab initio, pro-  
positum est, quo potissimum duce, ac com-  
mitone debellata Pelagiana hæresis est, pro-  
fecto huius in re proposita permagni duco  
adsequi mentem. Sed neque multis opus. Si-  
ve enim Sanctissimi Patris libros de peccato-  
rum meritis, et remissione discutiamus, sive  
quos adversus Pelagianos scripsit, in eo to-  
tum esse manifestissime videmus, ut duo in

originali peccato distinguat , *reatum* nempe ,  
 et *concupiscentiam* , quorum ille per baptis-  
 mi lavacrum solvitur , haec , illo soluto , in  
 adultis ad agonem usque manet *ut non su-  
 perbiat sanctitas , dum pulsatur infirmitas ,  
 utpote quae transiit reatu , et manet actu.*  
 Scilicet igitur peccatum originale est concu-  
 piscencia cum reatu. Quod ita pronunciamus,  
 ut toto coelo ab novatorum deliramentis di-  
 stemus. Illi enim , quum in renatis rema-  
 neat concupiscentia , effutiunt perdurare iti-  
 dem originalis culpa reatum , neque deleri ,  
 sed tegi dumtaxat , ac tantum non imputari.  
 Nos contra unum ab altero cum Augustino  
 distinguentes , reatum quidem omnino remit-  
 ti in baptismo , delerique quidquid veram et  
 propriam peccati rationem praesefert , profi-  
 temur ; concupiscentiam vero remanere.

VIII. Id quod ipso praecunte Augustino  
 expressissime docuit S. Thomas (*I. 2. Quaest.*  
*82. art. 3. )* « Est attendenda caussa origi-  
 » nalis peccati ex caussa originalis iustitiae ,  
 » quae ei opponitur. Tota autem ordinatio  
 » originalis iustitiae ex hoc est , quod volun-  
 » tas hominis erat Deo subiecta. Quae qui-  
 » dem subiectio primo , et principaliter erat  
 » per voluntatem , cuius est movere omnes  
 » alias partes in finem. Unde ex aversione

« voluntatis a Deo consecuta est inordinatio  
« in omnibus aliis animae viribus. Sic ergo  
« privatio originalis iustitiae, per quam vo-  
« luntas subdebatur Deo, est formale in pec-  
« cato originali; omnis autem alia inordina-  
« tio virium animae se habet in peccato ori-  
« ginali, sicut quiddam materiale. Inordina-  
« tio autem aliarum virium animae, praeci-  
« pue in hoc attenditur, quod inordinate  
« convertuntur ad bonum commutabile; quae  
« quidem inordinatio communi nomine potest  
» dici concupiscentia. Et ita peccatum origi-  
« nale materialiter quidem est concupiscen-  
« tia, formaliter vero est defectus originalis  
« iustitiae ». Quod ipsum fusissime alibi,  
et invictissimis argumentis evincit. *Lib. II.*  
*Sentent. Dist. XXX. quaest. I. art. 3.*

IX. Fortasse autem mirari quis posset,  
quod concupiscentia statuatur peccati origina-  
lis materia quum reipsa non sit nisi eiusdem  
peccati effectus. Plane ita se se rem habere,  
ultro damus, si actuale Adae peccatum atten-  
datur, in quo primum quidem iustitiae ori-  
ginalis privatio, deinde vero rebellio partis  
inferioris contra rationem, tum et virium  
deordinatio intelligitur. Verumtamen si pec-  
catum ipsum spectetur, prout origine in po-  
steros descendit, tunc utrumque simul est,

aversio nimirum a Deo, et conversio ad creaturas, seu inordinata rerum creaturarum concupiscentia. Peccatum enim originale, est peccatum habituale, cuiusmodi in Adamo fuit a primo ruinae suae momento ad momentum usque illud, quo Divina vocante misericordia in poenitentiam est adductus. Tunc autem peccati reatus, seu quod in ipso formale est, remissum omnino fuit; mansit tamen concupiscentia, iustitiam enim originalem amplius non recuperavit Adam, quantum ad inferiorum virium subordinationem, corporisque immortalitatem. Porro quod de Adamo dices, idem et de posteris eius teneas, qui nascuntur originali labe foedati; nempe habitualiter aversi a Deo, et inordinate conversi ad creaturas. In regeneratione autem baptismatis tollitur quidem aversio a Deo, in qua situm est formale, sive reatus peccati; remanet tamen concupiscentiae fomes, qua ad inordinatam conversionem ad creaturas sollicitamur, cui quidem gratia Dei auxiliante resistendum nobis maximopere est. At haec summis digitis attigisse, fortasse sufficit.

## S E C T I O VIII.

*Liberum humanae voluntatis arbitrium  
Originali peccato infirmatum, non  
autem extinctum. Scripturae expli-  
cantur.*

I. **A**rbitrii libertatem, quae veram, atque absolutam quamcumque a se eliminat necessitatem, adhuc post originale peccatum in hominibus superesse, adprime abundeque docent Scripturae. Hinc Geneseos IX. Adamum adloquitur Deus: *Nonne si bene egeris, recipies, si autem male, statim in foribus peccatum aderit? Sed sub te erit appetitus ejus, et tu dominaberis illius.* Adhuc et clarius testimonium habetur Deuteronomii XXX. 19. *Testes invoco coelum, et terram, quod proposuerim vobis vitam, et mortem, et benedictionem, et maledictionem. Elige ergo vitam, ut et tu vivas; et semen tuum.* Sed omnino peremptoria sunt Ecclesiastici XV. 14. verba: *Deus ab initio constituit hominem, et reliquit illum in manu consilii sui: adiecit mandata, et praecepta sua. Si volueris mandata servare, conservabunt te. Ap-*



*posuit tibi ignem et aquam, ad quod volueris, porrige manum tuam: ante hominem vita, et mors, bonum, et malum, quod placuerit ei dabitur illi. Liberum ergo arbitrium originali culpa infirmatum quidem est, non autem ablatum.*

II. Quid quod in veteris novique Testamenti Tabulis ubique patent pollicitationes, comminationesque, praecepta, consilia,hortamenta, ac increpationes, terroresque, quae cui bono tandem cederent, nisi superesset in nobis recte aut male operandi arbitrium?

III. Porro autem supervacaneum videtur, Augustini mentem hoc in negotio perscrutari, quo nimirum strenuissime pro humana libertate dimicante, prostratos scimus Manichaeos (56). At ne malesanus quis fortasse arbitretur, Augustinum variatis hostibus animum variasse (57), omnino praestat, et con-

---

(56) Conferas quae S. Doctor *contra Faustum* scripsit; et tres libros *de libero arbitrio*.

« Quaecumque est ista causa, inquit S. Doctor,  
« voluntatis, si ei non potest resisti, sine peccato ei ceditur . . . quis enim peccat in eo,  
« quod nullo modo caveri potest? peccatur autem,  
« caveri igitur potest ». Similia habet in *Lib. de duab. animab. Cap. XII.*

(57) Pugnat Augustinus cum Manichaeis,

stantis eius doctrinae momenta ex illis potissimum contradere libris, quos contra Pelagianos scripsit. Hinc tumultuantibus Pelagianis, quod gratiae nomine fatalem induceret necessitatem, non tantum invictissimus Doctor non cessit, sed corruptores liberi arbitrii eos incusavit.

IV. Quin iisdem Hieronymi verba ex libro secundo contra Iovinianum Augustino obiectantibus: *Liberi arbitrii nos condidit Deus, nec ad virtutem, nec ad vitia necessitate trahimur, alioquin ubi necessitas, nec coro-*

---

et Pelagianis. Illi animam in homine sua-pte natura malam esse effutiebant, eoque non libera voluntate sed naturali quidem necessitate peccare. Pelagiani vero quum originale peccatum denegarent, item et animae vulnera infirmitatemque, adeoque et gratiae necessitatem denegabant. Oportuit igitur primos ita obstringere, ut peccata patrari libera voluntate faterentur, hos vere premere ut libertatem non extinctam, nec tamen robustam remansisse, sed peccati pravitate sauciatam tenerent, ut ita Liberatoris gratia, qua sanaretur, indigeret. Hinc Augustinus et liberum arbitrium adversus Manichaeos obtendebat, gratiae vero necessitatem contra Pelagianos. Duplicem hanc Augustini pugnam qui sedulo perpendit, levissimo habitu adversariorum cavillationes exsufflabit.

na est , opportune respondit in libro de natura, et gratia *Cap. LXV.* « Quis non agnoscat ? quis non toto corde suscipiat ? Quis » aliter conditam humanam neget esse naturam » ? Mox egregie suam explicat mentem in Epistola CCXV. » Fides sana catholica neque liberum arbitrium negat , sive » in vitam malam , sive in bonam , neque » tantum ei tribuit , ut sine gratia Dei valeat » aliquid ». Et ideo quum Iulianus conquereretur , eos , qui liberum profitebantur arbitrium , *Coelestianos* , et *Pelagianos* per iniuriam vocari , respondet Augustinus , *Pelagianum* , et *Coelestianum* non dici , qui liberum adserit arbitrium , quod fide catholica certum est , sed qui liberum quemquam esse adfirmat ad agendum sine Dei adiutorio. Et in Libro de spiritu , et littera *cap. XXXIV.* » vult autem Deus omnes homines salvos fieri , » et ad agnitionem veritatis venire ; non sic » autem , ut eis adimat liberum arbitrium , » quo vel bene , vel male utentes iustissime » iudicentur ».

V. Porro tandem ut Augustini mentem intime quisque adsequatur , id proferam , quod *Lib. I. contra duas epist. Pelag. cap. II.* Iuliano catholicis obiiicienti , quod traderent , primi hominis liberum arbitrium periisse , ca-

tholicorum omnium nomine respondet : » Quis  
 » nostrum dicat, quod primi hominis pecca-  
 » to perierit liberum arbitrium de humano  
 » genere ? libertas quidem periit per pecca-  
 » tum, seu illa, quae in paradiso fuit, ha-  
 » bendi plenam cum immortalitate iustitiam,  
 » propter quod natura humana divina indiget  
 » gratia, dicente Domino : *si vos Filius li-*  
*beraverit, tunc vere liberi eritis*, utique  
 » liberi ad bene iusteque vivendum.

VI. Profecto autem longius nostra haec ex-  
 curreret oratio, si Patrum omnium unde un-  
 de couradendis testimoniis huc adlaboraremus.  
 Quorum instar pauca praestat producere, et  
 ex illis quidem, qui orta iam Pelagiana hae-  
 resi scripserunt. Huiusmodi est Auctor Operis  
 de Vocatione Gentium *Lib. I. Cap. VIII.*  
 » Nec quia Spiritu Dei agitur, ideo se putet  
 » homo liberum arbitrium non habere; quod  
 » nec tunc quidem perdidit, quando diabolo  
 » voluntate se dedit : a quo iudicium volun-  
 » tatis depravatum est, non ablatum ». Et  
 » Hieronymus in *Epist. ad Ctesiphontem*, in  
 Pelagium intendens inquit : *frustra blasphem-*  
*as, et ignorantiam auribus ingeris, nos li-*  
*berum arbitrium condemnare; damnetur ille*  
*qui damnat*. Bernardus demum *Serm. VIII.*  
*in Cantic.* » Arbitrii libertas est plane divi-

» num quiddam refulgens in anima , tamquam  
 » gemma in auro. Ex hac nempe inest illi  
 » inter bonum quidem , et malum , nec non  
 » inter vitam et mortem , sed et nihilo mi-  
 » nus inter lucem , et tenebras , et cognitio  
 » iudicii , et optio eligendi . . . Unde et li-  
 » berum nominatur arbitrium , quod liceat  
 » versari in his pro arbitrio voluntatis. Inde  
 » homo ad promerendum potis ». Quibus ma-  
 ximum pondus accedit ex Tridentini Con-  
 cillii anathemate *Ses. VI. can. V.* » Si quis  
 » hominis arbitrium post Adæ peccatum amis-  
 » sum , et extinctum esse dixerit ; aut rem  
 » esse de solo titulo , imo titulum sine re ,  
 » figmentum denique a satana invectum in  
 » Ecclesiam , anathema sit ».

VII. Scio autem adversarios Paulli Aposto-  
 li verba in *Ep. ad Roman. VII. 15.* potis-  
 simum urgere , quibus nullam in hominibus  
 arbitrii superesse libertatem inclamant. Inquit  
 enim : *Non enim quod volo bonum , hoc ago ,*  
*sed quod odi malum , illud facio . . . nunc*  
*autem iam non ego operor illud , sed quod*  
*habitat in me peccatum . . . Video autem*  
*aliam legem in membris meis repugnantem*  
*legi mentis meae , et captivantem me in lege*  
*peccati.* Sed Paulli mentem vel non adsequun-  
 tur stolidi , vel non adsequi fingunt impuden-

tes. Non enim Apostolica verba de voluntatis actibus sunt intelligenda, sed de concupiscentia carnis, effraenibusque eius motibus, quibus voluntas non consentit, nisi libere; quibusque profecto divina adiuvante gratia resistere posset; nam idem Apostolus ad *Galat. v. 17. Caro, inquit, concupiscit adversus spiritum, spiritus autem adversus carnem.* Igitur est Apostolicus sensus: etsi vellem non concupiscentiam sentire, quod malum est, nihilominus eius motus patior; bonum est concupiscentiae motus non experiri, malum est eius agonem sustinere; quod volo bonum, non adsequor; quod nollem malum suffero.

VIII. Sed quoniam in hunc Apostoli locum nos conijicere placuit adversariis, e re maxime censeo occasionem inde eiusdem paullo fusius intrepertandi arripere. Apostolus inquit: *Ego autem carnalis sum, venundatus sub peccato.* Quod quidem adprime in Christi Domini effatum coincidere videtur *Ioan. VIII. 34. omnis qui facit peccatum, servus est peccati.* Ecquod igitur est in peccatoribus liberum arbitrium, si qui peccat, servus est peccati? Sed Paullus se venundatum sub peccato dixit, quod eius ratio a carnis concupiscentia oppugnabatur, concupiscentia vero ex primo hominis peccato ortum habuit, ideoque

peccatum dicitur , non quod peccatum sit , sed quod ex peccato est , et in peccatum inclinatur , et etiam nobis invitis prava excitat desideria. Haec qui sedulo perpendit , intelliget se certe sub peccato venundatum. Quod autem peccatores ex Christi Domini effato servi sunt peccati , non est ita intelligendum , ut libero voluntatis arbitrio sint prorsus exspoliati , sed potius quod pravis habitibus implicati , voluntarie peccato obediunt , velut servi domino ; unde Bernardus *Serm. LXXXI. in Cantic.* » Voluntas est quae se , quum esset libera , servam fecit peccati , peccato assentiendo ». Subdit Apostolus : *video aliam legem in membris meis repugnantem legi mentis meae , et captivantem me in lege peccati.* Sed quae ista lex est in membris nostris , nisi concupiscentiae vis inclinantis nos in peccatum , quam habemus in membris , nimirum in adpetitu sensitivo per omnia membra diffuso. » Lex ista peccati ( inquit Augustinus *Lib. II. contr. Iulian.* ) quae in membris est corporis mortis huius , et remissa est regeneratione spirituali , et manet in carne mortali ; remissa scilicet , quia reatus eius solutus est Sacramento , quo renascuntur fideles ; manet autem quia operatur desideria , contra quae dimicant et fideles ». Sed mul-

tum fortasse est quod hanc legem *captivantem* adpellat Apostolus? Verum et hanc explicat vocem Augustinus (*Lib. I. de nupt. et concupiscent.*) nempe *captivare conantem*, id est *ad consentiendum implendumque cogentem*, cui et non adsentiri ex Divina gratia possumus.

IX. Nihil vero miror magis, quam quod Augustini patrociniò saepenumero ipsi gloriantur liberi arbitrii osiores. Insaniamne istam dicamus, an impudentiam? Age videamus. Irruunt quidem, et satis audacter in nos, quod aperte dixerit Augustinus in Enchiridio *Cap. XXX.* » Libero arbitrio male utens homo et » se perdidit, et ipsum: itaque cum libero » peccatur arbitrio, victore peccato, amissum est liberum arbitrium ». Egregie Pelagiani! Sed resistant parumper, sinantque Augustinum ab Augustino explicari. Locupletissimus est locus in *Epist. CCXVII. Cap. IX. ad Vitalem*, ubi Sanctus Episcopus aperte inquit: *Liberum arbitrium ad diligendum Deum primi peccati granditate perdidimus.* Videant igitur Pelagiani, in quo Augustinus sitam dixerit liberi arbitrii iacturam, nempe ad diligendum Deum; ex quo patet non de naturali libertate loquutum, sed de supernaturali ad aliquid boni salutaris agendum, nisi



Christus Dominus sua gratia nobis hanc ipsam restituat libertatem. Et re quidem vera in eodem Enchiridii capite, ubi dixisset nos propter Adami culpam factos peccati servos, e vestigio subdit: » Ac per hoc ad peccandum » liber non erit, nisi a peccato liberatus, » esse iustitiae coeperit servus, sed ad bene » faciendum, ista libertas unde erit homini » addicto, et vendito, nisi redimat, cuius » illa vox est Ioan. VIII. 36. . *Si vos filius » liberaverit, tunc vere liberi eritis?* quod » antequam fieri in homine incipiat, quomo- » do quisquam de libero arbitrio in bono glo- » riatur opere, qui NONDUM EST LIBER » AD OPERANDUM BENE, nisi se vana » superbia extollat »? Igitur Augustiniani textus, quem perperam Pelagiani sollicitant, hic sensus est, nos peccato Adae iustitia originali spoliatos, factosque diaboli captivos, non posse viribus liberi arbitrii aliquid boni supernaturalis agere; posse id vero cum gratia Domini nostri Iesu Christi reparante, et sanante, quae est omnino ad amissae iustitiae recuperationem necessaria (58).

---

(58) Quin heic opportunum censeo ( ne in tu-  
endo libero arbitrio quis exorbitet fortasse ) id  
iterum inculcare, quod Sanctus Hipponensis Pon-  
Tom. V. 8

X. Hac munita via , constabit et Augustini mens alibi dicentis *De Civit. Dei Lib. XIV. Cap. XI. Arbitrium voluntatis tunc est vere liberum , quum vitiis , peccatisque non servit. Tale datum est a Deo , quod amissum proprio vitio , nisi a quo dari poterit , reddi non potest.* Nec vero longe absimile puto , quod idem Augustinus dixerat *Lib. de perfect. iustit. Quia peccavit voluntas , sequuta est peccantem , peccatum habendi dura necessitas ;* quo loco Sanctus Episcopus impotentiam resurgendi a peccato demonstrabat , in quam ex perversa Adami voluntate lapsi sumus , nisi Deus sua gratia ab eo nos liberaverit ; proindeque infert , non sequutam hinc esse *peccandi* necessitatem , sed *peccatum habendi*. Pugnabat tunc enim Augustinus cum Coelestio de peccato originali , cui quaerenti : *per quid efficiatur homo cum pecca-*

---

tifex continuo docuit , liberum nempe arbitrium sine gratia ad malum valere , ad salutaria autem opera nihil valere. *Hacc voluntas* ( verba sunt Augustini *Lib. I. ad Bonif. Cap. III.* ) *quae libera est in malis , quia delectatur malis , ideo liberā in bonis non est , quia liberata non est ; nec potest homo boni aliquid velle , nisi adiuvetur ab eo , qui malum non potest velle , hoc est gratia Dei per Iesum Christum Dominum nostrum.*

to, *per naturae necessitatem, an per arbitrii libertatem?* respondit Sanctus Episcopus: *per arbitrii libertatem factum ut esset homo cum peccato, mox subdit: sequutam esse peccatum habendi duram necessitatem, donec tota sanetur infirmitas, et accipiatur tanta libertas, in qua sicut necesse est, permaneat bene vivendi et numquam peccandi voluntaria, felixque necessitas.* Impotentiam autem non resurgendi a peccato sine gratia, nihil nostrae officere libertati, quisquis ultro fatebitur.

## AUCTARIUM

*Quomodo in omnes Adae posteròs  
Originale peccatum traducatur.*

**T**ametsi a tricis omnino nostrum abhorreat institutum, haud abs re tamen esse censeo, quid lucis in tenebricosam hanc, ac spinis qua qua versus obsitam quaestionem, adversus insanientes Pelagianos contulerit Augustinus, brevi sermone aperire.

Interpellantibus itaque Sanctum Hipponensem Episcopum Pelagianis, quo potius pacto originale peccatum nobis voluntarium, et li-

berum dici posset, constans is, ac pro veritate firmissimus in eo asseverando versatus est, Adae peccatum liberum ac voluntarium nobis fuisse voluntate et libertate Adami, in in quo omnes continebamur, et a quo naturam lethali contagio infectam GENERATIONE TRAHIMUS. Qua in re et Beatissimi Ambrosii Mediolanensis Episcopi usus est auctoritate ( *Lib. I. Oper. Imperf. Cap. XLVII.* ) *Fuit Adam, et in illo fuimus omnes, periit Adam, et in illo omnes perierunt.* Nimirum omnes in Adamo fuisse inquit Ambrosius *non propter arbitrium singulorum* ( verba sunt Augustini Libro IV. contra Iulianum ) *sed propter originem seminis, unde omnes futuri erant: secundum quam originem omnes in illo uno erant, et hi omnes unus ille erant, qui in seipsis nulli adhuc erant.* Quod iterum et Levi exemplo obfirmat Sanctus Doctor, qui ( *Hebr. VII. Cap. IX.* ) decimatus a Melchisedecho in lumbis Abrahae perhibetur, in quibus erat, non secundum substantiam suam, aut voluntatem, sed secundum originem seminalem dumtaxat.

Ergo ex Augustino caussa, et quidem proxima transfusionis originariae noxae in posteros, generantium est concupiscentia, ac libido, qua corpus seminatur. Hinc ubi con-

cupiscentiam ex primo Adami peccato ortam edixisset *Serm. CLI. de Tempore*, e vestigio subdit: *Ecce unde trahitur originale peccatum; Ecce unde nemo nascitur sine peccato*. Quod alte quantum Sancti Doctoris menti insederit, hi norunt abunde, qui Augustineas concertationes adversus Italianum sedulo attenderint.

Sed ubi Augustinus versatur, ibi et Thomam habes; frequenter adeo conspirant ambo! Ecce tibi subactissimi Doctoris expressissima verba *I. 2. Quaest. LXXXI. art. 4.* » Peccatum originale a primo parente tra-  
 » ducitur in posteros, in quantum moventur  
 » ab ipso per generationem sicut membra  
 » moventur ab anima ad peccatum actuale.  
 » Non autem est motio ad generationem,  
 » nisi per virtutem activam in generatione.  
 » Unde illi soli peccatum originale contra-  
 » hunt, qui ab Adam descendant per vir-  
 » tutem activam in generatione originaliter  
 » ab Adam derivatam, quod est secundum  
 » seminalem rationem ab eo descendere; nam  
 » ratio seminalis nihil aliud est, quam vis acti-  
 » va in generatione. Si autem aliquis formaretur  
 » virtute Divina ex carne humana, manife-  
 » stum est, quod vis activa non derivaretur  
 » ab Adam; unde non contraheret peccatum

» originale ; sicut nec actus manus pertineret  
» ad peccatum humanum , si manus non mo-  
» veretur a voluntate hominis , sed ab aliquo  
» extrinseco ».

Nec vero nos id movet , quod anima tantum sit peccati subiectum , semen autem corporeum quum sit , animam non attingat , quae non generatione producitur , sed a Deo immediate creatur. Nam tametsi anima non traducatur ex carne , nihilominus vi generationis natura producitur humana , vereque dicitur homo generare hominem , quod nimirum virtute seminis eas dispositiones in materiam inducit , quas necessario anima consequitur. Porro natura humana , quae sic producitur , infecta est in Adamo , communicaturque cum peccato. Vnde Augustinus Lib. V. contr. Iulian. Cap. IV. *Alterum in altero tamquam in vase vitiato corrumpitur , ubi occulta iustitia divinae legis includitur.*

Igitur anima licet spiritualis sit , licet a Deo immediate creata , et quidem sine ulla labe , eo tamen ipso momento quo corpori iam formato ex semine Adamitico corrupto coniungitur , vitatur. Tunc enim pars hominis efficitur , qui in Adamo peccavit. Haec Augustini sententia est saepius usurpantis exemplum liquoris , qui contrahit foetorem vasis

foetidi cui infunditur. Haec ipsa sententia est Innocentii III. in *Ps. L. Ex seminibus foedatis ; et corruptis concipitur corpus corruptum pariter , et foedatum , cui anima tandem infusa corrumpitur , et foedatur , non ab integritate , vel munditia , quam habuit ; sed ab eaquam haberet , si non uniretur foedato corpori , et corrupto*. Haec demum est et Thomae Aquinatis pura puta sententia in hunc modum ( *II. dist. 30. quaest. I. art. 2. ad 3.* ) disputantis : *Anima quae tali corpori ( foedato scilicet , et corrupto ) infunditur deordinationem culpae contrahit ex hoc ipso , quod huiusmodi corporis forma efficitur ; cum oporteat , perfectionem perfectibili proportionatam esse*. Et mox : *Anima non inficitur per infectionem corporis , quasi corpore agente in animam , sed per quamdam collimationem unius ad alterum ; quia forma recipitur in materia , secundum conditionem ipsius materiae , cum omne quod est in altero , sit in eo per modum recipientis*.

Atque hinc in patefacto est cur Christus Dominus non peccaverit in Adamo , nec peccatum ab illo in sua traxerit conceptione ; tametsi enim aliquo fuerit modo in primo homine , quod ex eo per Beatam Virginem Mariam descenderet , in eo tamen non fuit se-

cundum rationem seminalem ; virili quippe natus semine non erat. Audiamus in hunc sensum disputantem Augustinum *Lib. V. adv. Julian. Cap. XV.* » Hinc apparet , illam » concupiscentiam , per quam Christus concipi noluit , fecisse in genere humano pro- » paginem mali ; quia Mariae corpus quam- » vis inde venerit , tamen eam non traiecit » in corpus , quod non inde concepit . . . » Caro itaque Christi mortalitatem de mortalitate materni corporis traxit , quia mortale corpus eius invenit ; contagium vero » peccati originalis non traxit , quia concubentis concupiscentiam non invenit ». Adhuc et insignem prae manibus habeo Sancti Anselmi locum ( ex *Libro de Conceptu Virginis Cap. XXIII.* ) In illa , Beata Virgine , nec voluntas creaturae prolem seminavit , nec natura germinavit , sed Spiritus Sanctus , et Virtus Altissimi de Virgine muliere virum mirabiliter procreavit. Valde itaque diverso modo Christus erat in Adam , quando peccavit , quam erant alii , qui voluntario , et naturali cursu procreantur. Istos quodammodo facit Adam , quos per acceptam potestatem humana voluntas seminando , et natura germinando procreavit. Istum vero non nisi Deus fecit , quamvis de Adam ; quia



*non per Adam , sed per se velut de suo. Id vero tum fusius alibi , tum uno et altero verbo expressius docet Thomās ( Quaest. 81. art. 7. ) Ex hoc quod Christus fuit conceptus ex Virgine sine virili semine , habuit quod non contraheret peccatum originale.*

Atque haec habui quae dicerem de implicatissima quaestione hac , quae firmitatis multum , multumque roboris ex robusta quadam Augustini constantia hauriunt. Ceterum antequam manum de tabula , praestat et id monere , quod Sanctus Episcopus scripsit in Epist. CLVII. ad Hieronymum : » Quum quidam ruisset in puteum . . . accessit alius , » et eo viso , admirans ait : quomodo huc » cecidisti ? At ille : obsecro inquit , cogita » quomodo hinc me liberes , non quomodo » huc ceciderim quaeras. Ita quoque fatemur , » et fide Catholica tenemus , de reatu peccati , tamquam de puteo , etiam parvuli » infantis animam Christi gratia liberandam ; » satis est ei quod modo , quomodo salva » fiat , novimus ; etiamsi numquam quomodo in malum illud devenerit , noverimus ».

## CAPUT III.

**QUI HOMINES SANARET LIBERATOR PROMITTITUR. IN HUIUS FIDE SALVI FACTI SUNT VETERES IUSTI.**

I. **A**t o miserum hominem, si Deus iustus tantum, non autem misericors esset! Vt enim nos diabolica malignitas veneno suae mortificavit invidiae, praeparata renovandis mortalibus suae pietatis remedia inter ipsa mundi primordia praesignavit Deus, iam tunc ex illo prolapsionis momento denuncians, Liberatorem venturum Filium suum in carne, qui genus omne humanum, in Adam tamquam in radice vitiatum sanaret, sempiternaeque illud mortis damnationisque poena obstrictum, de diaboli iugo, tenebrarumque potestate eriperet.

II. Hinc ubi peccatum intravit in mundum, et per peccatum mors, eccillam in homicidam diabolum Dei vocem exsertam ( *Gen. III. 15.* ) *Inimicitias ponam inter te, et mulierem, et semen tuum, et semen illius, ipsa conteret caput tuum, et tu insidiaberis calcaneo illius.* Quo divino effato

spem futurae per Christum Redemptionis, cuius fides ad salutem consequendam necessaria est, Deus ab initio mundi praemonstravit; Cuius et fides vivacissima perpetuo apud Adae filios, nepotes, progeniemque eorum servata est, atque ad seram posteritatem transmissa.

III. Verum ut invidia diaboli peccatum primo intravit in mundum, ita eiusdem dolis mox adeo scelera exundarunt in terris, ut perdere constituerit Deus hominem quem creavit. Deleta hinc fuit universali diluvio iniquitas terrae, et vera Dei religio in una Noe mansit familia, quae a communi generis humani exterminio servata est. Noe vero vir iustus fuit, eiusque in futurum Liberatorem fides commendatur ab Apostolo (ad *Heb. XI. 7.*) *Fide Noe responso accepto de iis quae adhuc non videbantur, metuens aptavit arcam in salutem domus suae, per quam damnavit mundum, et iustitiae, quae per fidem est, heres est institutus.* Porro haec fidei hereditas per Sem et Iaphet (Cam paterna maledictione obstricto) ad posteros est derivata.

IV. Quum vero et in ipsa Sem, et Iaphet progenie fides sensim imminueretur, atque demum abs via iustitiae aberrantes homines, gloriam incorruptibilis Dei commutassent in

similitudinem imaginis corruptibilis hominis , et volucrum , quadrupedum , et serpentium , suscitavit Deus fidelem Abraham Patrem omnium credentium , cui promissiones venturi Liberatoris expressius renovavit. Duplex autem Abrahae a Deo facta est pollicitatio ; altera terrae Chanaan eius posteritati donandae ( *Gen. III. 15.* ) , altera longe praestantior de venturo Messia , ac Liberatore Christo ex sua stirpe nascituro. Quam quidem promissionem non vice simplici datam , ut immobilitatem consilii sui ostenderet Deus , iuramento tandem firmavit , quum Abrahae obedientiam vidisset in immolatione Isaac filii sui unigeniti ( *Gen. XXII. 16.* ) *Per me-  
metipsum iuravi . . . benedicam tibi . . .  
et benedicentur in semine tuo omnes gentes  
terrae , quia obedisti voci meae.* Quam pollicitationem iam in plenitudine temporis adimpletam respexit Christus Dominus de Abraham inquit ( *Ioan. VIII.* ) *Abraham pater vester exsultavit ut videret diem meum ; vidit et gavisus est ;* ex quo abunde cuivis patebit , Abraham fide incarnationem Christi credidisse.

V. Quemadmodum vero in Abrahamo gratuitam suae voluntatis praedestinationem misericordissime ostenderat Deus ; quippe gra-

tuito is unus ex omni populo vocatus, in quo benedicerentur gentes omnes; ita quum Abraham duos habuisset filios, gratuito Ismaeli praelatus est Isaac, ut esset heres paternae benedictionis, unde huic dictum a Deo ( *Gen. XXVI.* ) *Et benedicentur in semine tuo omnes gentes terrae.* Iterum Isaac quum geminos habuisset filios Esau, et Iacob, gratuito Iacob natus minor dilectus est, quocum foedus sancivit Deus, quando in somnis scalam stantem super terram vidit, cuius cacumen coelos tangebatur, Angelos vero Dei per eam adscendentes, et descendentes, audivitque Dominum scalae innixum sibi dicentem ( *Gen. XXVIII.* ) *Ego Dominus Deus Abraham Patris tui, et Deus Isaac . . . benedicentur in te, et in semine tuo cunctae tribus terrae.* Demum Iacob quum duodecim suscepisset filios; tametsi singulis hereditatem terrae Chanaan partitus esset, gratuito tamen Iudae inter omnes fratres id concessum, ut ex eo Messias ortum traheret. ( *Gen. XLIX. 8.* ) *Iuda, te laudabunt fratres tui . . . adorabunt te filii Patris tui: non auferetur sceptrum de Iuda, et Dux de femore eius, donec veniat qui mittendus est, et ipse erit expectatio Gentium.*

VI. Quod autem Abrahae sponderat Deus;

se suis posteris terrae Chanaan possessionem, daturum, complere constituit. Quamobrem Hebraicum populum ex Aegypti captivitate, qua per annos fere ducentos detinebatur (59), quemadmodum praedixerat ( *Gen. XV. 14.*) mirabili modo liberat; iter illi praeterea per medium rubri maris aperiendo, ut divisis aquis, cedentibusque in latera, veluti per continentem ambularent. Mox et legem suo scriptam digito; in monte Sinai inter fulgura, et tonitrua promulgatam Mosis tradit

---

(59) Jacob descendit in Aegyptum anno mundi MMCCXCVIII. Exodus contigit anno mundi MMDXIII. ergo captivitas Hebraeorum in Aegypto fuit annorum CCXIII. At quorsum haec inquires? vel ideo, ut quomodo computus iste conciliandus sit cum Scripturae loco *Erod. XII. 40.* *Habitatio autem filiorum Israel qua manserunt in Aegypto, fuit quadrigentorum triginta annorum,* quisque videat. Belle omnia constant, si Hebraeam lectionem ita vertes: *Peregrinatio autem filiorum Istraël, qui (non qua) manserunt in Aegypto; fuit CCCCXXX. annorum* Quam lectionem firman- cum Septuagintaviralis versio, tum Codex Samaritanus, qui hos CCCCXXX. annos a peregrinatione Abrahae numerandos expriment; quemadmodum et sentiunt Patres fere omnes, et accepit textum Apostolus *ad Galat. III. 16.*

( *Exod. XXIV.* ) cuius scopus in fide ac spe venturi Messiae versatur. Inquit enim Apostolus *ad Rom. X. 4. Finis legis Christus* ; Et *ad Gal. III. 25. Prius quam veniret fides , sub lege custodiebantur conclusi in eam fidem , quae revelanda erat.* Hinc sacrificia , expiationes , ac Sacramenta legis nonnisi Christum Redemptorem praefigurabant, ut enim ait Paullus ( *I. ad Cor. X. 11.* ) *Omnia in figuris contingebant illis.* Quod et ipse palam fecit Liberator Christus Dominus noster in Evangelio , inquit ( *Luc. cap. ult.* ) *Necesse est impleri omnia , quae scripta sunt in lege Moysi , et Prophetis , et Psalmis de me.* Et *Ioan. V. 46. Si crederetis Moysi , crederetis forsitan et mihi , de me enim ille scripsit.*

VII. Atque demum constituta Iudaeorum , qui ex genere Abrahami erant , Republica , tantis de venturo Liberatore promissionibus tanta successit vaticiniorum seges , ut si futuri , et praeteriti temporis tollatur diversitas , nihil iam inter Prophetarum vaticinia , et Apostolorum Praedicationem ; nihil inter veterum Patriarcharum fidem , et nostram interesse videamus. Et tempus enim , quo Divinus Liberator venturus erat , praenunciatum est *Gen. XLIX. 10.* quum nimirum sceptrum a Iuda

defecisset. Praenunciata est Christi ex Virgine conceptio *Isaiae VII. 14. Ierem. XXXI. 22. Ezech. XLIV. 2.* Praenunciatus est et locus in quo nasceretur, nimirum Bethalem (*Mich. V. 2.*) Praenunciata Innocentium strages, Christi in Aegyptum fuga, praedictio, miracula, passio, et ea omnia minutatim, quibus Christus redemptionis nostrae opus consummavit, de quibus loco suo fusissime agemus.

VIII. Interea inter tot clarissimas Dei pollicitationes, Prophetarumque vaticinia ab ipso mundi primordio, sive ab Adami lapsu, in quo genus omne peccavit humanum, ad plenitudinem usque temporis, quo Salvator advenit per saecula benedictus, typi multi, ac mysteria per omnem aetatem emicuērunt, quibus futurus Liberator Christus praesignabatur. Huc ferebatur Noe a diluvio servatus, redemptionis Christi; cuius pretio electi salutem consequuntur, illustris typus (60). Huc Abra-

---

(60) Quid quod Arca etiam figura Ecclesiae, et Baptismi erat haud obscura; nam sicuti extra arcam omnes perierunt, ita extra Ecclesiam omnes peribunt; et sicuti peccatores omnes aquis diluvii submerguntur, ita peccata omnia aquis Baptismi diluuntur. Conferas in hunc sensum Originem *Hom. XI. in Genes.* S. Ambrōsium *de Noe,*



ham tendebat Pater omnium credentium (61).  
 Huc Isaac suis humeris ligna ad sacrificium  
 baiulaturus, Christum designans crucem suis  
 item humeris gestaturum ad mortis locum (62).

*et arca Cap. V. S. Augustinum Tract. VI. in  
 Evang. Joan. Cap. I. Et de Civit. Dei Lib.  
 XV. Cap. XXVI. Et contra Faustum Lib. XII.  
 Cap. XIV. S. Gregorium Magn. Lib. II. Homil.  
 XVI. in Ezechielem.*

(61) Foedus praeterea, Deum inter et Abraham  
 initum, typus foederis fuit longe illustrioris Chri-  
 stum inter et Christianos, olim, et in aeternum  
 ineundi. Terra etiam Chanaan Abrahae, et semi-  
 ni eius promissa, typus aeternae in coelo beatitu-  
 dinis erat, Christianis omnibus promissae, [quo-  
 rum Abraham Pater fuit; ipse enim pater omnium  
 credentium. Videsis quae supra occupavimus in  
 nostro Apparatu Theolog. Diss. 1. Cap. II. de  
 duplici populo Dei foederato, Hebraeo, Christia-  
 noque pag. 7.

## EXCURSUS.

*De Isaaco Christi typo omnium  
 insignissimo.*

(62) Temperare at nunc me nequeo, quin heic  
 consistam aliquantulum, et quam multa in uno  
 Isaaco lateant, quae Christum, interprete nullo,

*Tom. V.*

Huc spectabat Ioseph vel a fratribus venditus, vel tunica exutus, vel in lacum missus, vel

nominatim veluti demonstrant, paullo accuratius aperiam. I. Vterque nascitur per miraculum, Isaacus ex matrice mortua, Christus ex Virginea. II. Ille Abrahamo, hic orbe ad senium vergente. III. Ille per annos quadraginta, hic per quadraginta saecula promissus. IV. Vtriusque conceptio nunciatur ab Angelo. V. Illius mater Sara inquit *quomodo hoc fiet, nam ego iam consenui?* huius mater Maria dixit: *quomodo hoc fiet, nam non novi virum?* VI. In plenitudine temporis, Dominus ridere me fecit, inquit Sara; et quotquot audient mecum ridebunt; Pariter Maria: *Anima mea exultavit in Domino servatore meo, et omnes gentes me beatam praedicabunt.* VII. Filius servae Aegyptiae (Iudaeorum figura, teste Apostolo *ad Galat. IV.*) deridet filium liberae, et ideo pellitur ex aedibus paternis, sic primus ille filius Israel, quia Isaaci nostri parvitatem habuit contemptui, noluitque osculari verum Filium, exclusus est, et pulsus e domo Patris. VIII. Vterque est filius unicus, nam ut Isaacus (Gen. XXII. 2.) ita et Christus dicitur unigenitus a Patre. IX. Filius ille dilectus et germanus (Gen. ibid.) ita et Christus (Matth. III.) *Hic est filius meus dilectus, in quo mihi bene complacui.* X. Vterque a Patre morti traditur; de Isaaco (Gen. XXII. 12.) *Non pepercesti proprio filio.* De Christo (ad Rom. VIII. 31.) *Deus proprio filio non pepercit.*

demum ad salutem Aegyptiorum, Israelitarumque in solio exaltatus, ut Christi insignis es-

XI. Pater uterque misericors; grave est Abrahamo etiam derisorem Ismaelem domo ejicere: quanto gravius mactare filium; Deus similiter non vult mortem peccatoris, quanto minus iusti et innocentis. XII. Vt ergo Deus Abrahamo dicit: *Nunc cognovi quod times Deum, et non pepercisti unigenito filio tuo propter me*, ita et concludit Apostolus ad Rom. V. et VIII. 32. *Qui proprio filio suo non pepercit, sed pro nobis omnibus tradidit illum, quomodo non etiam cum illo omnia nobis donavit?* Et Iohannes, ( I. Ioh. IV. 9. ) *In hoc apparuit charitas Dei in nobis, quoniam filium suum unigenitum misit Deus in mundum.* XIII. Vterque igitur a Patre morti traditur, quia in illo amor Dei, in hoc amor hominis morte potentior, et zelus sepulcro durior. XIV. Iam si mortis circumstantiae spectentur, in eadem terrae plaga fit utrumque sacrificium. Nam Isaacus offertur in Monte Morijah, atque in illo ipso tractu ubi Hierusalem, et templum aedificata leguntur; et vero in ipso monte Golgotha, si Hieronymo, et aliis ante ipsum credamus, oblatas est Isaacus. Certe ad nomen Morijah videtur alludere Salomon ubi agens de Christi morte, quo moriente umbrae legis dissipari debuerunt: *Antequam*, inquit, ( Cantic. IV. 6. ) *umbrae fugiant, conscendam montem Mor, myrrhae.* Mor typice, et poetice dictum pro Morijah. XV. Id Sacrificium soli Abrahamo notum, ignotum

set figura, quem Iudas vendidit, quem Iudaei tunica exutum crucifixerunt, qui et mor-

erat servus, qui ad montem usque eum erant comitati; sic et Mysterium mortis Christi *in Deo absconditum omnes homines latebat*. XVI. Vterque innocens. XVII. Isaacus lignum in montem Morijah, Christus crucem gerit. XVIII. Isaaco ominosum hoc verbum excidit, cum iam ligauit, et cultrum, et funes, et ignem videret, quasi coherrescenti ad spectaculum tam tristici ministerii; *Pater mi, ecce ignis, et ligna: sed ubi est victima?* Statim tamen acquiescit Patris responso, *Dominus providebit*. Ita et Christus, quum instaret hora mortis, et sudavit grumos sanguinis, et oravit, et dixit: *Pater mi, si fieri potest, transeat a me calix iste*; statim tamen hoc addit, *fiat voluntas tua*; ut sciamus eum itidem totum a Deo pendere voluisse. XIX. Vt ergo Isaac, qui ex senilibus manibus facile potuisset evadere, obtemperare maluit, et Patri ad mortem usque obedientem se praebere; Ita et Christus, qui nihil non poterat in coelo, et in terra, et ad auxilium multas Angelorum legiones facile advocasset, ultro se se obtulit (Phil. II. 8.) *et Patri fuit obediens usque ad mortem crucis*. XX. Isaac ligno imponitur (Gen. XXII. 9.) Christus cruci; Isaac pedibus manibusque ligatur, Christus pedibus manibusque cruci affigitur. XXI. Isaacus rogo imponitur, Christus ardorem irae paternae experitur. Sed idem Deus, qui servat Isaacum, cavet ne ullum ossium Chri-

te ac resurrectione sua futurus erat caussa salutis aeternae Iudaeis , et Gentibus (63). Huc

sto confringatur. XXII. Isaac toto triduo ambulat quasi in valle umbrae mortis ( Gen. XXII. 14. ) Christus per triduum manet in sepulchro. XXIII. Angelus mittitur , qui Isaacum liberet , Angelus mittitur qui Christum e sepulcro eximat, revoluta lapide monumenti. XXIV. Isaac *εὐπαρεσβολῇ* ( ad Hebr. XI. 19. ) similitudine resurrexit a mortuis , Christus huius similitudinis exemplar , vere resurrexit. XXV. Abrahami fides conciderat, nisi resurrexisset Isaac, eiusque spes in eo erat sita, quod *credidit Deum posse eum a mortuis suscitare*; sic inanis est nostra fides, si Christus non resurrexit ( ad Hebr. XI. 19. ) XXVI. Post hanc qualemcumque Isaaci resurrectionem succedunt benedictiones ; Abrahamo promittitur fore , ut in eo benedicantur omnes gentes ; quod sane post Christi resurrectionem demum impletum est, inquit enim Apostolus ( *ad Gal. III. 14.* ) *Ut in gentibus benedictio Abrahae fieret in Christo Iesu, ut pollicitationem spiritus accipiamus per fidem.*

Hem qui ante tot saecula nobilissimus Christi typus ! Sed manum de tabula.

(63) Dignus qui audiatur S. Caesarius *Serm. VII. in append. S. Aug.* » Ioseph per consilium » Iudae triginta argenteis distrahitur, et Christus » per consilium Iudae Iscariotis eodem numero » venundatur. Ioseph descendit in Aegyptum, et

Moses, quem Deus ducem ac liberatorem populi sui elegit. Huc liberatio populi Israelitici collimabat a longa et durissima Aegypti captivitate, in qua expressimam habes figuram liberationis universi generis humani a captivitate demonis (64). Huc Jonas incidebat in

---

» Christus in mundum. Ioseph a penuria frumenti  
 » salvat Aegyptum; et Christus a fame verbi Dei  
 » liberat mundum. Nisi enim Ioseph fratres sui  
 » vendidissent, defecerat Aegyptus. Fratres, ve-  
 » rum est, nisi Christum Iudaei crucifixissent, pe-  
 » rierat mundus ». Vid. Tertullian. *advers. Iudaeos*  
*Cap. X. et adv. Marcion. Lib. III. cap. XVIII.*  
 S. August. in *Ps. LXXX. n. 8.* Et inferius in  
*Ps. CIV. n. 40.* quem locum hic non praeteream  
 ad solatium eorum qui persecutionem patiuntur in  
 mundo: » si in servum venundatus Ioseph, et  
 » humiliatus, et exaltatus locum fecit ad tempo-  
 » ralia bona populo Dei, ut firmaretur super ini-  
 » micos eius: quanto magis Iesus venundatus; et  
 » humiliatus a fratribus suis secundum carnem, et  
 » exaltatus in coelis, locum facit ad aeterna bona  
 » populo Dei, triumphanti de diabolo, et ange-  
 » lis suis? Si tentationes durae sunt in hoc sae-  
 » culo, Ioseph in carcere, Iesum in cruce cogi-  
 » tate ».

(64) Omnino praeclare hunc locum tractat Augustinus in *Ps. LXXII. 5.* » Liberatur populus ab  
 » Aegyptiis per Moysen: liberatur populus a prae-

ventre ceti tribus diebus , et tribus noctibus latens , et quid cetera numerem , quibus veteres Scripturae abundant (65)? Sane ex his

» terita vita peccatorum per Dominum nostrum  
 » Iesum Christum. Transit populus ille per mare  
 » rubrum: iste per baptismum. Moriuntur in ma-  
 » ri rubro omnes inimici populi illius: moriuntur  
 » in baptismo omnia peccata nostra. Omnia prae-  
 » terita peccata deleta sunt in baptismo ». Confer  
 » et *Tract. XLV. in Ioan. 9.*

(65) Non praeteream hic primaevos Fideles ad contestandam perpetuo Christianae Religionis veritatem adversus Judaeos , et Gentiles , nihil antiquius , sanctiusque habuisse , quam vel in Sepulcris , vel in tabellis , vel in gemmis huiusmodi sculpere Christi typos , et figuras , quas ante multa saecula in veteri Testamento praemonstraverat Deus. Vidi egomet innumera plane hoc genus cimelia , et gemmas , in quibus vel arca Noe , vel columba cum olea , vel Isaac ligna baiulans , vel cetus Jonas vomens. Gemmam annularem ex Onice Orientali elegantissimae sculpturae addam , quae apud me est , ac in fronte operis prostat , in qua anchoram surrectam videas , tamquam Christianae spei , itemque fidei symbolum , et Pisces hinc inde ( qui Christi typus sunt , de quo plura in peculiari *Illustratione* dedimus ) cum voce IXΘYC , quae latine *piscis* sonat , quaeque tamen si dissolvatur ,

intelliget quispiam , merito quantum adversus Iudaeos scripserit Tertullianus : *Filii Dei in-*

sic ut littera quaevis initialis evadat , Christi nomen habes , et attributa in hunc modum :

I	ησους	IESUS
X	ριστος	CHRISTUS
Θ	εου	DEI
Υ	ιος	FILIUS
Σ	ωτης	SALVATOR

Numquam autem esset finis , si et indicare tantum vellem et marmora , et lamellas plumbeas , vitros , vel figulinas cum huiusmodi typis , quorum tibi praesto est seges uberrima apud Arringhium, Bosium, et Bottarium in *Roma Subterranea* ; apud Ciampinium *de veter. Monument.* Ficoronium *de plumbis antiquis* ; Lupium in *Epitaph. S. Severae* ; Boldettum in *Observat. Coemeter.* Gorium in *diptych.* Maranconium in *Adpendic. ad Acta S. Vict.* Bergerum in *Lucernis antiq.* Victorium in *dissert. de septem dormientibus*, ac demum ut reliquos missos faciam , Museum Kircherianum.

Quod autem singulare est , non in monumentis tantum , et in cuius cuiusve generis cimeliis sculperetur Christi typos primaevis Fidelibus cordi ac pretio erat , sed et ipsa Prophetarum vaticinia in inscriptionibus saepenumero usurpare. Huiusmodi est quae Neapoli in Ecclesia S. Ioannis et Paulli, extat: *Credo. quia. Redemptor. meus. vidit. et. in.*



*carnatio, et nativitas Paraturam desiderabat ut crederetur.* Hem quibus mediis fides in Christum Liberatorem venturum ostentata, servata, ac propagata fuerit.

IX. Profecto autem quanta fuerit Fidei in Christum Liberatorem Patribus veteris Testamenti necessitas, vel hinc cumulatissime patet, quod non aliunde iustificari poterant. *Itaque* ( inquit Augustinus *Lib. de Pec. Orig. cap. XXIV.* ) *sine fide incarna-*

---

*nobissimo die. de. terra. suscitabit. me. et. in carne mea. bidebo. Deum. meum. Hic. requiescit in. pace. Euphimia. et. Ioh. Vir. eius. et cacteri Filii eorum; in qua integrum comma habes ex Iobi Libro Cap. XIX. vers. 25. et seq. Quemadmodum et altera item Neapoli legitur in Templo S. Augustini Maioris, quae haec est: In. sommo pacis. Laurent. Gen. qui vixit. ann. LX. Dep. sub. die. XXIV. Mens. Martii. Ind. V. et. Iohanna. Coniux. eius quae vix. pl. M. An. LXXV. Dep. sub. Die . . . . M. . . . . Ind, . . . . Cre-  
dimus quia Redemptor noster vivit et in nobissimo die de terra suscitabit nos et in carne nostra bidebimus Dominum Redemptor . . . . Amen. Sed plura modo hanc in rem conferre superscedo, quae, si mihi Deus, habebis in nostro Opere Sacrae Antiquitatis Monumenta, quibus Theologica Dogmata illustrantur, quod in forulis affectum habeo, cui postrema tantum deest manus.*

*tionis , et mortis , et Resurrectionis Christi , nec antiquos Iustos , ut iusti essent , a peccatis potuisse mundari , et Dei gratia iustificari , Veritas Christiana non dubitat : sive in eis iustis , quos quidem illa non commemorat , sed tamen fuisse credendi sunt vel ante diluvium , vel inde usque ad legem datam , vel ipsius legis tempore , non solum in filiis Israel , sicut fuerunt Prophetæ , sed etiam extra eundem populum , sicut fuit Iob. Et ipsorum enim corda eadem mundabantur Mediatoris fide , et diffundebatur in eis caritas per Spiritum Sanctum , qui ubi vult spirat , non merita sequens , sed etiam ipsa merita faciens.*

X. Igitur veteres illi Iusti sub Lege non erant , sed sub gratia , eadem quippe fide et ipsi mundabantur , qua et nos ; habentes eundem spiritum fidei , ut Apostolus ait *II. ad Cor. 4.* Nam ex ipsa fide de Christo Liberatore dicebant ( Ps. XVIII. ) *Et ipse tamquam Sponsus procedens de thalamo suo , exultavit ut gigas ad currendam viam , a summo coelo egressio eius , et occursus eius usque ad summum eius , nec est qui se abscondat a calore eius.* Ex fide ipsa item Christum Liberatorem adloquebantur ( Ps. XLIV. ) *Thronus tuus , Deus , in saeculum saeculi ,*

*virga directionis , virga regni sui : dilexisti iustitiam , et odisti iniquitatem , propterea unxit te Deus tuus oleo laetitiae prae consortibus tuis.* Demum ex ipsa dicebant fide ( Is. VII. ) *Ecce Virgo concipiet , et pariet filium , et vocabitur nomen eius Emmanuel ; idest nobiscum Deus.* Sane eodem Spiritu fidei haec ab illis futura videbantur , quo a nobis facta creduntur.

XI. Huc facit Petri testimonium ( Act. XV. ) *Quid tentatis Deum , imponere iugum super cervices discipulorum , quod neque Patres nostri , neque nos portare potuimus ? sed per gratiam Domini nostri Iesu Christi credimus salvari , quemadmodum et illi.* Igitur et illi per gratiam Domini nostri Iesu Christi salvi facti sunt , non per legem Moysis , per quam non sanatio , sed cognitio facta est peccati.

XII. Praeterea inquit Apostolus ( ad Rom. III. ) *Nunc autem sine lege iustitia Dei manifestata est , testificata a lege , et Prophetis. Iustitia autem Dei per fidem Iesu Christi in omnes et super omnes qui credunt in eum.*  
» Si ergo ( inquit Augustinus de Pec. Orig.  
» cap. XXVI. ) nunc manifestata est , etiam  
» tunc erat , sed occulta. Cuius occultationem  
» significabat Templi velum , quod est , ad  
» eius significandam revelationem , Christo

» moriente conscissum. Et tunc ergo ista  
» gratia unius Mediatoris Dei, et hominum  
» hominis Christi Iesu, erat in populo Dei,  
« sed tamquam in vellere pluvia, quam non  
» debitam, sed voluntariam segregat Deus  
» hereditati suae, inerat latens; nunc autem  
» velut siccato illo vellere, h. e. Iudaico  
» populo reprobato, in omnibus gentibus  
» tamquam in area cernitur potens ».

XIII. Porro Augustinus idem, a quo non  
puto discedendum, Apostolicum dictum ex-  
pendens: *Sicut in Adam omnes moriuntur,*  
*ita et in Christo omnes vivificabuntur:* » Illi  
» ergo, inquit, antiqui Iusti ideo in resur-  
» rectionem vitae aeternae venturi sunt, quia  
» in Christo vivificabuntur: ideo in Christo  
» vivificabuntur, quia ad corpus pertinent  
» Christi: ideo pertinent ad corpus Christi,  
» quia et ipsis caput est Christus: ideo et  
» ipsis caput est Christus, quia unus Media-  
» tor est Dei et hominum homo Christus Ie-  
» sus. Mediator autem illis non fuisset, nisi  
» in eius resurrectionem per eius gratiam  
» credidissent. Et hoc quomodo fieret, si  
» eum in carne venturum esse nescissent,  
» neque ex hac fide pie iustèque vixissent?  
» Nam si propterea illis non profuit Incar-  
» natio Christi, quia nondum facta erat: nec

» nobis prodest Iudicium Christi de vivis , et  
 » mortuis , quia nondum factum est. Si au-  
 » tem nos per huius , nondum facti , sed fu-  
 » turi iudicii fidem stabimus ad dexteram  
 » Christi ; profecto illi per Incarnationis eius,  
 » tunc nondum factae , sed futurae fidem ,  
 » membra sunt Christi ».

XIV. Sed haec de Iudaica gente. At quid?  
 an praeclusa gentibus aliis via salutis. Apa-  
 ge ! Alienigenam habemus Iobum , cui non  
 defuit et unde fidem in venturum Liberato-  
 rem haurire , et unde spem elicere , atque  
 inter tot calamitatum turbines constanter te-  
 nere. Idumaeus erat , non Iudaeus , et tamen  
 ex traditione sola fidem accipiens , fide ae-  
 stuans clamabat ; *Scio quia Redemptor meus*  
*vivit , et in novissimo die de terra surrectu-*  
*rus sum ; et rursum circumdabor pelle mea ,*  
*et in carne mea videbo Deum meum ; quem*  
*visurus sum ego ipse , et oculi mei conspe-*  
*cturi sunt , et non alius ; reposita est haec*  
*spes mea in sinu meo* (66). Alienigenam et

---

(66) *Nec ipsos Iudaeos* ( ad rem inquit Au-  
 gustinus *Lib. XVIII. de Civ. Dei Cap. XLVII. )*  
*existimo audere contendere , neminem pertinuisse*  
*ad Deum , praeter Israelitas , ex quo propago Israel*  
*esse coepit , reprobo eius fratre maiore. Quis si*

habemus Melchisedechum , et quid Ninivitas memorem , ceterosque ? Profecto autem ( egregie argumentatur Augustinus *Epist. CII. ad Deograt.* ) » quum nonnulli commemorantur » in Sacris Hebraicis Libris iam usque ex » tempore Abrahæ , nec de stirpe carnis eius , » nec ex populo Israel , nec ex adventitia » societate in populo Israel , qui tamen huius » Sacramenti participes fuerunt : cur non » credamus , etiam in ceteris hac atque illac » gentibus , alias alios fuisse , quamvis commemoratos in iisdem auctoritatibus non legamus ».

XV. Sane tametsi Iudaico populo nihil commune quidquam cum Gentibus esset , quo tamen illius nomen pervasit ? vel quæ natio erat , qua non celebraretur ? Numquid

---

*negant , facillime convincuntur de sancto , et mirabili viro Iob , qui nec indigena , nec proselytus , idest advena populi Israel fuit ; sed ex gente Idumæa genus ducens , ibi ortus , ibidem mortuus est : qui Divino sic laudatur eloquio , ut quod ad iustitiam , pietatemque pertinet , nullus ei hominum suorum temporum coaequetur. Divinitus autem provisum fuisse non dubito , ut ex hoc uno sciremus etiam per alias gentes esse potuisse , qui secundum Deum vixerunt eique placuerunt ; pertinentes ad Spiritalem Ierusalem.*

ignotum Gentibus Abrahami nomen, quem scimus Eusebio teste *Lib. IX. Praeparat. Evangel. Cap. XVII.* in tanta existimatione fuisse apud Berosum Hecataeum, Nicolaum Damascenum, Alexandrum Polyhistorum, Eupolemum, Artapanum, aliosque gentiles? Numquid Iosephi nomen in una Iudaea conclusum? at Aegyptii saltem, gens maxime omnium superstitiosissima ab isto Aegypti salvatore verum Deum vel noscere, vel discere poterant. Numquid Mosis novum gentibus nomen? Sed in medio gentium virtutem, potentiamque viventis Dei tot patris prodigiis ostentavit.

At mihi liceat id hoc loco coniicere, Iudaeos ideo fortasse ante Christi adventum Divina providentia fuisse dispersos per Assyriam, Babyloniam, totamque adeo Asiam, ac deinde per Aegyptum, Graeciam, Italiam; ut ex Sacrarum Scripturarum, quas ipsi secum deferebant, lectione, gentes toto terrarum orbe effusae, notitiam Messiae haurirent, atque ita ad eum expectandum, postulandumque (67) disponderentur.

---

(67) Memini insignem Augustini locum hanc in rem legisse, sed nunc scribenti paene excidit ex mente.

XVI. Sed dubitamus adhuc veteris Testamenti Scripturas et Graecis, et Barbaris, et universae Genti compertissimas fuisse, ex quibus tot fabulas, et tot execrabilia mendacia confixere, tot errorum monstra, catervamque deorum tantam, quantam Graecia habuit, quantamque Roma adscivit? Tolle fabulis corticem, et in fabulis Scripturarum deteges veritatem. At haec pro re nata fusius persequutus sum tum alibi sparsim, tum vero in *Diatriba Parasceastica* de Mosaicae Cosmogoniae veritate, ubi antiquissimos quosque sapientes, et poetas de Scripturarum fonte bibisse pluribus evici.

XVII. At cedamus parumper. Sinamus, ceteras nationes quotquot et mundi genesim, et veteris Testamenti Patriarchas, et Legem Mosaicam, et Scripturas demum penitus ignorasse; quid interea? quid hinc extricabit quis? En altera ex altero capite via, qua ad Liberatorem implorandum arctabantur pagani. Tametsi enim Mosaica Lex angusto sane limite arctaretur, nec extra genus Abrahæ se per orbem effunderet, erat tamen lex antiquior, et intimior, hominum mentibus naturaliter insita, atque ingenita, qua obligabantur, et cuius praevaricatione constringebantur omnes etiam extra genus Abrahæ



peccatores terrae. Huius ergo legis, omne genus hominum complectentis non dispar ratio erat, atque Mosaicae. Perinde enim, etsi paullo tenuior quam illa, quid ius, fasve esset hominem edocebat, et prae cupiditatum impotentia deficientem, obiurgabat, humiliabat, Supernum Liberatorem invocare adiebat.

XVIII. Quantumcumque vero lex ista naturae improbitatis colluvione obscuraretur, non exoleverat tamen penitus, nec detrita adeo erat, ut non praevaricationis reatu constringerentur quicumque illius repagula transilirent. Quum autem Lex Mosaica legem illam universalem vel labentem instaurasset, vel nutantem firmasset, vel nova praeceptorum congerie substruxisset, per utramque Deus, non disparem universo humano generi viam parabat salutis, tametsi hic evidentius, illic obscurius; hic visibiliter, illic invisibiliter. Quum ergo haud dissimilis esset et virtus et scopus legis, seu naturaliter insitae omnibus ubique hominibus, seu specialiter Hebraeis indultae, ut ex eius praevaricatione genus humanum suae infirmitatis admoneretur, convinceretur, humiliaretur, ad Deum Medicum confugere compelleretur (68), quis adhuc que-

---

(68) Conferas hanc argumentationem apud  
*Tom. V.*

ri potest, praecusam gentibus salutis viam fuisse?

XIX. Ceterum Paganis quaerentibus apud Augustinum *Epist. XLIX.* » Si Christus se » salutis viam dicit, gratiam, et veritatem » in seque solo ponit animis sibi credentibus » redditam, quid egerunt tot saeculorum homines ante Christum? Quid actum de tam » innumeris animis, qui omnino in culpa » nulla sunt, siquidem is cui credi posset, » nondum adventum suum hominibus commoderat? » Egrege respondit Augustinus: *Ab exordio generis humani quicumque in eum crediderunt, eumque utcumque intellexerunt, et secundum eius praecepta pie et iuste vixerunt, quandolibet et ubilibet fuerint, per eum proculdubio salvi facti sunt.* Hinc quum omni tempore tam in gente Iudaica, quam in aliis nationibus semper fuisset aliquos, qui in Christum venturum credebant ostendisset, concludit: *Ita salus Religionis huius, per quam solam veram salus vera veraciterque promittitur, nulli umquam defuit, qui dignus fuit, et cui defuit di-*


---

Augustinum in *Psalm. CXXIII.* ita egregie interpretantem Psalmi verba: *Praevanitates aestimavi omnes peccatores terras.*

*gnus non fuit.* Nisi quod illud : *dignus fuit*, ex una Dei gratia repetendum alibi monuit ( *Lib. II. Retract. Cap. XXXI.* ). Et merito quidem ; ex quo enim commisit Adam illud grande peccatum , et omne genus humanum in commune damnavit , ab hac communi damnatione nemo prorsus liberari , iustitiamque , et salutem consequi unquam potuit aut poterit , nisi per Salvatorem nostrum Iesum Christum , cuius gratia omnes liberantur , quicumque liberantur. Ideoque Fidei Christianae fundamentum est , VNVS , et VNVS ; unus homo per quem ruina , unus homo , per quem structura.

Sed esto finis huic disputationi , qua librum afflictionis nostrae claudimus , ut alter in proximo aperiatur de Incarnatione Domini nostri IESU CHRISTI, cuius benignitate salvati, et liberati sumus. Cui Honor, Gloria, et Gratiarum Actio cum Patre, et Spiritu Sancto in saecula aeterna. Amen.

F I N I S.



# SCHEDIASMA

## DE INTEMERATO VIRGINIS CONCEPTU.

**I**ngratus in DEI MATREM merito viderer, si charitatis erga me suae singularibus nullo non tempore devinctus officiis, innumerisque ipsa tenente ereptus casibus; iisque postremo gravissimis, nunc ubi resumpto calamo quaestio de originali peccato agitur, nihil de illa dicerem, perinde ac si cum universo genere humano ipsam quoque involutam, implicatamque crederem. Sed apage! Oblivioni detur dextera mea, nisi tuum sanctum, atque immaculatum conceptum vindicavero, SANCTISSIMA MATER; nisi Tibi tuaeque dignitati, atque amplissimis tuis in me beneficiis saltem hoc quidquid est exiguae scriptionis rependam. Vtinam potiora possem! sed Tu quantulacumque haec, quae pro viribus exsolvo, accipito lubens; et quandoquidem quidquid ab aeterno illo, au-

gustoque honorum Fonte in terras delabitur, per Te continuo, quam maiestatis potestatisque suae sociam adscivit, effluere credimus, adesto mihi praesens, tuoque potentissimo apud Iesum Christum favere dignator patrocinio.

## CAPUT I.

*Virginem Deiparam singulari Divinae gratiae privilegio a peccato originis fuisse praeservatam, ex Sacris Scripturis tentatur.*

I. **N**on id contendo heic ego, Sacris Litteris expresse apertissimeque doceri, Virginem Dei Matrem ab originali peccato fuisse immunem. Actum enim esset negotium omne, nec ulla me modo tangeret cura. Sed illud tantum, quantum valeo, demonstrandum suscipio, satis superque insinuare Scripturas, Virginem beatissimam a quavis peccati macula, sive actualis, sive originalis praeservatam.

II. Atque is primus ex veteri Testamento occurrit locus (Cantic. IV. 7.) in quo

de Virgine Deipara dicitur : *Tota pulchra es amica mea , et macula non est in te.* Hebraice vero : *macula non in te* , qua sane primigenii textus loquutione omne excluditur tempus , quo in Virginis anima labes cuius cuiuscumque generis excogitari potuerit.

III. Sed expendamus pœsillulum an ista Canticorum verba ad litterae sensum in Deiparam quadrent. Sane quae in Canticis Canticorum de sponsa sub Sunamitidis nomine a Spiritu Sancto per Salomonem illius libri auctorem sunt dictata , nemo unquam addubitabit , quin iuxta litterae sensum accepta , ad corpus Ecclesiae Christi sint adprime referenda ; nimirum ita vetus , ac constans Sanctorum Patrum fert sententia , cui nemo nisi impudentissimus adversabitur. Quum vero in corpore isto Ecclesiae , principem tenere locum Deiparam in confesso apud omnes sit , quis non videt id heinc consequi , ut quae ibidem de Christi Ecclesia enunciantur , summo potissimoque iure ad Mariam pertineant ? Hanc porro Theologico a nobis rectissime deductam ratiocinio consecutionem vel ipsos Ecclesiae Patres ac Doctores ante nos tenuisse , nemo unus ignorat.

IV. Re enim vera Angelicus Doctor Thomas, cuius minime est hac in re suspecta auctoritas, eodem usus est testimonio, ut evinceret Mariam nullum umquam admisisse actuale peccatum. *Quo loco* (inquit Part. III. Quaest. 27. art. 4. ) *fatendum est quod Beata Maria Virgo nullum peccatum actuale commisit, nec mortale, nec veniale, ut sic in ea compleatur quod dicitur in Canticis: tota pulchra es Maria, et macula non est in te.* Neque vero accomodatitio tantum sensu ea Scripturarum verba usurpasse Thomam suspicetur quispiam. Si ita enim esset, quid aliud fecisset ille, quam rem certissimam incerto ac nutanti fundamento superextruere?

Quum igitur, vel ipso vindice Thoma, extra omnem dubitationis aleam sit, in Mariam locum illum Canticorum concurrere, ecquis sanus non hinc probe deducet, Virginem sanctam ab originali macula, vel in primo ipso suae conceptionis instanti praeservatam? *Si enim ad pulchritudinem istam complendam* (liceat mihi rem hanc acerrimi ingenii Theologi Ambrosii Catharini verbis exprimere) *unius peccati venialis maculam a Virgine remove opus est: quis asserat teterrimam illam origina-*



*lis peccati labem cum tanta pulchritudine componi et copulari potuisse , ut nihilominus tota pulchra , et sine macula praedicari debeat ?*

V. Praeterea ne hoc uno veteris Testamenti loco causam omnem confecisse videar , addam et lubenter alterum ex novis Tabulis desumptum. Lucas in Evangelio legationem enarrans , ab Archangelo Gabriele imperio Dei susceptam , ipsumque am legati adventum , arcana Divinitatis consilia Virgini Mariae patefacturi , haec habet initio : ( Luc. I. v. 28. ) *Ingressus Angelus ad eam , dixit : Ave gratia plena.* Quae sane verba verissime ad interratam Virginis conceptionem referri etiam ad litterae sensum , ego nunc contendam. Quod ut planum apertumque fiat , graeci textus est lectio exploranda. Graece igitur ita scriptum : *χαίρε καιχαριτωμενη.* Es; autem το καιχαριτωμενη praeteriti temporis participium verbum ( quemadmodum graeci sermonis canones ferunt ) quod *ex gratia et in gratia formatam* significat. Quam profecto καιχαριτωμενης notionem ac vim adprime Graecus homo vidit ante nos Amphiloehius Episcopus Iconiensis , testatusque hinc plano prorsus consecratio San-

ctissimam Virginem χάρις ἀμαρτίας τετυγμένη  
*sine peccato scilicet fabricatam.* Vidit et  
 id Amphilochio prior Origenes, graeci et  
 ipse sermonis callentissimus. Inquit enim  
*Hom. IV.* in Lucae Evangelium: *Quod*  
*Graece dicitur καὶ χάριτος γεννη, ubi in Scri-*  
*pturis alibi legerim, non inveni: soli Vir-*  
*gini Mariae haec salutatio servabatur.*

VI. Age vero, eccur Maria amplissima  
 illa salutione καὶ χάριτος γεννη, scilicet in gra-  
 tia, et ex gratia formata praedicatur ab  
 Angelo, nisi ut expers omnis peccati vel  
 sub ipso primo suae conceptionis instanti  
 innuatur? Nec vero quemquam latinus Lu-  
 cae interpres moveat, qui το καὶ χάριτος γεννη  
 reddit *gratia plena*, ut de vi propositi ar-  
 gumenti detractum aliquid putes. Eterim  
 ut hoc in primis moneam, latinum inter-  
 pretem ut in omnibus tenendum ipse fa-  
 teor, sic ubi obscurior occurrat sententia,  
 ad Hebraicum vel Graecum primigenios  
 fontes provocare nos posse haud dubito.  
 Atque si quis alius, hic sane locus est,  
 quo id exequi fas est, ut cui cuique di-  
 lucidissime pateat, verbis illis *Gratia Plena*  
 non divinae gratiae plenitudinem tantum,  
 sed extensionem etiam ad omne vitae mo-

mentum , latinum Lucae interpretrem designasse.

VII. Quod si cum graeci sermonis imperitis agendum esset , utique et pro eo decertarem , versionem *Gratia Plena* , ut uti in vulgata iacet , cum gratiae plenitudinem , tum extensionem quoque in omne vitae instans significare. Hanc enim verbis illis notionem tribuere patitur , ac tacite quodammodo suadet Ecclesia Christiana veritatis magistra. Namque si ex angelica huiusmodi salutione plane ipsa deduxerit , Deiparam quavis levissima actualis peccati labecula caruisse , nedum sub ipso coelestis legati adventu , sed quovis vitae anteaeciae momento , atque omni denique tempore consecuturo , cur vetitum nobis ita illa accipere verba , ut gratiae , qua plena dicitur Maria , amplitudinem ad primum quoque instans , quo concepta est in utero matris suae referamus ? Quin licere id nobis maxime existimo , nedum vel minime ipsa repugnante Ecclesia , sed imo probante , ut infra fusius. Sed plane iam ex mente exciderat insignis Fulgentii locus qui rem acu tangit. Sic enim Serm. de laud. Mariae : *Quum dixit gratia plena* ,

*ostendit ex integro iram exclusam primae sententiae.*

VIII. Alterum ex Scripturis superaddam locum, qui tametsi ( ut ingenue fatear, quod res est ) eiusdem non sit ponderis, habet nihilominus vim eiusmodi, ut non leve hinc desumi possit momentum. Sane enim quum Virgo, ab eo statim tempore, quo Spiritus Sancti virtute Verbum divinum intra sua viscera carnem factum sensit, Elisabetham cognatam suam, concepto pridem Ioannis praecursoris foetu onustam, convenisset, repleta haec Spiritu Dei his amplissimis omniumque saeculorum commendatione dignissimis verbis hospitem suam excepit ( Lucae I. v. 42.): *Benedicta tu inter mulieres, et benedictus fructus ventris tui. Et unde hoc mihi ut veniat Mater Domini mei ad me.* Quibus quum sibi a cognata plaudì pro animi sui demissione minime sustinuerit Virgo, continuo ad Deum, quem in utero gestabat conversa: *Magnificat*, inquit, *anima mea Dominum. . . . quia respexit humilitatem ancillae suae.* Nimirum hic ille locus est, ex quo postremum mihi animus est excerpere argumentum.

IX. Ac primo quid *humilitatis* voce heic

veniat, ex primigenio textu necesse est aperiam. Graecus autem textus pro eo quod latinus interpret reddidit *humilitatem*, habet ταπεινωσιν; cuius vocabuli notionem apud probatissimos quosque graecos auctores, imo apud Graecum ipsum Lucam, quotiescumque id in Evangelio usurpat, non illam sane invenies, quae animi de se demisse sentientis affectionem exprimit, sed abiectam potius personae conditionem, statumque vilissimum (a), quod ego innumeris graecorum exemplis ostenderem, si orationem vel aliquantisper divertere hinc mihi liceret. Quum igitur ea sit vocis τῆς ταπεινωσεως vis ac notio, nemo sane non intelligit, Virginem Deiparam non aliud verbis illis: *quia respexit humilitatem ancillae suae*, voluisse, quam suae conditionis omnium despectissimae indignitatem (quam veteres latinitatis auctores humilitatem dixerunt) cognatae plausibus obiectare, ut probe hinc intelligeret, nihil se nisi abiectum, ac vi-

---

(a) Haud abs re duco inferne heic saltem adnotare, humilitatis virtutem in Scripturis non ταπεινωσιν quo usus est verbo Lucas, sed ταπεινωφροσυνην vocari uti observare est *Actor*. X. 19. *Ephes.* 4. 2. *Philip.* II. 3. *Coloss.* III. 1. *Petr.* V. 5. et alibi passim.

le habere: decora autem quibus ornabatur, non esse naturae suae dotes, non fundum suum, sed communicata liberaliter a Supremo Numine omnia (b).

X. Iam si praeter communem naturae suae cum creatis rebus, quae ex nihilo sunt eductae humilitatem, eam quoque in se Virgo sensisset, quae totum genus hominum a prima usque suae creationis origine foedavit, quid illam silentio compressisset? ac non potius eo erga largitorem suum usa esset veriloquio: quia respexit iniquitatem ancillae suae, seu magis suae inimicae? Hoc enimvero longe ingentem in

---

(b) Quidquid veteres recentesque interpretes de hoc textu senserint, profecto unus maxime omnium veluti acu rem tetigisse mihi videtur Ioannes Maldonatus in Lucae I. 48. *Non id agebat humillima, et Sanctissima Virgo, ut doceret suis meritis tantum se beneficium consequutam, ut mater esset Dei; sed potius ut se indignam omnino fuisse tanto beneficio declararet: noluit ergo dicere suam a Deo virtutem, sed potius suam humilem abiectamque personam, et conditionem, et ut uno verbo dicam, suam indignitatem respectam fuisse, quod quamvis indigna prorsus esset, Deus se tanto honore dignatus fuisset.*

cognatae animo excitasset admirationem , siquidem hinc illa intellexisset ; se non tantum nihil de divini numinis donis meritam , sed male quantum ob originis foeditatem demeritam tot tamque singularia accepisse ultro coelestis gratiae beneficia. Non fecit id tamen veritatis aequae ac Christianae humilitatis studiossima Virgo.

XI. Quid ? quod habebat et ante oculos exemplum illius propositum , cuius psalmos mente continuo versebatur , Davidis nimirum , qui divinam sibi conciliaturus misericordiam , tum abiectissimam sui apud Deum prodit conditionem , tum in bono perficiendo infirmitatem , ex peccato utique quod hereditario veluti iure ab Adamo per parentes contraxerat , emanatam : *Ecce enim inquit, in iniquitatibus conceptus sum, et in peccatis concepit me mater mea.* Quum autem nihil eiusmodi primigeniae foeditatis tunc meminit Virgo , certe in seipsa tale id non vidit , tametsi animi sui intime gnara. Quo magis adeo mirari subit , immo potius execrari temeritatemne dicam , an confidentiam eorum , qui quam Virgo in se non vidit maculam , hanc ipsi videre adhuc contendunt.

## CAPVT II.

*Scripturarum loca difficiliora, quae  
contra facere videntur, expli-  
cantur.*

I. **A**tque nunc vero id necessum est, ut quae in sui patrocinium ex Sacris Scripturis advocant adversarii, accuratissime expendamus. Primum autem Scripturae, omnes homines, qui ex Adamo originem trahunt per carnalem generationem, peccato originali obnoxios ita enunciant, ut neminem prorsus excipiant, nisi eum, qui ut peccatum damnalet, sine peccato voluit in similitudinem carnis peccati adparere. Hinc Apostolus (ad Rom. III. v. 23.) *Omnes peccaverunt, et egent gloria Dei.* Et ibidem (v. 12.) *Per unum hominem peccatum intravit in mundum, et per peccatum mors, et ita in omnes homines mors pertransiit, in quo omnes peccaverunt.* Prae omnibus vero maiori fragore eiusdem Apostoli auctoritatem intentant (II. ad Corinth. v. 14.) : *Si unus pro omnibus mortuus*



*est, ergo omnes mortui sunt.* Quum enim conditionalis sit Apostoli propositio, profecto quemadmodum in antecedente adeo universim patet, ut exceptionem omnino nullam recipiat; ita eandem prorsus universalitatem in consequenti teneat oportet, nisi ineptum, (per summam impietatem) dicere quis velit Apostolicum sermonem.

II. Sed garrulorum tricae, an ludibria potius haec sint, plane nescio. Nam generales illas enunciationes communi et humano more saepius in Scripturis usurpari, quis in sacra eruditione vel plane hospes ignorat? non enim ad totum referenda vox illa *omnis*, sed ad partem maximam, ut quum expresse Propheta (Ps. XIII.) : *Omnes declinaverunt.* Et alibi (III. Reg. VIII. 47.) *Non est homo qui non peccet.* Et in Evangelio (Joan. X. 8.) *Omnes quotquot venerunt ante me, fures sunt et latrones.* Cuiusmodi loca tum Hieronymus *Epist. CXLVI.* tum Augustinus *Tract. XLV. in Ioan.* ad illum sensum accommodant. Quod si enim generales istiusmodi Scripturarum locutiones ad originale peccatum in Virgine demonstrandum valerent, fortiori iure eandem actuali peccato infectam facerent illae: *omnes declinaverunt;*

*Non est qui faciat bonum, non est usque ad unum.* Quod si legibus hisce haud comprehenditur Mariam ipsi protestantur adversarii ; quis non videt, neque illa lege *in quo omnes peccaverunt*, constringi.

III. Porro autem ut dilucidius fiat, quod carptim delibavimus, legem illam de originali peccato ab Apostolo traditam, pari prorsus exceptioni subesse, quam impugnatores nostri legibus aliis de peccato actuali tribuere coguntur, iuvabit hic aliquantis per gradum figere, legemque accuratius interpretari. Sane Apostolus Paullus in ea Epistola (ad Romanos V.) quum multis gravibusque verbis inculcare instituisset doctrinam de transfusione originalis peccati, deque ingenti malorum colluvie, quae hinc in universum genus humanum incubuit, quo gratiae, qua salvi facti sumus per Dominum Iesum, summa necessitas pateret, e vestigio idem pressius urgens argumentum, subiicit (vers. 18.) : *sicut per unius delictum in omnes homines in condemnationem, ita per unius iustitiam in omnes homines in iustificationem vitae.*

IV. Constat autem iustitiam Christi non fuisse causam eiusmodi, ut omnes homines, qui salutaribus baptismi aquis lustra-

ti sunt, iustitiae continuo, et sanctitatis forma illustrentur. Fac enim alterum aliquem mortalis culpa reum sine ulla peccati sui actualis detestatione baptismo initiari, hunc profecto in Christo sanatum quis umquam dicet? vel quis eundem fortasse arbitrabitur interiorem induisse innocentiae stolam; tametsi sancto caractere insignitus, atque in Christi familiam adscriptus? At nos interea iustitiae et sanctitatis auctorem fatemur Christum, qua tandem ratione? nempe quod obedientia, et sanctitate sua illud promeruit, ut omnes qui sancti futuri sunt, sua ipsius caussa sanctitatem ipsam, et iustitiam reciperent. Ex quo et id pronum est abunde intelligere, quod scilicet Adae peccatum fuerit in omnes homines in condemnationem. Non ita sane, ut quotquot ex Adam per carnalem generationem originem ducunt, omnes illius vitio reipsa inficiantur, sed ut qui originalis vitii sordibus foedandi sunt, eas profecto sordes, nonnisi ex primaevo illo Adae peccato contraxisse dicantur. Atque hanc esse planam prorsusque indeclinabilem legis illius sententiam, praeter multa, suadet illa in primis comparatio, quam A-

★

postolus ibidem inter Christi iustitiam , et Adami peccatum instituit.

V. Sentio equidem , et id adversum nos detonari adhuc acrius : si a peccati lege Maria excipiat. qui stabit incolumis tandem veritas conditionalis illius propositionis , quam tantopere inculcat Apostolus: *Si unus pro omnibus mortuus est* (Christus), *ergo omnes mortui sunt*. Alterutrum enim eorum necessario admittendum , vel scilicet Mariam mortuam fuisse morte peccati , pro ea quandoquidem mortuus est Christus ; vel Christi mortem ad Sanctissimam Virginem minime pertinere. Sed Christum pro Maria mortuum non fuisse quis nisi haereticus adseverabit? Necessario ergo cedendum , Mariam in Adamo mortuam , atque adeo originalis lege peccati constrictam. Heus tu , quid ? resiste sodes , nec enim nodus tanti est , ut forcipe indigeat. Age videamus. Sane Christum Dominum uti pro omnibus , ita etiam pro Virgine matre mortuum nemo catholicus inficiatur , apertissima enim id evincunt Scripturarum testimonia. Quod vero heinc , suo veluti alveo sequitur Beatam Virginem mortuam fuisse morte peccati, neque eo id repugnabo, modo eo sensu intelligatur , et quod ob-

noxia ipsa fuerit morti peccati, ac necessario moritura, tum ratione Adamiticae transgressionis, cum qua ipsa communionem habebat originis et voluntatis, tum ex vi suae generationis.

VI. Id quod plenissime constabit, modo attendatur; Adae peccatum triplici ratione cum filiis suis communicari. Ac primo quidem Adae filii peccasse dicuntur in Adamo, quando praeceptum Domini transgressus est ille in paradiso. Sed quandoquidem tunc Adae universa posteritas actu non existebat in rerum natura, sed tantum in potentia, hinc non actu, sed potentia tunc peccatum contraxerunt; sive quod tantumdem est, non peccaverunt in se; sed in primo parente, in quo existebant, continebanturque tamquam in capite. Alteram cum Adae peccato communionem habent eius filii, statim atque formari incipiunt in utero matris quisque suae; quamvis ea tantum parte hominis sint instructi, quae subiectum est mentis, nempe corpore. Corpus enim eiusmodi, licet peccati immediatum subiectum esse nequeat, tamen quia ex corrupta natura originem trahit; recte infectum ac vitiatum dices; eidemque ex vi suae generationis debetur, ut simulatque

animam rationalem susceperit, totus exinde homo fiat peccator, et filius irae. Tercio demum communicant cum Adami peccato homines, quo primum tempore, formati tandem corporibus suis, inspiratur a Deo anima rationalis; tunc enim et reipsa homines, et reipsa peccatores dicuntur, ac omnino sunt.

VII. Haec quum ita se habeant, verum est, ac constanter adserimus Virginem Sanctissimam et in Adamo mortuam, et in Adamo peccasse, sed priori quem enucleavimus modo. Porro si ipsa communicavit cum peccato primi parentis Adae, quatenus in eius lumbis existens transgressa est mandatum Domini in paradiso, profecto eius prima conceptio similis fuit conceptioni aliorum, nimirum originem traxit ex natura corrupta, eique ex vi suae generationis debebatur, ut peccatum actu contraheret, cum primum anima rationali donanda esset. Atque hoc est quod debitum peccati originalis contraxisse dicatur Virgo, quamvis reipsa in instanti primo suae animationis ex singulari Dei beneficio peccati maculam experta sit nullam. Ex quo abunde intelliges, conditionalem illam Apostoli propositionem utraque parte sua in Beatam

Virginem constare : ut quemadmodum beneficium mortis Christi cum omnibus Adae posteris ipsa susceperit, ita et cum omnibus Adae filiis peccati originalis debito fuerit obstricta, nisi eam gratia Dei praevenisset, vel ubi corpore et anima simul esse coepit in utero matris. Demum ad superabundantiam et hoc addere iuvat, neque id vel rarum, vel novum esse in Scripturis, ut qui necessario sit moriturus, *mortuus* sine ullo additamento pronuncietur. Habes locum insignem apud eundem Apostolum ( Ad Rom. VIII. ) *Corpus quidem mortuum est propter peccatum, spiritus vero vivit propter iustificationem*; quo loco corpora fidelium iustificatorum *mortua* vocat propter peccatum, non quod reipsa mortua fuerint, sed quod morti obnoxia, ac necessario moritura.

VIII. Postremo ex his, quae adhuc usque sunt a nobis disputata, facile cuivis erit et alterum eradicare scrupulum. De Christo enim liberatore ac Redemptore generis humani scriptum est ( Matth. I. v. 31. ): *Ipse salvum faciet populum suum a peccatis eorum*. Et Virgo ipsa Salvatorem suum fatetur Christum ( Luc. I. v. 47. ): *Exultavit spiritus meus in Deo salutari meo*.

Ergo, inquit, si Christus matrem suam vere liberavit, redemit, salvavit, profecto dubitari non potest, et ipsam quoque obxiam peccato fuisse. Sed quae istae ambages, quae vel diverticula? Assumant adversarii quod volunt, certe non id efficient quod volunt. Vtique et Redemptor et Salvator matris suae fuit Christus, quatenus ipsam ab originali peccato, non quod contraxerat, sed quo alioqui contaminanda erat, servavit. Neque hic loquendi modus est vel a Divinis Scripturis alienus, vel in Patrum disputationibus novus. Inquit enim Propheta ( Psalm. LXXXV. *Eruisti animam meam de inferno inferiori.* Et iterum ( Ps. CXLIII, ) *Redemisti servum tuum de gladio maligno*; nec tamen in infernum inferiorem Propheta ceciderat, aut a gladio maligno occisus, sed quia Dei beneficio de utroque evaserat periculo, ideo gratias agit Deo. Egregie in hunc sensum Augustinus, qui multorum nobis instar esse debet: *Quemadmodum*, inquit in hunc Psalmi locum, *si medicus videat tibi imminentem aegritudinem forte ex aliquo labore, et dicat: parce tibi, sic te tracta; requiesce, his cibis utere; nam si non feceris, aegrotabis; tu autem si feceris,*



*recte dicis medico : liberasti me ab aegritudine , non in qua iam eras , sed in qua futurus eras. Nescio quis habens causam molestam mittendus erat in carcerem , venit alius , defendit eum. Gracius agens quid dicit? Eruiisti animam meam de carcere. Suspendendus erat debitor; solutum est pro eo , liberatus dicitur de suspendio. In his omnibus non erant , sed quia talibus meritis agebantur , ut nisi subventum esset , inde recte dicunt se liberari , quo per liberatores suos non sunt permissi perducī. Haec Augustinus , ex quo abunde satis intelliges recte omnino redemptum , ac liberatum dici non eum modo , qui servus et captivus reipsa antea fuerat peccati , sed eum quoque , qui in eiusmodi malorum aperto discrimine positus , alterius gratia , et beneficio id impetraverit , ne scilicet reipsa subiret. Quum itaque Christus Dominus singularem hanc inter ceteras gratiam Virgini matri suae morte promeruerit suam , ut originalis peccati , quo necessario ( siquidem concepta vitiosa parentum concupiscentia ) inficienda erat , evaderet , vadam; iure profecto ac merito eiusdem Virginis liberator , ac Redemptor , et Salvator dicitur.*

## CAPVT III.

*Virginem Deiparam singularem Divinae gratiae privilegio primaeva immunem labe, ex Patrum traditione probatur.*

I. **V**enio nunc ad veterum Ecclesiae Patrum auctoritatem, ut cui cuique pateat dilucidissime, non aliam fuisse maiorum nostrorum de intemerato Beatissimae Virginis Mariae conceptu sententiam. Obstreperant quantum volunt adversarii, nos antiquitatem sectamur. At vero ut modum aliquem in proposito argumento servemus, Patres omnes qui a primis inde Ecclesiae saeculis ad nos usque floruerunt, quorumque adhuc scripta supersunt, in duas veluti acies instituamus. In altera censebimus quotquot ante Pelagianam exortam haeresim Ecclesiam scriptis ac pietate illustrarunt, quique catholicam de originalis cul-pae transfusione doctrinam, quod nullis pulsaretur tunc Ecclesia Christi calumniatoribus, fusius explicare haud quidquam necessarium putarunt. In altera vero classe qui post auditam Pelagii haeresim fuse

apertissimeque originalis contagii doctrinam Augustino facem praeferente expresserunt ; quique profecto opportuniorem nacti sunt occasionem , clarius expressiusque de immaculata Virginis conceptione loquendi.

II. Atque ut a prioribus illis exordiar , primus omnium Sanctus Andreas Apostolus memorandus occurrit , qui ut in eius actis (c) ab Achaiae Presbyteris , suae praedicationis ac martyrii oculatis testibus , est consignatum , haec dixisse fertur : *Sicut primus Adam formatus fuit de terra antequam esset maledicta ; ita secundus Adam formatus ex terra virgine numquam maledicta.* Quod sane antiquissimum testimonium frustra in falsitatis suspicionem adducere Dupinius , tum et intemperantioris criticae theologi quidam videntur , quum omnium catholicorum consensione legitimum sit , atque in legitimo extet antiquitatis Ecclesiasticae monumento (d).

III. Post Apostolum Andream , alterum immaculatae Conceptionis praeconem exi-

---

(c) Extant ap. Andream de Saussay Episcopum , et comitem Tullensem *Lib. de Glor. S. Andrae*, Parisiis. an. MDCLVI.

(d) Confersis Cl. Natalem Alexandrum *Hist. Eccles. Saec. I. Cap. XII. art. X.*

mium Sanctum Amphilochem Iconiensem Episcopum profero, Gregorio Nazianzeno, et Basilio cœvum, iisque multiplici etiam eruditione ex Hieronymi iudicio comparandum. Hic in Oratione IV. in Deiparam Virginem, et Simeonem hæc expresse habet: *Qui antiquam illam Virginem (Evam) sine probro condidit, ipse et secundum sine nota et crimine fabricavit.* Scio equidem Nicephorum Patriarcham Constantinopolitanum, non Amphilochem, sed Theodoretum Orationis illius adpellare auctorem; sed vero nihil est, quum Amphilochem æqualis Theodorëtus ille fuerit, atque in Concilio Ephesino adversus Nestorium disputavit egregie.

IV. Accedit Chrysostomus, qui in sua liturgia diserte inquit: *Vere dignum et iustum est glorificare te την θεοτοχον την αεμκαριστων, και παναρωμητον Deiparam semper beatissimam, et quæ nulla macula aspergi queas, matrem Dei nostri honoratorem Cherubim, et gloriosorem incomparabiliter Seraphim.* Chrisostomo successorem suum in Episcopatu Proclum adiungo; namque hic in Orat. VI. in Deiparam de Sancto Iosepho loquens mirante Virginem sponsam suam utero plenam,

ita expresse scribit: *Non meminerat potuisse eam effici templum Dei, quae ex mundo* ( graecus textus habet *αγαθὸ* id est bono ) *est formata luto*; quibus verbis non animae solum, sed corporis quoque maculam adhaesisse Mariae, negat Proclus.

V. Ceteros Patres sive Graecos, sive Latinos, qui ante Augustinum floruerunt nihil necesse reor heic memorare; generalibus enim licet locutionibus, pleno tamen ore, unoque consensu praedicant *αρχαῖον, ἀφθαρτόν, ἀμικτόν*, idest impollutam, incorruptam, incontaminatam, quibus nedum ab actualis peccati sordibus, sed a foedissima in primis macula culpae originalis liberam semper extitisse Mariam non obscure significatur. Nam si ea Patrum testimonia cuius cuiuscunque generis peccatum a Beata Virgine remouent, bene est; excludunt enim etiam originale. Si non remouent, ergo operam Tridentina Synodus lusit, quum ex istis suffragationibus immunitatem Deiparae a peccato derivaverit veniali. Quod si impium, et haereticum est Tridentinos Patres insimulare, quasi generalibus Patrum dictis innixi immunitatem Virginis a culpa veniali statuerint, finierint-

que tamquam traditionem Ecclesiae, quid tandem nos prohibet, quin eadem Patrum testimonia ita accipiamus, ut Deiparae immunitatem ab omni peccato sive actionis, sive etiam originis innuant? potissimum quum in omni retro vetustate ne unum quidem aliquem invenire sit, qui Deiparae nominatim primigeniam adpinxerit labeni. Atque haec de Patrum mente, qui Augustinum praecesserunt.

VI. Nunc vero sermo noster ad Augustinum convertitur, quo nemo accuratius mysterium propagationis peccati originalis enodavit. Atque expresse is sanctissimae Dei Matris meminit, et ita meminit, ut communi lege haud inclusam ostenderet. *Excepta itaque* (verba sunt Sancti Doctoris Lib. de Nat. et Grat. Cap. XXXVI.) *Sancta Virgine Maria, de qua propter honorem Domini nullam prorsus, cum de peccatis agitur haberi volo quaestionem; inde enim scimus, quod ei plus gratiae collatum fuerit ad vincendum omni ex-pare-re meruit eum, quem nullum constat habuisse peccatum. Hac Virgine ergo excepta* cet. Haec autem de Originali peccato esse intelligenda, non est cur pluribus demonstramus. Pelagius Ecclesiae perduellis ut

suum dogma probaret , quo possent homines sine gratiae auxilio , si vellent , sine ullo esse peccato , multorum protulerat , obieceratque Augustino iustorum hominum exempla , qui in Scripturis non tantum non peccasse , sed iuste etiam vixisse referuntur , quales fuerunt Abel , Henoc , Melchisedec , Abraham , ceterique ; mox illud urgebat (apud Augustinum ibid. Cap. XXVII). *quorum iustitiae meminit , et peccatorum sine dubio meminisset , si qua eos tandem peccasse sensisset ; concludebat demum : credamus igitur quod legimus , et quod non legimus nefas credamus adstruere.* Haec Pelagius , cui Augustinus : *O utinam non dico aliud , quam in illis litteris legit , verum contra id quod legit nihil vellet adstruere , fideliter et obedienter audiret quod scriptum est : per unum hominem peccatum intravit in mundum , et per peccatum mors , et ita in omnes homines mors pertransiit , in quo omnes peccaverunt , et non infirmaret tanti medici gratiam , dum fateri non vult naturam humanam vitiatam.* Vide sodes qui Augustinus heic originalis culpa reos omnes incuset , quorum nulla in Sacris Litteris comminisci peccata pertenderat veritatis ille

transfuga Pelagius ! quumque unam ex hoc numero exclusam duntaxat Virginem Dei matrem velit doctor , ecquid iudicii erit monstrum , si quis illum de solo actuali peccato locutum fortasse arbitrabitur ?

VII. Iterum sic et haereticum hominem perstringit sanctum Episcopus Lib. V. contr. Julian. Cap. XV. *Illud sane magnum , verumque dixisti , cum posuisses testimonium Apostoli Petri dicentis : qui peccatum non fecit . . . Nam propterea nullus est hominum praeter ipsum , qui peccatum non fecerit grandioris aetatis accessu , quia nullus est hominum praeter ipsum , qui peccatum non habuerit infantilis aetatis ex ortu.* Itaque ex Augustino , peccatum actionis haud aliunde , quam ex foeda originalis culpa labe , emanat. Quod si ratum ipsi nullum unquam Deiparae adhaesisse actuale peccatum : nemo certe , nemo unius non videt , ex sancti doctoris sententia nec originalem quidem labem Beatissimae Virgini impingendam.

VIII. Nunc ceteri , qui post Augustinum florere in Ecclesia sive Latina sive Graeca , Patres percontandi (e). Atque quod ad

---

(e) Ne vero vel Ambrosiam vel Hierony-



Latinos spectat, in his primus occurrit, qui Augustini tum doctrinam, tum elocutionem ipsam pressius imitatus videtur, Fulgentius Ruspensis Episcopus, cuius eximium testimonium supra posuimus, uno et altero verbo ex Sermone de Laudibus Mariae: *Cum dixit, gratia plena, ostendit ex integro iram exclusam primae sententiae.* Fulgentio Faustus Regiensis se adiungit, qui in Libro de veterum Galliae Theologorum scriptis hanc praeclaram habet sententiam: *Porta clausa, idest signaculum pudoris, immaculatae carnis integritas; non enim violata est partu, quae magis est sanctificata conceptu, quae absque omni peccato concepta est in utero.* Accedit et insigne Sedulii testimonium Lib. III. Paschalis operis:

*Et velut e spinis mollis surgit acutis*

---

mum praetermisisse videar; Ille quidem Serm. XXII. in Ps. CXVIII. *Suscipe me*, inquit, *non ex Sara sed ex Maria, ut incorrupta sit Virgo, sed Virgo per gratiam ab omni integra labe peccati.* Hic autem in explanatione Ps. LXXVII, in illud: *deduxit eos in nube diei*, expresse ait, nubem illam esse Virginem Mariam, atque e vestigio addit: *Pulchre dixit, diei, quia nubes illa non fuit in tenebris, sed semper in luce*

*Nil, quod laedat habens, matremque  
obscurat honore.*

*Sic Evae de stirpe sacra veniente Maria,  
Virginis antiquae facilius nova virgo  
piaret.*

IX. Post hos venit Sanctus Hildephonus Archiepiscopus Toletanus, qui quingentis prope annis Sanctum Bernardum praecessit; cuius et insignia in rem nostram supersunt testimonia in libro adversus eos qui disputant de perpetua virginitate Beatae Mariae, et de eius parturitione (f). *Nisi Adam, inquit, et Eva primum peccassent in paradiso, nemo deinceps nasceretur in culpa peccati. Maria vero quia benedicta, culpam corruptionis non habuit.* Quae postrema verba non ad solam pertinent nativitatem perfectam, quae scilicet ex utero est, sed ad nativitatem quoque illam, quam inchoatam ibidem sanctus Episcopus appellat, quae nempe est animae cum corpore prima coniunctio. Atque hanc

---

(f) Sane hunc librum Paschasio Ratberto adiudicat Lucas Dacherius in *spicileg.* qui trecentis ante Bernardum floruit annis. Sed uter e duobus auctor fuerit, nihil nostra interest. Fuit enim horum uterque tum sanctitatis, tum doctrinae ac eruditionis eximiae.

fuisse auctoris mentem vel ex his quae sequuntur, apertissime patet: *Constat eam ab ipso peccato originali fuisse immunem, per quam non solum Evae matris est deleta maledictio, verum etiam omnibus condonata benedictio. Quod quidem praetendebat arca illa iussu Dei a Noe fabricata, quae, aquis diluvii universam terram, et altissimos montes supergressis, sola ipsa supernatans ferebatur in sublime. Arca est Virgo Maria, per quam genus humanum a damnationis aeternae diluvio liberatum est. Quamvis igitur Sancti Patriarchae, Prophetae, Apostoli tamquam montes excelsi virtute et sanctitate vitae obruti sint aquis, et inundatione peccati originalis, ipsa tamen arca nostra universos montes istos supergressa ferebatur etiam in ipso conceptionis initio in sublime puritatis, nec est immersa huic voragini sordis originalis. Quare de ipsa non absurde dicitur multae filiae congregaverunt divitias; idest animae fideles in adoptionem filiationis Dei per gratiam assumptae praeclaras virtutum divitias sibi conservarunt; tu supergressa es universas, quia cum iis omnibus virtutum ornamentis cumulata immunitatem insuper originalis contagionis in conceptu habuisti,*

\*

*a qua ceterae non sunt exemptae*, Quid hoc testimonio clarius? quid apertius? quid enucleatius ad statuendam de immaculato Virginis conceptu traditionem?

X. Quod si novam Hildephonsus doctrinam, et ante sua tempora in Ecclesia inauditam, adseveratione tanta, atque in tanta illius aevi clarissimorum Ecclesiae scriptorum copia, audax extuderit, qui factum sodes, ut nemo in faciem restiterit illi? aut quae tanta fuit tunc temporis Ecclesiae pastorum oscitantia, ut privati hominis opinamentum iactari tamquam catholicorum communem sententiam, passi sint? An vero Hildephonsum scripta sua blattis tineisque corrodenda in scrinio occultasse quis suspicabitur, ac non potius ad fideles Christianos in rebus fidei, morumque informandos suas intendisse lucubrationes? Ergo conspirabat iam tunc in hanc doctrinam tota Ecclesia.

XI. Ne vero in longum nostra protendatur oratio, unum ex ceteris latinis Patribus, nec amplius, addam Sancti Fulberti Carnotensis Episcopi testimonium egregium ex Lib. I. de Maria Cap. III. de salutata Angelica: *Immaculata semper extitisti ab exordio tuae creationis, quia paritura eras*

*creatorem omnis sanctitatis (g)*. Floruit autem Fulbertus decimo labente saeculo, ac ineunte undecimo; id quod vel eo consilio edico, ut cui cuivis vel obstinatissimo pateat, doctrinam de immunitate Virginis ab originali peccato iam inde ab Apostolico aevo ad undecimum saeculum Sanctis Ecclesiae Patribus et cognitam, et testatam; quod ad traditionem aliquam Apostolicam statuendam sufficere, fortasse nemo inficiabitur (h).

XII. Sed tempus est, ut et Graecorum Patrum dicta excipiamus; non eorum inquam, qui quatuor prioribus Ecclesiae saeculis floruerunt, quos supra retulimus, sed qui succedentibus deinde temporibus doctrina ac pietate rem catholicam illustrarunt.

---

(g) Conferas hunc locum apud Petrum Gausium *Lib. de Deipara*.

(h) Huc accedit et alterum testimonium saeculi XIII. nimirum Ven. Raimundi Jordani (hic est, qui diu latuit sub *Idiotae* nomine. Vid. Card. Bonam *Lib. II. de Divin. Psalm.*) qui *Lib. Contemplat. Cap. II.* Beatam Virginem expresse scripsit totam pulchram esse, non in parte, sed in toto, et maculam peccati in ea non extitisse, sive mortalis, sive venialis, sive originalis.

In his primus occurrit Sanctus Sabas, saeculi quinti Scriptor, qui in *Ode* de S. Malachia ita Deiparam adloquitur: *Tu macularum semper omnium expers, ligno vitae simillima, non alium nobis fructum genuinasti, quam Christum.* Suffragatur huic Andreas Cretensis de laudib. Nativ. Mariae: *Primitiae naturae nostrae, quae ex tota conspersione nihil inquinamenti suscepit.* Succensendus Sophronius Hierosolymorum Episcopus, qui in Epist. ad Sergium Episcopum Constantinopolis, quae lecta est in sexta Synodo Act. II. haec habet: *Uterum intactum virginitatis ingressus, castitatem lustratam Mariae Sanctae praeclaraeque, et quae Dei sunt, sapientis, et ab omni contagione liberatae et corporis, et animae, et intellectus, incarnatus qui erat incarneus.* Tum et Ioannes Damasce-nus Orat. de Natal. Virginis: *Natura gratiae germen antevertere ausa non est, verum tantisper expectavit, donec gratia fructum suum produxisset . . . O beatos Ioa-chimi lumbos, e quibus immaculatum semen effluxit! O beatum Annae uterum, in quo tacitis incrementis formatus fuit sanctissimus foetus! . . . O sanctissima, quae Principatus, et potestates fecellisti, imma-*

*culata conservata in sponsam ! Et rursus Orat. II. de Assumptione: Ad hunc paradisum, Mariam scilicet, serpens aditum non habuit. Ac demum Homil. de Annunciat. Primo quidem, singulari providentia perfecit Deus, ut ab ipso vitae suae principio tam existeret pura : quam esse puram decebat illam, quae tanto bono, idest Christo digna existeret.*

XIII. Post Damascenum commemorare heic ceteros Graecos superfluum duco, tum quod ex iis, quos recensui, satis de aliorum sensu arguere liceat ; tum quod ex eo inde tempore, quo primum in Ecclesia Graeca immaculatus Virginis Mariae conceptus coli sollemniter coepit, nunquam succedentibus ad haec usque temporibus sive intermissam, sive neglectam anniversariam eiusdem diei celebritatem observamus. Ex quo sane fit, graecam Ecclesiam semper cum latina conspirasse in huius professione doctrinae.

## CAPUT IV.

*Adversariorum contra propositam traditionem argumenta diluuntur.*

I. **S**Ed vero antequam longius nostra decurrat oratio, excutiamus quid ex Patrum auctoritate nobis oggerant adversarii. Scio equidem eandem cantionem et heic recantare illos, nimirum id inconcusso Patrum testimonio ratum, neminem omnino praeter Christum unum originarii peccati lege liberum. In hunc censum venit Sanctus Leo *Serm. I. de Nativit. Dominus noster peccati mortisque destructor, sicut nullum a reatu liberum reperit, ita liberandis omnibus venit.* Tum et Cyrillus Lib. XVI. in Levit. . *Solus Iesus est, qui numquam invenitur extra sancta, solus qui peccatum non fecit.* Ambrosius item Lib. II. in Lucam: *solus per omnia ex natis de femina Sanctus Dominus Iesus.* Et Augustinus tum alibi passim, tum praecipue *Tract. IV. in Ioan.* singulare id adfirmat fuisse in Christo, ut nempe non haberet carnem peccati, quia conceptus non fuit ex semine viri.



Demum ut alios praeteream ita et Gregorius Magnus Lib. XI. Moral. Cap. XVIII. verba illa explicans : *non adaequabitur ei aurum de Ethiopia.*

II. At non est cur vel tantisper indagandae Patrum istorum menti immoremur ; perspicuum enim est, hoc unum eos insinuas-  
se, vni Christo iure suo omnis expertem delicti deberi conceptionem, siquidem commercium ab se virile, omnemque adeo foedae libidinis aestum excluserit. Id vero quum de ceterorum hominum conceptione dici haudquaquam possit, hinc probe a Patribus solus ipse Sanctus et conceptus et natus dicitur inter natos de femina ; ceteri vero infecti, vel necessario inficiendi peccato, nisi singulari Dei beneficio et gratia alicui ex omnibus datum, ut originaria praeservaretur labe ; quod certe Beatae Virgini concessum ipsi Patres docuerunt. Habet itaque hoc Beata Virgo ex gratia, ut sancta vel in primo ipso suae animationis instanti extiterit, (nam ex vi suae generationis peccati maculam contrahere necessario debuisset) quod Christus Iesus filius suus iure sibi quaesivit suo, ut scilicet sanctus conciperetur. Nec vero infrequens in Scripturis, ac Patribus hic loquendi mo-

dus. Apostolus nempe ( I. ad Tim. I. )  
*Quí solus habet immortalitatem.* Et in  
 Evangelio ( Lucae XVIII. 19. ) *Nemo*  
*bonus nisi solus Deus ;* quae sane locutio-  
 nes eo profecto tendunt ut nempe solus  
 Deus natura sua , et a se ipso habeat im-  
 mortalitatem , et bonitatem ; ceteri si quae  
 huiusmodi habeant , mutuata habeant , at-  
 que Dei beneficio sibi prorsus indebito  
 communicata. Quoad Patres vero , unum  
 ex multis producám Ambrosium , qui de  
 Christo loquens Lib. I. Interpr. in Tob.  
 Cap. VI. *Solus ipse ,* inquit , *adhuc re-*  
*surrectione perpetua resurrexit.* Quo loco  
 ea enimvero Sancti Episcopi mens fuit ,  
 ut solus Christus resurrexerit resurrectione  
 perpetua , iure sibi debita , quia ipse est  
 resurrectio , primogenitus ex mortuis , et  
 causa resurrectionis omnium ; non autem  
 ut excludere voluerit , quin aliqui , et prae-  
 cipue Maria Christi mater post Christum ,  
 et per Christum singulari privilegio antici-  
 pate ad aeternam vitam resurrexerint.

III. Praeterea Rupertum veluti suae caus-  
 sae patronum adsciscunt adversarii , qui  
 Lib. I. in Cantic. haec expresse de Beata  
 Virgine habet : *Et ut quidem veraciter*  
*dicere potueras , ecce enim in iniquitati-*

*bus concepta sum, et in peccatis concepit me mater mea: Quum enim esses de massa, quae in Adamo corrupta est, hereditaria peccati lube non carebas. Sed Ruperti mentem serio perscrutantibus, id adprime innotescit illum voluisse, quod scilicet Beata Virgo, eo instanti, quo Christum concepit in utero, non fuerit ebria vino voluptatis, quo detinentur ceterae mulieres. Non fueras, sunt verba Ruperti Virginem adloquentis, experta vitium huius saeculi carnalis, voluptatis vitium, sine cuius ebrietate nulla unquam mulier praeter te concipere potuit, aut poterit, et tamen diiudicare nosti, quam dulcior et fortior esset voluptas sive amor Dei, in quo concepisti: sine dubio potata es illius torrente voluptatis. Hic continuo subiicit quae supra retulimus verba, ac statim pergit: sed ante faciem huius amoris peccatum, nec illud, nec aliud stare potuit, ante faciem huius ignis stipula omnis interiit, ut totum sanctum fieret habitaculum, in quo Deus totis novem mensibus habitaret. Vide igitur Rupertum de ea conceptione in primis sermonem instituisse, qua Verbum divinum in utero concepit suo Beatissima Virgo, quae sine*

ulla certe fuit sensus voluptate, cuiusmodi ex adverso ceterae experiuntur mulieres propter hereditariam labem. II. Siquidem vero carnis voluptatem ipsa quoque Beata Virgo fuisset experta, nisi virtute foret altissimi obumbrata (nimirum singulare istud privilegium Christo Domino datum, ut ex Spiritu Sancto conciperetur; quamobrem dicere de se minime omnium potuit: ecce ego in iniquitatibus conceptus sum) ideo et ipsa fateri de se verissime poterat, ac debebat: Ecce ego in iniquitatibus concepta sum, quippe quam non sine carnali sensus voluptate conceperat mater sua. Atque in ea certe voluptatis foeditate Christum Dominum concepisset vel ipsa Virgo, quum esset de massa, quae in Adam corrupta est, nisi fuisset ab eius voluptatis ebrietate singulari Dei munere praeservata. Quae quum ita sint, equidem non video qua fronte Rupertum urgeant adversarii, quum vel hinc luculentissime appareat, illum ad conceptionem activam parentum Virginis, hoc est ad unam seminum complexionem; quae sit in coniunctione maritali animum ac verba intendisse, non vero ad conceptionem passivam,

ut aiunt, quae consistit in coniunctione mentis humanae cum corpore.

IV. Sed in quo maxime gloriantur adversarii, is est Bernardus, quem ego minime omnium immaculatam Virginis conceptionem impugnasse contendo (i). Nem-

---

(i) Centum supra mille paene iam a Christo nato effluxerant anni, quibus quum multa, eaque praeclara, ac prorsus singularia de Virginis Mariae sanctitate, sive cognita sive illustrata primum fuerint in Ecclesia Christiana, dum nihil interea de sui conditione conceptus expresse aperteque traditum, aut disputatum esset, duodecimo demum medio fere saeculo controversiae huic aditum aperuit Ecclesia Lugdunensis. Haec enim, ut a Sanctissima Dei Genitrice singularem quidem prae ceteris gratiam iniret, seu vero ad aemulandum Anglicanae Ecclesiae praesertim, Canturberiensis exemplum, in qua iam inde ab saeculo XI. abs Anselmo Archiepiscopo ( ut expresse testatur Concilium Londinense anni MCCCXVIII. ) celebrari primo coeptum immaculae conceptionis festum ( licet longe antiquior huius festi memoria habeatur in legibus Wisigothorum, in quibus Ervigis regis lex: *festum S. Virginis Mariae, quo gloriosa conceptio eiusdem genitricis Domini celebratur*; quod monumentum frustra sollicitare adnititur Cl. Thomasinus ),

pe in ea epistola, quam ad Canonicos Lugdunenses dedit, duplici ex capite in eos vehementer invehitur. Primo, quod rebatur illos conceptioni libidinosae, quae prima seminum comprehensio dici solet, honorem et cultum detulisse. Atque eum, inquit Sanctus Abbas, *honorem non probat ratio, quod enim sanctum non est, coli non debet. An forte inter maritales complexus sanctitas se ipsi conceptioni immiscuit, ut simul et sanctificata fuerit, et concepta? Aut certe quomodo peccatum non fuit ubi libido non defuit?* De altera vero conceptione, quae in coniunctione mentis cum corpore versatur, ne verbum quidem habet in tota colloctione Bernar-

---

quum anniversariam eius diei memoriam sollemni ritu quotannis recolere instituisset, re ad Bernardum, sanctitatis ac doctrinae fama tunc temporis clarum delata, aegre is adeo festi celebritatem tulit, ut e vestigio ad Lugdunensis Ecclesiae Canonicos scripserit; novitatem in primis illis opponens, quam veluti matrem temeritatis, sororem superstitionis, filiam levitatis expresse accusavit. Confersis Epist. CLXXIV. qua tamen a suscepto iam cultu avocare Lugdunensem Ecclesiam minime valuit Bernardus.

dus ; usque adeo ab ea impugnanda est  
 alienus ! Alterum querelarum Bernardi ca-  
 put illud erat , quod diem conceptioni  
 Beatae Mariae sacram quotannis sollemni  
 ritu celebrare coepissent, Romana cathedra  
 inconsulta. *Nulla Virgini*, sunt Bernardi  
 expressissima verba , *ratione placebit contra*  
*Ecclesiae ritum praesumpta novitas . . .*  
*Consulenda erat prius Apostolicae Sedis*  
*auctoritas.* Ac mox se fixum ratumque ha-  
 biturum profitetur quidquid hac in re ab  
 Ecclesia Romana statutum sancitumque fo-  
 ret : *Romanae Ecclesiae auctoritati atque*  
*examine totum hoc , sicut et cetera quae*  
*huiusmodi sunt , universa reservo , ipsius*  
*si quid aliter sapio , paratus iudicio*  
*emendare.* Ex quibus pronum est cui-  
 vis intelligere Bernardum , si hac aetate  
 nostra viveret , non probaturum modo ce-  
 lebritatem conceptionis immaculatae , sed  
 execraturum quoque illos , qui quum vi-  
 deant festum illud publico ac universali  
 cultu per totam Ecclesiam constitutum ,  
 atque Romanorum Pontificum iterum ite-  
 rumque auctoritate firmatum , adhuc tamen  
 morantur Virginem Sanctissimam labis ex-  
 pertem profiteri.

## CAPUT V.

*Virginem Deiparam singulari divinae gratiae privilegio a peccato originis fuisse praeservatam, Romanae Ecclesiae auctoritate firmatur.*

I. **R**eliquum id est ; ut Romanae Ecclesiae attendamus auctoritatem. Hinc enim summa Christianae professionis, regula ceteris per orbem universum constitutis Ecclesiis est accipienda. Romanae autem Cathedralae ubi auctoritatem dico, summi item in ea sedentis, docentis, gubernantis Pontificis (quem, ut Chalcedonensis Concilii verbis utar (k): *nobis impenetrabilem in omni errore propugnatorem Deus providit.*) potestatem, auctoritatemque dico; quando

---

(k) Ita quidem in adloquutione Concilii Chalcedonensis ad Imp. Marcianum: *οθεν ατρωτον υμιν εκ πλανης ο Θεος επεγονησε ηρωμαχανον, και του της παμμαιων προς νικην ευτρεπισε προεοδον: Unde nobis impenetrabilem in omni errore propugnatorem Deus providit, et Romanae Ecclesiae Papam ad victoriam praeparavit.* Apud Labbeum Collect. Concil. Tom. IV.



ita connexa ac colligata haec duo inter se Patres universi docuerint, quemadmodum humano corpori caput.

II. Scilicet igitur id modo est mihi expendendum, Romanam Ecclesiam, vim tantam, tantumque ponderis immaculatae Virginis conceptioni tribuisse, ut certissima atque indubitata sit prorsus tenenda. Quod sane ubi erit demonstratum, actum perinde cum adversariis nostris totum erit negotium; Namque id tantum desiderabat Bernardus: *Romanae Ecclesiae auctoritati ac examini totum hoc reservo.*

III. Porro Ecclesia Romana festum Immaculatae conceptionis, cuius anniversaria sollemnis memoria ab universis fere catholicis Ecclesiis colebatur (1), probavit pri-

---

(1) Constitutionem Sixtus IV. Pontifex tulit Kalendis Martiis anni MCCCCLXXVI. cui initium: *Quum prae excelsa*, in qua Missam, et Officium immaculatae Virginis, cura Leonardi Nogarolae Clerici Veronensis, ac Notarii Apostolici digestum, ab se vero probatum declarat; tribuitque fidelibus cunctis, qui in festo conceptionis Deiparae sive Missam, sive Officium celebrent, aut celebrantibus intersint, easdem omnino indulgentias, quibus Urbanus IV. Clemens V. et Martinus V. festum sollemne Corporis Christi,

num ipsa sub Sixto IV. Pontifice (m), atque exemplo suo, si qua adhuc reliqua fuerat, ad eundem festum celebrandum provocavit. Tum sub Clemente XI. praecepto insuper obstricti quaquaversum per orbem fideles, ut diem illum servarent, colerentque, quem sponte hactenus sua, atque animi in Parentem Dei Sanctissimam optime affecti libera quadam propensione celebraverant; quo sane praecepto quid aliud praestitit illa, nisi suum de re probatissima exprimere votum (n)? Illud enim-

---

eiusque Ecclesiasticum Officium ornaverant. Conferas alteram Sixti constitutionem anno MCCCCLXXXIII. cui initium: *Grave nimis* inter Extravagant. Lib. III. Tit. de Reliquiis, et Venerat. Sanctorum. Cap. II.

(m) Constitutionem edidit Clemens XI. an. MDCCVIII. quae incipit: *Commissi nobis*.

(n) Lata Alexandrina Constitutio an. MDCLXI. VI. Idus Septembres, cui initium: *Sollicitudo omnium Ecclesiarum*; qua Constitutiones omnes antea latas tum confirmat, tum alia multa decernit, quae huc saltem in imam pagellam transferre, operae pretium existimo. » Sane vetus est » Christi fidelium erga eius beatissimam Virginem Mariam pietas, sentientium eius animam » in primo instanti creationis, atque infusio-

vero immotum ratumque semper fuit apud Catholicos, eritque semper, quod a Patri-

» nis in corpus fuisse speciali Dei gratia et pri-  
 » vilegio, intuitu meritorum Iesu Christi eius  
 » filii, humani generis Redemptoris, a macula  
 » originalis peccati praeservatam immunem,  
 » atque in hoc sensu eius conceptionis festivi-  
 » tatem sollemni ritu colentium, et celebra-  
 » tium; crevitque eorum numerus, atque hu-  
 » iusmodi cultus post editas a felicitis recorda-  
 » tionis Sixto IV. Praedecessore nostro, in  
 » eius commendationem Apostolicas Constitutio-  
 » nes, quas Sacrum Concilium Tridentinum  
 » innovavit, atque observari mandavit. Aucta  
 » rursus, et prorogata fuit pietas haec, et cul-  
 » tus erga Deiparam post erectos hoc nomi-  
 » ne adprobantibus Romanis Pontificibus Re-  
 » ligiosum Ordinem, et Confraternitates, ac  
 » concessas ab iisdem indulgentias, ita ut ac-  
 » cedentibus quoque plerisque celebrioribus Ac-  
 » cademiis ad hanc sententiam, iam fere om-  
 » nes Catholici eam complectantur . . . . .  
 » Nos considerantes, quod Sancta Romana Ec-  
 » clesia de intemeratae semperque Virginis Ma-  
 » riae conceptione festum sollemniter celebra-  
 » bat, et speciale ac proprium super hoc offi-  
 » cium olim ordinavit iuxta piam, devotam, et  
 » laudabilem institutionem, quae a Sixto IV.  
 » Praedecessore nostro tunc emanavit, volen-  
 » tesque laudabili huic pietati, et devotioni,

bus primo traditum, deinde nemine repugnante ab omnibus exceptum, atque ab

---

» et festo, ac cultui secundum illam sententiam  
» exhibito in Ecclesia Romana, post ipsius cultus  
» institutionem numquam immutato, Romanorum  
» Pontificum praedecessorum nostrorum exem-  
» plo favere, nec non tueri pietatem et devo-  
» tionem hanc colendi, et celebrandi Beatissi-  
» mam Virginem praeveniente Spiritus Sancti  
» gratia a peccato originali praeservatam: cu-  
» pientesque in Christi grege unitatem Spiritus  
» in vinculo pacis, sedatis offensionibus, et iur-  
» giis, amotisque scandalis conservare: con-  
» stitutiones et decreta a Romanis Pontificibus  
» praedecessoribus nostris, et praecipue a Sixto  
» IV. Paulo V. et Gregorio XV. editas in fa-  
» vorem sententiae adserentis animam Beatae  
» Mariae Virginis in sui creatione, et in cor-  
» pus infusione Spiritus Sancti gratia donatam,  
« et a peccato originali praeservatam fuisse,  
» nec non et in favorem festi, et cultus Con-  
» ceptionis eiusdem Virginis Deiparae, secan-  
» dum piam istam sententiam, ut praefertur,  
» exhibiti, iunovamus, et sub censuris et poe-  
» nis in iisdem constitutionibus contentis ob-  
» servare mandamus. Et insuper omnes et sin-  
« gulos, qui praefatas constitutiones sen de-  
» creta ita pergent interpretari, ut favorem per  
» illas dictae sententiae, et festo, seu cultui  
» secundum illam exhibito frustrentur, vel qui

ipso Angelico Doctore in primis adnotatum ( *Part. II. Quaest. 27. art. 1.* ) videlicet non celebrari ab Ecclesia festum,

---

» hanc eandem sententiam , festum , seu cul-  
 » tum in disputationem revocare , aut contra  
 » ea quoquomodo directe vel indirecte , aut  
 » quovis praetextu etiam definibilitatis eius exa-  
 » minandae , sive Sacram Scripturam , aut  
 » Sanctos Patres sive doctores glossandi , aut  
 » interpretandi , denique alio quovis praetextu  
 » seu occasione ; scripto , seu voce , loqui , con-  
 » cionari , tractare , disputare , contra ea quid-  
 » quam determinando , aut asserendo , vel ar-  
 » gumenta contra ea asserendo , et insoluta re-  
 » linquendo , aut alio quovis excogitabili modo  
 » disserendo ausi fuerint , praeter poenas et  
 » censuras in Constitutionibus Sixti IV. conten-  
 » tas , quibus illos subiacere volumus , et per  
 » praesentes subiicimus . . . . eosdem aliis  
 » poenis nostro , et eorumdem Romanorum  
 » Pontificum successorum nostrorum arbitrio  
 » infligendis pariter subiacere volumus . prout  
 » subiicimus per praesentes » . Haec satis ex  
 Alexandrino diplomate , ut quis intelligat ex-  
 pressissime tandem apertissimeque omnium de-  
 clarasse Alexandrum id fuisse ac esse illius Ec-  
 clesiastici cultus scopum , praeservationem Dei-  
 parae a peccato in ipso primo instanti , eoque  
 pertinere omnia quaecumque Romani Pontifices  
 antea decreverant.

nisi de aliquo Sancto ; ex quo ineluctabili , atque inconcusso prorsus principio , certissimam illam exploratissimamque consecutionem ipse eduxit Angelicus , ut Virginem probaret in ipsa sua nativitate sanctam , quippe cuius festum diem Ecclesia sollemniter iusserat celebrandum. An vero catholico homini dubitare licebit quin Mariae naturalis conceptio immaculata fuerit , eadem Romana Ecclesia volente ac iubente , ut eius festum ab universa celebretur Ecclesia ? Ipsi videant.

IV. Neque vero dices Ecclesiam Romanam sive probando , sive praecipiendo id festum , haud quidem in sanctitatem intendisse Deiparae conlatam , longe antequam ipsa in lucem prodiret , sed post primum tantum temporis instans ab primo conceptu. Hanc enim cavillandi ansam omnino praeripuit Alexander VII. Pontifex , data constitutione , qua luculentissime aperuit , eam semper fuisse Ecclesiae Romanae mentem , ut non aliud eiusmodi Ecclesiastici cultus sit obiectum , quam praeservatio Deiparae a peccato originali in ipso statim temporis momento , quo anima Beatae Virginis corpisculo sibi prognato primum adhaesit. Ecquod igitur superest effugii ?

V. Novi equidem quid versipelles homines moveat, quominus firmissimo huic Ecclesiae Romanae testimonio adquiescant. Nimirum arbitrantur ipsi, festum immaculati conceptus rem esse merae disciplinae, proindeque mutationi obnoxiam. Quid hoc opinamenti monstrum? ergone eo devenimus tandem ut Ecclesiam Romanam errare posse credamus in proponendo toti ecclesiae cultu ad Religionem spectante? Appage! Cultum enim Dei, sanctorumque suorum, universae Ecclesiae ab Romana Sede propositum, et ab universa Ecclesia pro no animo receptum, ac rite delatum, ecquis umquam erit inficiaturus apertam esse fidei Christianae professionem (o)? Ita sane San-

---

(o) Impiam adversariorum opinionem, vel haereticam haud ego audeo adpellare. Dicam libere autem, uti septio, falsam illam, ac erroneam, et si quid aliud; siquidem directe adversatur propositioni catholicam doctrinam exprimenti. Propositionem enim doctrinae catholicae illam dicimus, quae quum semper, et ubique, et ab omnibus recepta fuerit Ecclesiae filiis, tum a Sanctis etiam Patribus pro data sibi scribendi materia litteris consignata, et expressa, tametsi in articulis fidei nondum habeatur, quod sive Romani Pontificis, sive OE-

ctus Thomas, ita et Theologi; Num vero in fidei professione errare cum Ecclesia

---

cumenici Concilii aperta careat definitione: cuius profecto generis illa est propositio: *quidquid ab Ecclesia universa colitur, id et verum, et sanctum est*. Atque ista sane constanter adeo Ecclesiae universae fuit persuasa, ut merito axiomatis loco unanimi sermone Patres constantissime inculcaverint. Hinc Sanctus Bonaventura *Distinct. III. Art. I. Quaest. 3.* sanctificatam esse Beatam Virginem in utero Matris pro certo, et indubitato tenendum adfirmavit, *quod eius nativitatem tota Ecclesia celebrat*, quod non faceret, nisi sanctificata esset. Quam ipsam argumentationem adposite Hildefonsus usurpat *Lib. de Parturitione Virginis*, tum et Sanctus Bernardus *Epist. CXCIV.* Quum autem in generali ista propositione, *non celebrari ab Ecclesia nisi quod verum et sanctum est*, singularis illa contineatur, Beatissimam Virginem originali immunem fuisse peccato, nemo non videt quanto in errore versentur qui contra <sup>75</sup> *senserint*. Neque vero me hac in re vel minimum tentent adversarii. Provoco eos enim ad eminentissimum iudicem, eumque minime suspectum, Dominicani scilicet Ordinis Theologum Vincentium Mariam Cardinalem Gottum, qui in re haud absimili severiorem, iustissimam tamen omnium tulit sententiam. Nimirum edisserens *Lib. IV. de Veritate Religionis Christianae Cap. XLI.* qua censura notari dignus sit,



Romana Ecclesiam universam dicemus? sed quis talia blasphemaret? nimirum inerrantia, quam Christus Dominus Ecclesiae suae

---

qui negaverit Beatam Virginem ad coelos fuisse cum corpore rediivo adsumptam, sic statuit: *Hunc enimvero fore de haeresi vehementer suspectum, non quia praecise communi credulitati se opponeret, sed quia praesumeretur hoc ex iudicio erroneo procedere, nimirum quod Ecclesia universalis proponeret Beatam Virginem sub titulo falso colendam.* Atque bene noverat subactissimus Theologus doctrinam de corporea Deiparae in coelos assumptione, etsi communiter in Ecclesia receptam, nulla tamen eiusdem Ecclesiae expressa definitione adhuc explicatam; nisi quod praeceptum dederit illa fidelibus universis, festum illius diei, quo Beata Virgo ad coelos adsumpta pie creditur, memoria anniversaria recolendi. Quo praecepto quid ipsa a Spiritu Sancto edocta et sentiret, et crederet satis aperte significavit. Quod si ex huiusmodi religioso cultu dumtaxat, tam firma ac constans visa est Eminentissimo auctori doctrina de Beatæ Mariae adsumptione corporea, ut quisquis contra senserit in errore versetur, haeresi proximo, sitque de haeresi vehementer suspectus; an sodes iniquioris iudicii accusabitur aliquis, qui in eodem luto haerentem, Deiparae nempe impugnantem Conceptionem innoxiam de haeresi suspectum argumentando prouinciabit?

tribuit, non ad fidei controversias tantum definiendas pertinet, sed ad tradendam quoque Christiano gregimorum certissimam regulam. Id quod et ex Apostolo patet ( 1. Ad Tim. 14. 15. ) ubi Ecclesiam *Dei vivi columnam* adpellat, et *firmamentum veritatis*, in iis etiam praescribendis quae ad Christianae pietatis perfectionem, formamque vitae ac morum spectant. Ibi enim Apostolus nonnisi vivendi normam tradiderat, quam teneret ac sequeretur tum ipse Timotheus, tamquam gregis Pastor, tum fidelium sibi creditorum grex universus. Jam si Ecclesia errare nequit in proponenda Christiano gregi fidei doctrina, quae ista insania erit eandem Christi sponsam errori facere obnoxiam in iis quae ad mores formandos praescribit? Huiusmodi enim est cultus religiosus, quem Sanctis cum Christo regnantibus, Ecclesia Romana volente iubenteque, deferimus.

VI. Sed cedo aliquantisper. Fac interea Ecclesiam in eo fallere aliquando ac falli; fac et in tradendis formulis, votis, supplicationibusque errare posse. Quid erit hoc tandem errore perniciosius? quando nostrorum nos criminum veniam, atque coelestem quoque gratiam amicitiamque conse-

cuturo eo sequestre , et advocato sperare iuberet , qui Deum , cui invisus olim fuerit , eritque perpetuum , ad iracundiam potius provocare non cesset ! Proh nefas dictu , audituque horrendum quam maxime ! En quo se demum praecipites agunt , qui errorem huiusmodi Ecclesiae Romanae impingunt ! En quantum ad communes Ecclesiae universae mores interest , recte nosse quos demum sequestres , et malorum nostrorum deprecatores apud Iesum Christum , et Patrem habeamus , quos invocare , quos colere tuto possimus.

Atque haec , quae de sancto ac immaculato Virginis conceptu dicerem , habui ; quaeque in Dei omnipotentis gloriam , ac Domini nostri Iesu Christi , eiusque Sanctissimae Matris laudem , et honorem cedant. Amen.



I

M. ARCHANGELO LVPVLO

REG. PALAT. HERCVL. ACCADEM. XV. VIRO

VIRO CLARISSIMO

ANGELVS LAMPREDIVS

S. P.

**Q**uamquam apud me, VIR CLARISSIME iamdiu summam eruditionis estimationem acceperas; ex quo nimirum inspexi praeclarum illum Commentarium in veterem Corfiniensem Inscriptionem, in prima tua iuventute elaboratum, praeter egregia alia sanctae antiquitatis novissime edita opera: sed iam tum equidem quum patriae litteraturae columnen Vir Amplissimus FRANCISCUS DANIELIUS pro suo singulari quo est in me studio coepisset dono mittere Theologicas tuas praeclarissimo opere elucubratas lectiones, et impensam habui erga te voluntatem, et a me in amicorum colloquiis

semper habitae sunt de te laudes. Scilicet ad eam spem quam extra ordinem iam inde de te Ecclesiae, Religionique profuturo conceperam, non solum propter eruditionem, et acre iudicium ( haec enim ornamenta sunt fortasse tibi etiam cum aliis communia ), accedunt iam tua praecipua propter ingenium versatile, summamque industriam, atque peritiam in promendis ex sanctiore Scripturarum acrio argumentis, et in integris divinarum rerum fontibus per nostrorum maiorum latifundia exquirendis; quod sane est exitu<sup>s</sup> rebusque cognovisse, te occurrisset maturius expectationi, quam concitaveras, non modo eam spem non fefellisse. Enimvero suspexi te pro rei dignitate quasi ex Theologico adyto dantem responsa, in quibus nemo nisi plane in rebus optimis sensum amiserit, vel mente sit laeva, non concinnam brevitatem cum perspicuitate non admiretur, verum etiam in umbratili oratione facilem, et nati-

vam elegantiam , qua tu quodam quasi Musaeo lepore contingis ea quae dicis , et praeterea lucidum quemdam ordinem , et venustum in multigena illa eruditione , et veterum monumentorum segete , quae tibi usque est sub manu : praeterea expeditam disserendi aciem quasi punctim , ac caesim petendo victricem. Quae omnia cum mihi admirabilitatem fecerunt , tum obtinent magni Petavii instar graphycoterōn ( si Vitruvianam vocem sequi licet ) , et in quo lineam non transis , ut ajunt , praesertim in lucida nubila primigenia discutienda , et in Tertulliano disertissime vindicando. Tanta adeo affluis rerum venustate et varietate , ut si illustrium locorum , quorum luce vel obtusam aciem procelli necesse est , vellem hic tibi indicem facere , ipsos libellos stellulis ornatos ad te remittere opus fuisset : aut vero si ea *καρπερα* quia vellet colligere multis partibus plura in quibus identidem illatis ima pagella pro-

cedit ( uti nimirum ne opportunarum copia animadversionum aptam colligatamque seriem invertat ) nae is quasi exquisitam dapem ex analectis collectam habebit. Tantum ego ( ut videas quanta mihi sit tecum in omnibus , quae in re nostra sunt , summa consensus ) , actis Andreae Apostoli a Woog Lutherano homine egregie vindicatis omnem tribuo *αὐθεντία* ; atque de Dupinio non proinde judico , ac si esset egregius auctor ; cuius nec graece , nec latine docti sublestam eruditionem saepissime deprehendi , nec mea usquam estimatione dignum putavi hominem audacissimum , totumque constantem ex fallaciis , ubi Ecclesiae statum , atque judicia cupiat deiicere ; tuque quod specimen est pro tempore insulsam cavillationem de Pelagiana *causa finita* pulcherrime refellis. Ne multis , ita mihi persuasi ( potest fieri ut fallar ) cum hac tua Institutione non posse quamlibet aliam comparari , postquam pari



strenuitate totum opus profligaveris : atque is tibi delectus rerum est , eaque tractandi ratio , ut et temporis compendio et emolumento certissime superes libros *ἐπιστογραφεὺς* , quos Lucianus vocat ; et Iuvenalis *intus et a tergo scriptos* .

Atque Lucianus idem , ut aliud ex alio , illustriorem locum tuae laudi illic videtur ingerere , ubi sua illa *φρασι* visus est graphyce eos pinxisse , qui Theologorum *προσοπτεῖον* apud nos ludunt item ut molles histriones , qui nec heroice loqui , nec incedere docti Herculem agere audent in scena , quibus si honos habendus esset , non se contineret Hercules ipse quin clava contereret in sanctissimis rebus ineptos , et deliros . Non hic memorem Lugdunensem illam paucis ante annis dolo malo inventam mercem ; non quemdam Confortium , in quò mera garrulitas circulatoriae locutionis , alium intidem Genuensis nomine illud pugnantem , et enitentem , ut iniquas acies , quibuscum tan-

tum videtur consuevisse, instrueret, ipso interea quasi parmula projecta triarios, quos non novit, implorante: non hos, inquam, aliave huiusmodi Theologici nominis καθαρματα velim indicare, quos nequidem duobus obolis emendos praedicaret Hermes praeco. Tu certe unus et debilitatum apud nos Theologi nomen honestas, et labem eluis illatam, vel ab horum imperitia, qui nec quae conradunt undique, intelligunt, vel a socordia, qua Hesiodaeis (εργ. v. 302.) κηφηνεσαι κοτεροις ικελοι, αργοι εζοντες alienos labores absument sine delectu, imo vix quidem convasare, atque digerere sciunt; vel etiam ab impietate, qua nobilissimam disciplinarum, erroribus quacunque eunt quasi saeculo satis, Harpiarum ritu ubique *contactu foedant immundo*.

Ego adeo tametsi non tam multum in his rebus intelligo, quam multa vidi; vidi tamen, penitusque prospexi, rem Theologicam apud nos de

statu deiectam , atque instar Nubis Ixioniae captari. Quid multis ? memini vidisse haud pluribus abhinc annis quemdam verbis phaleratis exultantem proinde ac si coecus succussator esset ; qui uti uno ictu subrueret ipsos duodecim de matrimonio Canones Tridentini ( quod Sarpīi pravitatibus imbuti inficete post Vergerium vocare audent *Concilium Scholasticorum* ) perspecte , et firmiter , ut huius farinae decebat Theologum , concludebat , contractum civilem reipsa relinqui solum in coniugio viduarum , quippe a quo Rituale Romanum faciat abesse benedictionem Sacerdotis , qua Sacramenti ratione omnino constitui sit exploratum. Haud diu etiam est quum ad me fuit allatum de alio , qui pro conditione adeo laudaret matrimonium ut illo faceret sequiorem *υψηλωτεραν την ταυτην πολιτειαν* , quam *Virginitatē* vocant Graeci Patres. Quae tamen impudentia , quasi prae illo blaterone Pauli *γνωμην* contemni liceret , isthic pa-

tronus ineptissimos nacta est. En quae spectacula eruditis hominibus externis visenda ac ridenda committunt Theologi nostrates ! Age nunc CLARISSIME VIR, ab istis *ῥωγανιστικὴν* illam tuam, aut vero *σκολαστικὴν* reposcas; quos nec illa didicisse putem, quibus puerilis aetas ingenuorum ad focum, avia praeunte, informari solet, nedum *δωγματικὴν* in Pastorum tractatibus edoctos.

Atque ipse, cui, ne rivulos consectorer, nativam frugem pro eo, ut mea fert conditio, hausisse licuit ex nostris maiorum gentium Patribus, praesertim Graecis, dudum optaveram, uti in tanta orbitate matris Ecclesiae hominum doctorum, quod ego ne conari quidem habebam, locupletior alter perficeret; idest ex integris illis fontibus ab aliquo qui et eruditione, et ingenio, et stylo, atque aliarum facultatum subsidio instructus, meque adeo melior esset horum omnium egeno, institutio aliqua non tralatitia, atque non itidem

ridenda conderetur. Spem quidem mihi antea iniecerat vir nostri ordinis adprimum doctus in Campano ephehaeo ad Institutiones Theologicas strenue aggressus (a). Non quippe ei deerat lauta suppellex, eratque affatim subsidiorum illorum, quae summum habent in hac palaestra adiuumentum. At non multo post, quum mihi allatum de eo esset, ablegatum hinc fuisse cum Episcopali Potestate in Peucetios, siluerunt eius musae; atque egregia conata, quod sciam, non est exequutus, ipseque quasi Iovis satelles ex ea umbra non emersit.

Interea mihi illam vastitatem spectanti nihil veniebat in mentem, non modo quod ea in re sperarem, sed vix quod licuisset optare. At enim in hac ipsa necessitate, quum primum, VIR CLARISSIME, vidissem tuas Lectiones politissimas omni doctrina, et elegantia,

---

(a) Is est V. Cl. Nicolaus Vecchius Cuper-  
sanorum Episcopus; mox ad Theanensem Eccle-  
siam translatus. *Typographus.*

teque complexum maxime subsidiorum illorum facultatem, quam tibi Superi dederunt, tantam caepi laetitiam, ut vix mihi imperaverim, ne iam tum tibi litteris gratularer.

Quid vero est, cur hactenus non miserim? vel causae fuit, quod cum incundissimum quasi munus dedisses in confodiendo Arianae aut Socinianae impietatis monstro; a Patribus quoque Antenyaenis classicis testibus productis calumnia depulsa; et praeterea Ioannis initio eadem venustate ac Geneseos explicato, pestes omnes huic tantae rei illudentes, quasi ducto rastro, ut ais cum Cyrillo, contusas delevisse; aut vero, ut mihi videtur, eo veluti iniecto reti mirmillones illos infractos fixisses: non adhuc tamen vicisse meam videbaris expectationem. Volebam nimirum voluntatis erga te meae caussa, cum hactenus Theologus rectus aequae ac summe doctus cognitus esses, itidem erga matrem Ecclesiam, quae Deum dat no-

bis habere Patrem piissimum existimari. Summa porro , ut scis , in qua sua causa vertitur , est ille a Christo collatus Petro Primatus , in quo summa constat Christiani Populi Respublica , quove sublato , Ecclesia non erit amplius illa κοινὴ ἡμῶν πόλις οἰκουμενὴ , sive communis nostra Civitas , quam vocat Chrysostomus ( in Ps. 48. ) , *Sacerdotii glutino* , ut est Cypriani tropus , compactilis ; sed palans Nomadum , aut Hamaxobiorum genus , quos idem memorat ; sive ut loquuntur imperitissime cum haereticis rabulae nostrates , mera dicetur in Civitatis statu permissa εταίρια. Quare tantae Matris defendendae munus , debellato cum Arianis , apud te pari sollicitudine debebat excubare.

Enim vero Theologum non tralatitium , neque aretalogum , sed vere doctum ; vereque catholicum , si acum inveniamus , in his duobus licebit agnoscere : in quibus sane Religionis alto coelo demissae quasi cardines vertuntur. Vnus cardo

nempe arcanus, perinde quasi mens per totius conspicui corporis artus infusa, in nativa Christi Deitate constat: cuius quidem confessio numquam elabenda cum Religionis nostrae *ὑσταν* facit immutabilem, tum Ecclesia ipsa illam indidem indepicitur perpetuitatem, quam ipse conditor Dei Filius in *πεντῶ τῷ πρώτῳ* inaugurando spondit se praestiturum. Alter deinde cardo externus, atque oculis admotus, est ipse, quam detulit Petro, *Primatus* in ea populi ineuntis civitate, quam ipse condebat. Ille aeternae conditor Urbis *Pontifex* fuit, hic Rex, qualem Davidis successio praesignificaverat; atque ex utroque coaluit illud, quod vocat Epiphanius ( *haer.* xxix. 3. ) opinor, *αξίωμα Βασιλικὸν καὶ Ἀρχιερατικόν*, seu *regale Sacerdotium*, qui etiam pulcherrime notat, translato Iudae solio in regem peregrinum, regium *αξίωμα* per Christum cuius adventus eo temporis articulo praesensus fuerat futurus, ex carnali Iuda in Ecclesiam translatum



fuisse, atque Sacerdotio restitutum <sup>εις</sup>  
 τον θανα. Hunc porro Primatum aequae  
 ac perpetuam illam divinitatis Christi  
 fidem nulla unquam delere poterit aetas,  
 postquam semel extitit illa Barionae vox  
 quasi omen e caelo datum ( φημην di-  
 xisset Homerus *Odis.* XX. 98. ) tum  
 etiam ex illa Petri professione velut au-  
 gurato Ecclesiae aedificandae locus in  
 eodem Petro captus est: atque iam tum  
 Ecclesia *super unum*, ut Cyprianus lo-  
 quitur, non tam instituta quam inchoa-  
 ta ipsa fuit, substructo primi *Troni*  
 ( ut Chrysostomus sedem vocat Episco-  
 palem ) in tota Ecclesia Episcopatu,  
 sive, ut idem Chrystomus ferme loqui  
 amat; εν τη οικουμένη προστασια, idest, *to-  
 tius orbis praefectura*: Quando Ignatius  
 quidem Martyr proximus heres Aposto-  
 licae doctrinae illud nos edocet, quod  
 καρς επς ε καλειται Εκκλησια, idest, *sine  
 Episcopo non dicitur Ecclesia*; auctor  
 sane non contemnendus prae illis tene-  
 brionibus, qui Ecclesiam in nudo po-

puli coetu non sine horrendorum scele-  
rum machinatione satis superque desi-  
gnari arbitrantur : non enim ex numero  
unitas , quod Massuet ad Irenaeum pec-  
cavit ; sed ex unitate ad numerum Ec-  
clesiae notio nativa *super unum* aedifi-  
cata proficiscitur.

Atque ne extranea haec longeve peti-  
ta videantur , persuasissimum mihi est ,  
ex Arianis maxime , uno quasi partu  
prodiisse utramque impietatem tam in  
Christum Deum , quam in eius corpus  
Ecclesiam ; quippe quos , teste Lucife-  
ro Calaritano , non puduerit Constantio  
deitatis Christi insectatori importunissi-  
mo obtrudisse palpum *Episcopi Episco-  
porum* : eamque insaniam novissime lu-  
tulentus ille Febronius ut mimice imita-  
retur ad ann. cccxxiv. ridiculi chronici,  
vocat Constantinum , *communem omni-  
um Episcopum*. Rem itaque vides , VIR  
CLARISSIME , quomodo se habeat , quo-  
ve haec longe repetita principia spectent,  
quoque studia amoris erga Te mei.

Iam vero DANIELIUS, ille idem Christianae virtutis aequae ac patritae Religionis apprimè tenax, idemque utriusque nostrum amantissimus, quum me expectantem praemonuisset; te id praestitutum in *Apparatu*; tum vero nihil mihi longius fuisse visum est, quam ut hunc viderem: eoque maturius mihi nec opianti repraesentato, mirum quantum plauserim, gratiamve habuerim doctrinae pietatique tuae, quibus incoctus parenti optime merita gratiam retulisti. Neque dum satis constitui, admirationis ne plus an voluptatis attuleris; aut vero, si nimia voluptas laetitia dicenda est, omnibus inCESSI laetitii; teque quem diligebam, ita amare coepi consortem mecum earumdem magnarum veritatum, vindicemque inoffensum, ut ad eum amorem nihil iam possit accedere. Scilicet te eo sum amore complexus, quem non vinculum modo efficit earum litterarum, quae inter dissitos quoque speciem habent coniunctionis,

sed earum maxime rerum, quae cum Religionem caelo lapsam, eiusque arcem Ecclesiam spectant, tum per se ipsae eos qui voluntate eadem sunt divino etiam vinculo quodam videntur devincire. Bellum profecto, quod Caelo adversus Christum Deum Lucifer excitavit, atque ex eo seruerunt in Ecclesia succenturiati ab ipso nequissimo duce Ariani, Nestoriani, Pelagiani (unum enim idemque piaculum censeri debent), et nunc sublecti nequiores Cosmopolitae adversus Sospitatoris sponsam redintegrare non desinunt, Tu quasi alter ab illo, cuius pulcherrimum nomen habes, visus es tuis chartis profligasse. Habes itaque testimonium hoc meum de te iudicii quod ad meum sensum non prorsus hebetem, ut credo, pluribus probare possem, si cui non probaretur. Enimvero qui umbras intuentur, rem autem ipsam perspicere non possunt, iis nimius laudator fortasse videar, vel etiam quasi fluctus, ut aiunt, in sym-

pulo excitare. Sed enim nimius non viderer, nisi magnae Matris incensus amore fere offendissem homines ex ipso Ecclesiae ordine nihilo meliores, quam qui faeces a Lutheranis, vel Calvinianis combibonibus eiectas lambere assueti, eas in omnium oculis in ipsam Ecclesiam evomunt ingratisimi, vereque scelesti, in matris viscera saevientes. Hoc intollerabile, illud vero non ferendum, quod videas interdum etiam historicos ignavissimos, qui Volusianos annales si consarcinent, tamen sola criminandi et obtrectandi facilitate et garrulitate fortes, in Petri ipsos successores ( quos a Cathedra Apostolica quadam araneorum cassi praescindere simulant ) quasi Dianae ira correpti bacchantur. Quod certe illud assequuntur, ut innumeri nugarum lectores, quod exemplo vident fieri ab catholici nominis scriptore, id etiam recte putari et jure fieri sibi persuadeant.

Nam quid ego de rabulis audacissi-

mis , qui si unquam . . . . . Ecclesiae vadatae respondere debeant , centones consuunt sine metu Arae Lugdunensis. Hi Clericos , quasi in humanae societatis praedones inciderint , ut incessant , contemtim res Theologicas iure quasi suo sibi arrogant tractandas , quae nempe tam sunt habiles , et aptae ad suum captum , quam ad vulturem , ut Graeci aiunt , lusciniam imitari. Hos videas explorate pronunciare de Ecclesia quasi tibicinum sit hetaeria , vel fidicinum , qui sacris publicis praesto sint , atque Episcopus quasi eorum sit procurator , vel magister Quinquennalis : tum etiam quasi eius unitas ex capitis , sive *matricis* , et *radicis* ; ut Cyprianus vocat , unitate efflorescens , adscita ea sit non nativa , et primigenia iam inde a Petri inauguratione sata a conditore , formam suam , ex democratica , vel aristocratica imagine in monarchicam , qua nunc est , descivisse. Itaque si aliquid in ea sit offensum ( homines enim su-

mus ) ipsos videas adeo magnis animis in Ecclesia exagitanda , ut eos τῷ ἐγκύμῃ οὐκ quidam vir bonus dicendi peritus assimilaret , ipsamque Ecclesiam leoni aegrotanti . compararet. Frustra autem conarere evellere ex suo cerebro hanc ceu caprificum , se esse proclamatores doctissimos . Quod si velles , ut ego quondam , illis praetendere vel ipsius Iustiniani Novellam XLII. vel Graeca illa ex VI. μεγίστα τὰ δῶρα Θεοῦ, ἱεροσυνή τε καὶ Βασιλεία, antequam explices : *maxima dona Dei Sacerdotium et Imperium* , quasi mamurium dixeris exhorrebunt : interea dum his naeniis , quibus ludibrio esse deberent , quasi per latrocinia nituntur ad nominis celebritatem. Hanc quippe quadam temporis iniquitate fere ducunt ἐπιτομον εἰς δόξαν τὴν ὁδὸν , ut olim Lucianus aiebat.

Quin quod ἀγελατος rideret , saepe vidi de Religione , deque Christi Ecclesia , deque eius *radice* , atque *matrice* Papa Romano tamquam non necessario , et

fortasse noxio bene ocreatos Thrasones decernere, beatos illos et quietos, quibus otio et luxuria diffluentibus larga haec Deus otia fecit: quo genere nihil in Deum καὶ τὴν ἐξουσίαν τεταγμένην ὑπὸ Θεοῦ ingratus, dum larga merent ὀψωνία, ut elegans vocabulum Pauli Apostoli usurpem. Hos ego caveo de sanctis rebus collocuturus; postquam enim latina verba de Petro, et Clavibus solaecismis infecta protulerunt, velut saliarum assamenta, si velis hinc veram frugem ingerere, vel patiari ridentes ore catuli Gallicani, vel dolebis oleum operamque perdidisse item atque cum dormitantibus. Hi nempe omnes linguam latinam velut medentium pocula aversantur.

Utinam vero grassantem ubique damnatorum librorum cursum Imperia inhiberent, eaque lectio imposita animadversionum severitate prohiberetur! Hinc enim derivata clades fluxit in forum, atque adeo in tunicatum popellum. Qui enim muneribus inhiant, atque ex dissyllabis



τετρασυλαβοι fieri cupide volunt, ut possint plebeculae videri esse doctissimi, coemunt crassos libros hoc uno delectu, si bene a librariolis malleatos, et glutinatos videant cum toga extrorsum versicolore, et colore croceo, aut purpureo, et indice aurato quorum emptione, et tactu secerni populo, diisque misceri putant, dum miselli rudes et imparati tetra inde hanriunt venena, olim Ecclesiae Religionique nocitura.

Ne me quaeso, DOCTISSIME LUPULE, τῶν καρκαρῶν putes ita paulo liberius, aut vero libere loquentem. Nam mihi dia veritas Dei Optimi Maximi beneficio una in amore atque in deliciis semper fuit, eritque, dum vita supersit, tecum litare, mihi certum est. Itaque ut Parrhesiadem compilare pergam (in Piscatore) μισαλαξῶν εἰμι, καὶ μισογοῆς, μισοφρονῶς, καὶ μισοτυφῆς; καὶ μισῶ πᾶν τὸ τοιῦτον εἶδος τῶν μικρῶν ἀνθρώπων πᾶν. Sunt vero multi ut nosti; et quae est turbulenti temporis calamitas in oppidis,

atque adeo in pagis colluvies ebullit horum illitteratorum ex eorum sentina, qui nacti isthic fumum doctrinae scholas explicant in locis frequentioribus, quos si monere velis desinant furere, caniculis offendes iracundiores, ut dicam etiam cum Parrhesiade, asinis petulantiores, gallis contentiosiores, nedum non audient. Qui si undique non obstreperent, ego mea me tenuitate involvens ἀφανετερος τῶν ἰχθίων essem. Sed cum tanta videas, difficile est non indignari. Utinam vero certorum hominum ignorantia aut oscitantia tuo ad minimum *Apparatu* tamquam venustissimo Enchyridio illecti respicerent! Habes igitur, VIR CLARISSIME, quatenus meae tenuitatis sensus continuerit, quin hoc tibi quicquid est gratulationis significaverim de tuis lucubrationibus, quibus nempe unus ornatissimus rem Theologicam penes nos quodam absurdi temporis vitio labefactatam visus es in statu collocasse.

Sed enim ut expediam exitum huius gratulationis, et institutae querelae, illud postremo a Te impetrare vellem, uti in operis progressu, ubi huiusmodi nebulones offenderis, ne sinas blaterare inultos. Praesertim vero ut castiges quemdam sublingionem de Religionis reformatione praecipientem, personatum nomine *Philosophi Germani*, ut videas in ipso titulo ridiculum, et ineptum, allegantem *Philosophi* nomen ad Religionem. Is quatuor, sexve PIO VI. inscriptis pagellis foedissimis, nec piper<sup>i</sup> bonis, neque schombris, ausus est eruditissime scilicet explicare, nostrum Divorum cultum a saeculo demum quinto irrepsisse in Ecclesiam. Hominem opinor nosti, qui item ut est audax, et impudens, sic est rursus plenus et inficetiarum, atque legislatoris sumpto supercilio, sic in sacris rebus est hospes, ut ne de Iuliano τῷ παραβατῇ quidem audiverit adhuc: illud objecisse Galilaeis, quod a cultu Deorum ad colen-

dos homines mortuos, eorumque ossa, et cineres defecissent. De hoc ergo pecto ut videas suo loco.

Praeterea cum tempus observaveris, operae pretium videatur tibi aliquid iniicere de illis quasi militibus Pistoriensibus seu potius lixis, ad graeculorum instar tectis, iis tamen ita truculentis, et insanis, ut diu Ecclesiam infestam habuerint: quorum stultitias si Pius VI. sanctissima, atque elegantissima bulla expiaverit; tamen et tuae doctrinae et pietatis est, tuam quasi manum iniicere in Cordis Iesu cultum, quo nihil uberius ad Christianam frugem. Scis enim diu in fluminis stellae vadis auditos διψοντας κενεκριμεναι χρυσίου Βατραχεῖ (κατὰ δίκην; si imaginem Parrhesiadis licebit arcessere: ita adeo de hac pietate inficete calumniantes, veluti penes nos, quibus *cardicolarum* salsum probrum ingerunt (ludendi enim venustate ne stercutio quidem cedunt), quasi post factam a nobis ex divino corpore visce-

rationem , nobisque ea praecipua totius corporis parte potitis , ab eadem revera sejungenda sit illa pariter Dei Salvatoris adoratio , quam individuum eamdemque , cum propria eiusdem carne esse debere post Patres omnes Apollinariistarum profliges Synodi V. scita sanxerunt.

Tum vero , ubi fuerit satis in loco , ut purges , rogo , putidum illud excrementum cerebri Harduini ab his sublingionibus arreptum de Filii Dei nomine , quod Verbo tantum ab Incarnatione adhaeserit adscitum.

Tum demum ut videas de contempto ab istis, insuperque habito *Transubstantiationis* vocabulo , quod fere *κατα λέξιν* ex Graecis Patribus deductum , ad rectae fidei tesseram dedicatum est a Tridentino ; quae portenta cum cetera sua audacia , suo ingenio , vel hebeti , vel petulco , vel potius monstri aliquid alenti tribuere opus erit. Quantum vero detrimenti ex his accipiat Ecclesia non

te praeterit : praesertim quod multitudi-  
 ni hae pestes hominum *πῖθ' ἀγορεύει* videan-  
 tur : omnia *enim stolidi*, ut Lucretius  
 ait, *magis admirantur amantque, in-*  
*versis quae sub verbis* ( qualis habet  
 Quesnellianus grex) *latitantia cernunt*.  
 At tuo stylo cum incideris in horum.  
 insanias, si in illis castigandis nec loci,  
 nec temporis facultates praetermiseris,  
 quae a me vix sunt adumbrata, expres-  
 siora, et illustriora futura sunt. Haec  
 autem non idcirco tibi scribo quod ti-  
 bi auctor esse posse putem, aut quod  
 mihi sumo, quod plus ipse perspicio,  
 quam tu pervideas; vel etiam quasi i-  
 gnoto tibi, haec ut nota facerem: sed  
 tantum operi apprime venusto quodque  
 mihi, doctisque omnibus adeo facit ut  
 nolim deesse quicquid Ecclesiae res vi-  
 deatur postulare. Omnia vero huius cau-  
 sa uterque velle debemus, cui qui no-  
 lunt, iidem nec recti Theologi laudem  
 merentur, nec filiorum Ecclesiae nomen  
 genuinum possunt tueri. Huic adeo uni

cupio ; quae omnes ingenuos catholici hominis amores complectitur ; nihil amplius : cetera enim , mihi aetate iam ingravescente de lucro vivere , meisque latebris contento licebit esse.

Interim Tu macte esto virtute ; VIR CLARISSIME perfungere perpetuus opere instituto , neve sancta nostrorum maiorum religio , et Ecclesia tuis utilitatibus careat , sic vive. Vale , et DANIELIO nostro , cui sua suavitas , et religionis candor cum interioribus litteris raro exemplo coniuncta utrumque nostrum devinxerunt , salutem dic. Iterum Vale.

*Theani Pr. Idus Septembr. MDCCXCVI.*

VA1 1529202





## I N D E X

## CAPITUM ET SECTIONUM



**LIBER QVARTVS DE PRIMO HOMI-  
NE EIVSQUE PRAEVARI-  
CATIONE.** *pag. 1*

**CAP. I. DE HOMINE INNOCENTE** **2**

**SECT. I.** Adam humani generis parens.  
Peyrerii deliramenta dispel-  
luntur. Scripturae explicantur. *ibid.*

**SECT. II.** Homo quatenus κατ' εἰκονα se-  
cundum- imaginem Dei fa-  
ctus dicatur. Graecorum, La-  
tinorumque Patrum senten-  
tiae expenduntur. **11**

**SECT. III.** Hominis beatitas in primaevo  
innocentis naturae statu ex-  
plicatur. Plura de illius im-  
mortalitate indagantur, atque  
expenduntur. **21**

**SECT. IV.** De paradiso voluptatis nonnulla attinguntur. Quid sit Eden. Septuagintaviralis versio interpretatur.

32

**CAP. II. DE HOMINE IN PECCATUM LAPSO.**

39

**SECT. I.** Divinum mandatum Adamo factum. Illius per liberum arbitrium praevaricatio. Prævaricationis causa inquiritur. Plura de serpente seductore. *ibid.*

**SECT. II.** Quanta uno in Adami crimine conglobata facinora. Et quae poenae peccatum subsequutae fuerint. Iustitiae originalis donum, quod sibi posterisque suis acceperat, an sibi posterisque suis per peccatum amisit. Originalis peccati ab Adamo in posteros transfusio Christianae Religionis fundamentum.

51

**SECT. III.** Peccati Originalis in omnes homines transfusio ex Veteri Testamento evincitur.

59

**SECT. IV.** Peccati Originalis in omnes homines transfusio ex Novi Foederis tabulis evincitur.

65

**MANTISSA** Nonnulla ex ratione excavantur

momenta , quibus amplius originale peccatum evincitur. 70

SECT. V. Peccati originalis in omnes homines transfusio ex Traditione evincitur. 79

SECT. VI. Pelagianorum sophismata diluntur. 90

SECT. VII. Quae peccati originalis natura. Matthias Illyricus , tum Calvinii , et Lutheri sectatores prosternuntur. Augustinus, et Thomas explicantur. 95

SECT. VIII. Liberum humanae voluntatis arbitrium originali peccato infirmatum , non autem extinctum. Scripturae explicantur. 104

AVCTARIUM Quomodo in omnes Adae posteris Originale peccatum traducatur. 115

CAP. III. QVI HOMINES SANARET LIBERATOR PROMITTITVR IN HVIVS FIDE SALVI FACTI SVNT VETERES IVSTI. 122


EXCURSVS De Isaaco Christi typo omnium insignissimo. 129

SCHEDIASMA DE CONCEPTU VIRGINIS.

CAP. I. Virginem Deiparam singulari Divinae gratiae privilegio a pec-

- cato originis fuisse praeservatam, ex S. Scripturis tentatur. 150
- CAP. II.** Scripturarum loca difficiliora, quae contra facere videntur, explicantur. 160
- CAP. III.** Virginem Deiparam singulari Divinae gratiae privilegio, primaeva immunem labe, ex Patrum traditione probatur. 170
- CAP. IV.** Adversariorum, contra propositam traditionem, argumenta diluuntur. 184
- Cap. V.** Virginem Deiparam singulari Divinae gratiae privilegio a peccato originis fuisse praeservatam, Romanae Ecclesiae auctoritate firmatur. 192
- Epistola Angeli Lampredii ad M. Archangelum Lupuli. 1





~~1611~~  
~~1612~~  
~~1613~~

163

C

16

